

लूकाए ओसरो चाव था

आव पोस्तोको दाक्दर येन दोज्याव तोबो लूकाए ओसरो ज़। आवए उमिन पावलए ओसरोल ब रैंःज्या (कलस्सी ४:१४, २ तिमोथी ४:११; फिलेमोन २४)। आव पाँ भरी येसु किताव ओल्यो लिद पक्का थरैद्यान्याए जूनी सर्सिउ लिज्या (लूका १:१-४)। गे प्राइँ जातलाव मिँरालाई बाँचैज्याव ज़ लिद सरैंःसिउ ब लिज्या (२४:४७)। नो पाँए ओअर्थ गेप्रभु येसुए जखायसलाई है ओदोव पाँत ज़ रैंःद ले। नो पाँ आव ज़ — “डा मिँ मिन्सिउ इताव माव डोइवरालाई खिम्द बाँचैना डाहुव ज़” (१९:१०)।

ओजरानी उतुपाड पै तहकैसिउ

१ प्राइँए गेखालाव ताव भरी कुधुए कागतत चरैःन्या उदिम दाद नैर। २ नोराए यासरो भरी डादाकिन ज़ येसुस लिद ओयेन रैंःवर ओपाँ सथैज्यावराए ल्योनी ज़ सर्द नैर। ३ गेडैताव थियोफिलस, डा ब डादाकिन ज़ बनै चावस तहकैद प्राइँ पाँ भरी खिम्द डानै, सोनो नजूनी तोबो ओमेलास ताव पाँ सन्या युँ डादोके। ४ हो ताकिन नँलाई है दासिउ पाँर साचो ज़ ओल्यो लिन्या सैन्या नले।

जकरिया सोनो एलीसिबानी

५ यहूदियालाव राजा हेरोदए ओपालाक अबिया थरलाव तोबो पुजारी जकरिया यादोज्याव उलिज्याव। नोए ओज्या ब हारून पुजारीए ओखलकलाव ज़, उमिन एलीसिबा ओल्यो। ६ नोनी ज्या-री ज़ परमेस्वरए ओड़ाक धर्मलाव येन दाद निजुनी निझाःज्याव, परमेस्वरए ओकानुन ब माबिरैद ज़ निदोज्याव। ७ खाली एलीसिबा जर्मननी ज़ थारी ओल्योए नोनी निजार तोबो ब यामालिज्याव। नोनी नेब्लो ज़ निबेला बाद सेर्द जूचासूद निलिज्याव।

परमेस्वरए ओचाकर्या यूहन्नाए उजूनी ओपाँव

8तच्छा जकरिया परमेस्वरए ओड़ाक पुजारी येन ओदोज्याव। हो साता भरिल ध्यान झिमलाव सेवा दान्या नोए ओखलकराए यापाला ओल्यो। 9 पुजारीराए याचलन मिताव परमेस्वरए ओध्यान झिमल धुप झाःन्याए जूनी गोला याझाःक जकरिया परिके। 10 नो उजील पसिद धुप ओझाःज्याक उपुर्काव मिँ भरिए लाँःक पोंखारिउ ज़ यानैज्याव। 11 नल उलिज्याक परमेस्वरए ओचाकर्यालाई धुप ओझाःज्याव पोए ओवोर्दा च्याँःसिद उलिज्याव रँःक्यो। 12 नोलाई रँःद जकरियाए उयुँ स्यासे सतेद बनै छेके। 13 नाःत ज़ परमेस्वरए ओचाकर्याए, “नँ ताछेनी जकरिया, नपोंखारिज्याव परमेस्वरए थैक्यो। है जैद नज्या एलीसिबाए ज़ा तोबो दैरिज्याव। नँ नोए उमिन यूहनना नैदियो। 14 नो उजर्मिक नयुँ बनै होलाँ ताद रेंन्या नले। छुतर ब रेंन्या लेर, 15 काराव ल्यो ताकिन नो परमेस्वरए ओड़ाक घेप्पा मिँ थोरिन्या ले। नोए जिम्जाकिन ज़ मद छोकोरा जात ज़ ओन्या माले। नो ओआमाए उफूल ज़ छैव पुरुस दैरिज्याव। 16 नोए इस्राएलीरालाई याप्रभु परमेस्वरए ल्योदा कुधुलाई ज़ यायुँ फर्केद याएरिज्याव। 17 नोए एलियाए ओसक्ती ओगेर रैद हरिज्याव ख्रीसए ओड़ादा बाद होए उजूनी मिँरालाई तयार याजैरिज्याव। बाबुरालाई याज़ारास यासखैरिज्याव, पापीरालाई ब धर्मलाव येमल याझाःरिज्याव,” है दोक्यो।

18हाःत ज़ जकरियाए परमेस्वरए ओचाकर्यालाई, “आव भरी डा कै जैद पतिन्या? डा डासेरधुके, डाज्या ब जूचासधुके,” है ओदोक ते, 19 परमेस्वरए ओचाकर्याए, “डा एकतार परमेस्वरए ओड़ाकाव च्याँःसिज्याव गब्रिएल ज़। नल्योदा आव चाव था सथैना परींद नैनाव। 20 डालाई नमापतिनाव प्राइँना आव है डादीव

याका भरी ओमातावा पै नँ लाता ताद मापाँधुन्या तान्या नले। डा है डादीव पाँ थिक हो बेलाक ज़ योःन्या ले,” है दोक्यो।

21हाः बेलाक नो लाँःकाव लिज़्यावराए ‘काता ओदोव?’ लिद जकरियालाई कींद यानैज़्याव। 22 बल्ल बल्लड नोराए ल्योड पुलुस्द नोरास काता ज़ मापाँधुद उकुइए सान दाद ओरायोए नोराए, “आवए ते ध्यान झिमल परमेस्वरए ओदर्सन ओदैव ची ओल्यो,” है लिकेर।

23जकरिया ध्यान झिमलाव सेवा दान्या ओपाला ओयोवत उझिमदा बाके। 24 नाःकिन ज़ ओज्या एलीसिबा ज़ा दैन्या ताद पाँच मैना भरी आदा होदा माबाद उझिमल ज़ लिद, 25 “मिँराए डालाई अइज फ्याःके है यादाँदी ब परमेस्वरए डालाई उयुँ नाद ज़ा दैन्या जैनाक्यो,” है उलिज़्याव।

परमेस्वरए ओचाकर्या येसुए उजूनी ओपाँव

26एलीसिबा छ मैना ओतावत परमेस्वरए फरी ओचाकर्या गब्रिएललाई ज़ गालील खन्दलाव नासरत सहरल 27 तोबो कन्या लुजाए ल्योक परीक्यो। नो लुजालाई भर्जा दाऊदए ओथोलाव योसेफ यादोज़्यावत निद यानैज़्याव। नोए उमिन मरियम ओल्यो।

28परमेस्वरए ओचाकर्या ओल्योक बाद, “जेरो प्राईरानी असिक दैव मेंमा, परमेस्वर नँस ज़ लिज़्या,” है ओदोक ते, 29 ‘आव काता ओपाँव ओताव?’ लिद उयुँ काता माँःती जैक्यो। 30 नो चाकर्याए फरी, “ताछेःनी मरियम, परमेस्वरए उयुँ नल्योदा गराँद ले। 31 नँ गर्बवती ताद खेपा ज़ा तोबो नदैरिज़्या। नोए उमिन येसु नैदियो। 32 नो बनै घ्योःव मिँ ताद माहान परमेस्वरए ओजा ज़ लिद थरैरिज़्यार। नोलाई परमेस्वरए, ओल उपुर्खा दाऊदए ओराज्या चलैन्या जैरिज़्याव। 33 है जैद याकूबए ओथोलावराए याडैताव ज़ ताद नोए ओराज्या खर्क ज़ खेमन्या माले,” है दोक्यो।

34 हा:त ज़ मरियमए, “आव भरी कै जैद तान्या? डा आ:पै कन्या ज़ डालिज़्या,” है ओदोक ते, 35 नो चाकर्याए, “नँ नक्याँत परमेस्वरए छैव उपरूस हुद माहान परमेस्वरए ओसक्तीनी ज़ा नदैरिज़्या। है जैद नो छैव पुरूसनिकाव भाउज़ालाई परमेस्वरए ओज़ा ज़ है दान्या लेर। 36 अछादी नँ नक्याँदाडाव एलीसिबाए पाला जूचासूद ब ज़ा दैन्या ताद ले। नो खर्क ज़ ज़ा मादैव है यादोज़याव एलीसिबाए उफूलाव ओज़ा छ मैना ताधुके। 37 परमेस्वरए ओमादोधुव काता ज़ माले,” है ओदोक ते, 38 मरियमए, “डा परमेस्वरए ओबाँदानी ज़। है नलिज़्याव मिताव ज़ ओताक,” है ओदोव प्राईना ज़ परमेस्वरए ओचाकर्या पुलुसूद बाके।

मरियम एलीसिबाए उज़िमदा दैसिना ओबाव

39 तछा छींनी मरियम ज़ा:सिद लाला लुलु यहूदियालाव गॉल जकरियाए ओनाखारल बाके। 40 जकरियाए उज़िमल पसिद मरियमए एलीसिबालाई जेरो है ओदोज़याव 41 ओथैव प्राईना एलीसिबाए उफूलाव ओज़ा ज़ोके। हा:त ज़ एलीसिबा छैव पुरूसए ब्याल्द, 42 बनै रेंद, “मेमा भरिरानी नँ असिक दैव ज़ नलिज़्या। नफूलाव नज़ा ब असिक दैव ज़ तारिज़्या। 43 काता डालाई आ: परमेस्वर दाइनो ओताव, डाप्रभुए ओआमा डाल्योक नहुव। 44 नँ नया:नी जेरो है नल्यो प्राईना ज़ डाफूलाव डाज़ा रेंद ज़ोके। 45 नँ परमेस्वरए है उलिज़्याव भरी सयो:द्यान्या ज़ ले लिद नयुँ हुबो मेमा धन्याकाव नलिज़्या,” है लिद पाँके।

मरियमए ओपाँ

46 मरियम नो भरी थैद है लिके,
 “डा डाप्रभु परमेस्वरए उमिन बनै सघ्यो:द डाएज़्या।
 47 डालाई बाँचैज़्याव परमेस्वरस बनै रेंद ज़ डापाँज़्या।
 48 नोए डा इताव ज़िमज़ा ओबाँदानीलाई मामें:द डाल्योदा उयुँ

याल्के।

ननी ज़ मिंराए डालाई पिरी पिरी पै असिक दैव थनैनारिज़्यार।

49डाज्जूनी आःल्दिउ येन दाद्याज्याव माहान परमेस्वरए उमिन बनै छैव लिज़्या।

50परमेस्वरलाई रँःद छेःज्यावरालाई ओल पिरी पिरी पै उयुं नाज्या।

51नोराए जूनी उकुइए बनै सक्तीलाव येन दाद्याव ज़ नैज्याव।

यायुंल सघ्योःसिज्यावरालाई ते चितराँ पुतराँ जैद यामिन समैद याएज्याव।

52घेपुपारालाई यासिंहासनतिन सेल्द नल ज़िम्ज़ारालाई याझाःज्याव।

53करेज्यावरालाई चाव चाव याद याकरे सैःद याएज्याव।

साहुरालाई ते रितो ज़ याजैज्याव।

54ओय्राकार मामेःद ओसेवा दोज्याव इस्राएली उमीरालाई सघैव ज़ यानैज्याव।

55है जैद अब्राहाम सोनो ओथोरालाई है ओरादोव मिताव याल्योदा एकमन्या उयुं गराँव ज़ लिज़्या।”

56मरियम एलीसिबाए उझिमक ओल्यो सोमैना ओतावत उझिमदा ओलद बाके।

रील सछैज्याव यूहन्ना उजर्मिउ

57एलीसिबाए ज़ा दैन्या ओमास ओयोःवत खेपा ज़ा दैक्यो।

58 ‘परमेस्वरए उयुं याल्द अचम्बलाव येन दोदिक्यो दी’ लिन्या थैद ओलापजीकावर सोनो ओक्याँदाडावर बनै रेंकेर। 59 नो भाउज़ा उजर्मिउ आथ दिनत याचलन मिताव क्याल्न्या सरस जैन्याए जूनी प्राइँ दुप्सिद उमिन ब ओबाबुए उमिन स्यासो ‘जकरिया’ नैद्याव पैकेर। 60 खाली ओआमाए भैःद मायाद, “माःक, आवए उमिन यूहन्ना तारिज़्या,” है ओरादोक ते, 61 नोराए, “नथोल इताव मिन

ते माले सानी,” है दोकेर। ⁶² फरी नोराए ओबाबु जकरियालाई सान दाद्याद, “नो नज़ाए उमिन काता नैद्याव नपैज़्याव?” है यादोक ते, ⁶³ जकरियाए फल्या तोबो रैव परींद नत, ‘आवए उमिन यूहन्ना’ लिद सर्द याएक्यो। नोराए निताव रँ:द प्राईं ज़ अचम्ब ताकेर। ⁶⁴ हो प्राईंना ज़ जकरियाए ओसेर पलास्सिद पाँधुन्या ताद परमेस्वरलाई धन्या धन्या है ल्यो ज़ लिके। ⁶⁵ नो हुद लिज़्यावर नो भरी रँ:द अचम्ब ताद छे:द नो पाँ भरी यहूदिया गों जीदा प्राईंदा ज़ थास्के। ⁶⁶ ‘नो भाउज़ा ओघ्यो:क किताव तान्या ओताव?’ लिद थैज़्याव भरिए यार्युँल है लिकेर। नोए ओक्याँत परमेस्वरए बास दाद ओनैज़्याव ओल्यो लिन्या थरैकेर।

जकरियाए ओपाँ

⁶⁷ओबाबु जकरिया छैव पुरुसए ब्याल्द अइ लिद पाँके,
⁶⁸“इसाएलीराए याप्रभु परमेस्वरए उमिन बनै ओघ्यो:क।
 गे उमींराए गेल्योक हुद बाँचैसिक्यो।
⁶⁹ओनोकोर दाऊद राजाए ओथोल गेलाई जोगोइद बाँचैन्या तोबो
 झें:स्या उथैद नैद्यासिउ।
⁷⁰नोए उज्ज़नी परमेस्वरए भा:किन ज़ छैव उमीं अगमबक्तराए
 याया:नी पाँव ज़ उलिज़्याव।
⁷¹नोराए यापाँ आव ब लिज़्या — ‘गेसुतुरराए ल्योनी जोगोइद,
 गेलाई सोज़्यावराए याकुइनी ब पाथस पले:न्या ले।’
⁷²है जैद गेसाखा पुर्खाराए ल्योदा उर्युँ गराँद,
 नोरालाई ओरायो छैव बाचालाई सयो:द्याव ज़ नैज़्याव।
⁷³नो बाचा गेपुर्खा अब्राहामलाई तोबो किर्या झा:द —
⁷⁴⁻⁷⁵‘गेलाई गेसुतुरराए ल्योनी पले:न्या,
 सोनो गेजिउ भरी ओलस लिद उर्युँलाव मिताव छैव येन सुलाई रँ:द
 ब माछे:द ज़ दान्या जैद नैद्यासिउ।’

76 अब ते नँ डाज़ा यूहन्ना, नँलाई माहान परमेस्वरए अगमबक्ता थरैनिरिज़्याव।

नँ हरिज़्याव प्रभुए ओड़ा ओड़ा बाद ओयेम बनैद्यान्या नले।

77 सोनो परमेस्वरए उमीं इस्राएलीरालाई 'जेपाप क्याल्द याचिरिज़्याव' लिद अजम्बरी जुनील बान्या येम सतैद्यान्या नले।

78 गेल्योदा परमेस्वरए उयुँ ओगराँवनी स्वर्गताव झार झारो ज़गै ब गेल्योक ज़ हरिज़्याव।

79 नो उहुवत सिन्या सजालाव चुम चुमोल लिज़्यावराए याक्याँत पलाँव जैद्याद गेलाई मनी परमेस्वरए ल्योदा खैन्या येम सरैःद्यासिरिज़्याव।”

80 नो भाउज़ा यूहन्ना ओघ्योःनावत ओसक्ती ल्यो तानाके। इस्राएलीराए याड़ाक ओमासतैसिवा पै बनड ज़ लिके।

2

येसु उजर्मिउ

1 हो बेलाक तछा रोमी माहाराजा अगस्तसए रोमी राज्या भरिलाव जनसंख्या सर्न्या हुकुम याएक्यो। 2 नो उसंक्ताव यासरो जनसंख्या सिरिया खन्दलाव हाकिम कुरेनियसए ओपालाक ओल्यो। 3 यामिन सर्सिना प्राइँ ज़ सु सु यासाखा पुर्खार याजर्मिउ सहर सहरदा ज़ बाकेर।

4 है जैद योसेफ पाला उलिज़्याव गालील खन्दलाव नासरतनी यहूदिया खन्दलाव बेथलेहेम यादोज़्याव दाऊद राजाए ओनाखारल उमिन सर्सिना बाके, काराव ल्यो ताकिन योसेफ दाऊदए ओथोलाव ज़ ओल्यो। 5 निद यानैज़्याव ओज्या मरियमलाई ब ओलस ज़ लाँक्यो। नो बेलाक मरियम गिसो क्याँस उलिज़्याव। 6 बेथलेहेमल निलिज़्याक ज़ सुत्क्याल्नी तान्या बेला ताद, 7 जेथा ज़ा दैक्यो। नो उजर्मिउ प्राइँना ज़ दालए दाल्द बाछाराए छी ज़्यान्या पोल

नैक्यो। भत्तील लिन्या पो निमादैवए गोथल निलिज़्याव।

परमेस्वरए ओचाकर्यार सोनो गावलार

8हो छचाम रील नो नाखारकिन पाखाड तोबो बाँल गावलाराए बेधार तबगाल खर्केद यारानैज़्याव। 9 हाः बेलाक ज़ परमेस्वरए तोबो ओचाकर्या उमँःजानी गावलाराए याल्योक सरैःसिहुद परमेस्वरए ओज़गै ब प्राइँदा ज़ ज़गै जैक्यो। नो रँःद बनै छेःकेर। 10 हाःत ज़ नो चाकर्याए, “जे ताछेःच्यो, डा जेलाई बनै चाव था रैद नैद डाय़ाचिए। नो थात मिँ भरी बनै रँन्या लेर। 11 आछिम दाऊदए ओनाखारल इस्राएलीरालाई बाँचैन्या तोबो जर्मिद ले। नो जर्मिउ प्रभु स्त्रीस ज़। 12 जे नोलाई सरेसून्या सरेस, नो भाउज़ालाई बाछाराए छी ज़यान्या पोल दालए दाल्सिउ सेपूसिउ दैन्या जेले,” है यादोक्यो। 13 हाःत ज़ नो चाकर्याए ओनैर बनै माहोल्या हुद परमेस्वरए ल्योदा बनै खुसी ताद है लिकेर, 14“स्वर्गताव परमेस्वरलाई ज़गै मगै ओताक, मानुवाताव उयुँलाव मिताव मिँराए यायुँ ब होलाँ ओताक।”

गावलाराए येसुलाई याचिऊनाव

15नो परमेस्वरए ओचाकर्यार स्वर्गदा याबाव छीनी नो बेधा गावलाराए या याल, “दे, गे बेथलेहेमदा गेबा, प्रभुए है ओदासिउ गेचिऊना,” है लिद, 16 लाला लुलु नाखारल धोंःनाद मरियम सोनो योसेफनिलाई यारादैकेर। नो भाउज़ालाई ब बाछाराए छी ज़यान्या पोल सेपूसिउ दैकेर। 17 है जैद आव रँःद नो भाउज़ाए उजूनी परमेस्वरए ओचाकर्याए है ओरादोव भरी है यारादोकेर। 18 नो गावलाराए यापाँ थैव भरी प्राइँ ज़ अचम्ब ताकेर। 19 मरियम ते नो पाँ भरी उयुँल नैद खामिक्यो। 20 नो गावलाराए नो चाकर्याए है ओरादोव मिताव याथैव यारँःवए परमेस्वरए उमिन सघ्योःद्याद ओल्योदा बनै खुसी ताद रेंए रेंए ओल्द बाकेर।

येसुलाई ध्यान ज़िमल यालाँव

21नो भाउज्जा उजर्मिउ आथ दिनत क्याल्न्या सरेस जैन्या छ्याम उमिन ब येसु नैदिकेर। नो मिन ओआमाए उफूल ओमासिर्जिद ज़ परमेस्वरए ओचाकर्याए नैद ओयो मिन ज़।

22मोसाए ओकानुनलाव मिताव मरियम सुत्क्याल्नी चोखोइसिन्या बेला ओयोवत यरूसलेमलाव ध्यान झिमल बाद येसुलाई परमेस्वरए उमिनत नैकिनी। 23 परमेस्वरए ओकानुनलाव सर्सिउ मिताव, “झाताव जर्मिउ खेपा भरी परमेस्वरए उमिनत नैव ज़ परिए।” 24 हो छ्याम ज़ फरी ओआमा चोखोइसिन्याए जूनी परमेस्वरए ओकानुन मिताव, कुइतम तादी ब परिवा तादी ब तोजोर लाँद चरैःव उपरिज्याव। हो मिताव ज़ नोनी लाँद चरैःकिनी।

सेरो सिमियोनए ओपाँ

25हो बेलाक यरूसलेमल तोबो सिमियोन यादोज्याव उलिज्याव। नो मिँ चाव धर्मी मिँ ओल्यो। इस्राएलीरालाई बाँचैना हुन्यालाई कींव ज़ ओनैज्याव। नोस परमेस्वरए छैव उपरूसए बास दाद ओनैज्याव। 26 नोए ‘परमेस्वरए ओजा ख्रीसलाई डामारैःवा पै सिन्या डामाले’ लिद परमेस्वरए छैव उपरूसनी सैद ओनैज्याव। 27 है जैद तछा नोलाई परमेस्वरए उपरूसए ध्यान झिमल लाँक्यो। हो बेलाक ज़ येसुलाई ब ओबाबु सोनो ओआमानी कानुन मितावनी परमेस्वरए उमिनत नैन्याए जूनी ध्यान झिमल हुद यालिज्याव। 28 सिमियोनए नो भाउज्जालाई उरैःव प्राइँना ज़ नोलाई ओघोइँल छींद अइ लिद परमेस्वरलाई धन्याबाद चरैःक्यो,
29“अ परमेस्वर, अब ते है नदाँव मिताव ताके।
अब ते आव संसारनी डा ननोकोरलाई खुसीस बिदा नयाँदी ब ताए।
30संसारलाई बाँचैन्याए जूनी नपरीव मिँलाई आव डामीए ज़ डारैःके।
31नोलाई प्राइँ मिँराए याडाक तयार जैद नराएके।

32 छुत जातलावरालाई आवए ओक्याँनी ज़ नयेन सतैद नराएरिज़्या। सोनो नमीं इस्राएलीरालाई ब आवए ओक्याँनी ज़ याइज्यात नैद नराएरिज़्या।”

33 येसुए ओबाबु ओआमानी सिमियोनए ओपाँ भरी थैद बनै ज़ अचम्ब ताकिनी। 34 नकिन सिमियोनए नोरालाई असिक याद ओआमा मरियमलाई, “इस्राएलीराए याख्वार्ल आव भाउज़ाए ओपाँत कुधुए यायुँ तोल्रिज़्या, कुधुए यायुँ थ॰रिज़्या। परमेस्वरए आव भाउज़ालाई ओल ओसरेस मिताव जैद नैव। नोलाई कुधुए यामाभैःज्यावए, 35 यायुँलाव पाँ भरी ननी ज़ रैःरिज़्या। नयुँलाई पाला तरवालीए आनी हुनी सफेर्सिउ मिताव जैदीरिज़्याव,” है दोक्यो।

हन्नाए ओपाँ

36 हो बेलाक ज़ ध्यान झिमल आसेरए ओथोलाव फनुएलए ओज़ा बनै जूचासो तोबो हन्ना यादोज्याव मनी उलिज़्याव। नो ब अगमबादिनी ज़ ओल्यो। नोए रे ओदोव सात बर्सत ज़ ओरे सिद, 37 चौरासी बर्स पै बिनु रे ज़ ध्यान झिमल लिद उपासिद लाकनी रील परमेस्वरलाई पोंखारिउ ज़ ओनैज्याव। 38 नोए ब येसुलाई उरैःव प्राइँना परमेस्वरलाई धन्याबाद चरैःद यरूसलेम सहरलाव ‘गेलाई बाँचैज्याव हरिज़्या’ लिद कींद नैज्यावरालाई येसुए उजूनी हो छ्यामकिन सथैव ज़ यानैक्यो।

39 योसेफ सोनो मरियमनी परमेस्वरए ओकानुनलाव ध्यान झिमलाव यायेन भरी ओखेमोत निझिम गालीललाव नासरतदा निज़ा लाँद बाकिनी। 40 नो भाउज़ा घ्योःनाद ओर्सा ब ज़्यासनाके, उबुद्धी ब छिपनाके। परमेस्वरए ओअसिक ब ओक्याँत ज़ उलिज़्याव।

येसु बाह बर्स ओताव

41 येसुए ओबाबु ओआमानी यरूसलेमलाव निस्तार पर्व मानिन्याए

जूनी सालकाव तखेप निबाजूयाव। 42 तछा येसु बाह बर्स ओतावत सालकाव याबाजूयाव मिताव ज़ फरी ब बाकेर। 43 नो पर्व भरी ओखेमोत याझिमदा याबाजूयाक येसु यरूसलेमल ज़ उरहिउ ओल्यो। ओबाबु ओआमानी मासैकिनी। 44 नोनी 'गेनैरास हुजूयाखेहो' लिद तछाकाव येम भरी ज़ बाकिनी। छीनी यानैराए ल्यो जीदा सापूद, 45 निमादैक ते सापे सापे यरूसलेमदा ज़ ओलूद बाकिनी। 46 सोंलात ध्यान झिमल घेपूपा घेपूपा धर्मगुरुराए खार्ल चुसिद यापाँ थैद ओअर्थ ल्यो पाँ तीद पलासो ओरापरीजूयाव रँ:किनी। 47 नलाव थैजूयाव भरी येसुए उबुद्धीसकाव ओपाँर थैद प्राइँ ज़ अचम्ब ताकेर। 48 ओबाबु ओआमानी ब निताव रँ:द अचम्ब ताद ओआमाए, “काराव डाज़ा आ: दुख नयासिनो? गिन नँलाई सापूद गिन्चूया सिके,” है ओदोक ते, 49 येसुए, “जिन काराव डालाई जिन्सापूनाजूयाव? डा डाबाबुए उझिमल ल्यो परिए लिन्या जिन्मासैए रो?” है निदोक्यो। 50 नोनी है उनिदोव पाँए ओअर्थ मातीधुकिनी।

51 येसु ओबाबु ओआमानिस नासरतल बाद नोनी निपाँल ज़ लिके। ओआमाए आव पाँ भरी उयुँल खामिउ ज़ नैक्यो। 52 येसुए ओसा ब छिपूनाके, उबुद्धी ब झन ज़ पुलुसूनाके। परमेस्वरए सोनो मिँराए बनै चाव ज़ रँ:केर।

3

रील सछैजूयाव यूहनूना

(मत्ती ३:१-१२; मर्कूस १:१-८; यूहनूना १:१९-२८)

1 माहाराजा तिबेरिअसए राज्या ओदोव पन्ध्र बर्स ओतावत पन्तियस पिलातस यहूदियालाव हाकिम उलिजूयाव। नो बेलाक हेरोद गालील खन्दलाव राजा उलिजूयाव। ओभाइ फिलिप ईतुरिया सोनो त्राखोनितिस खन्दलाव राजा उलिजूयाव, फरी लुसानियास

अबिलेने खन्दलाव राजा उलिज्याव। ² हन्नास सोनो कैयाफानी फरी ध्यान झिमलाव पुजारीराए याघेपानी निलिज्याव।

नो बेलाक ज़ परमेस्वरए ओपाँ जकरियाए ओज़ा यूहन्नाए ओक्याँत हुके। नो मिँ बनल उलिज्याव। ³ हो बेलाकिन ज़ नोए मिँरालाई, “जेपापलाई रासूद, जेयुँ परमेस्वरए ल्योदा फर्केद रील सछैँसिचिके। हो ताकिन ची जेपापर क्यालूसिद परमेस्वरस खैवर तान्या जेले,” है लिद सथैए सथैए यर्दन भै याक प्राइँदा ज़ हुके।

⁴ किताव यसैया अगमबक्ताए ओसरो, हो मिताव ज़ ताके। होए ओसरो आव ज़,

“बनल तोबोए ओर्गा अइ लिद यासथैरिज्याव,

‘हुरिज्याव प्रभुए ओयेम बनैद गाँत्या गुँतीलाई सदाँचिके।

⁵झें:वर तै:द घैराल सब्यालचिके, गाँत्या गुँतीलाई सदाँद काँ काँ कुँ कुँ सरिपचिके।

⁶हा:किन मिँ भरिए परमेस्वरनी बाँचैना हुवलाई रँ:न्या जेले।”

⁷हो मिताव ज़ यूहन्नाए ल्योक रील सछैँसिना हुव माहोल्यारालाई, “ए घुलए ओथोर, जे परमेस्वरए उरिसनी धों:न्या सुए है ओदाचिउ?

⁸जे साचो ज़ परमेस्वरए ल्योदा जेयुँ फर्केन्या ल्यो ताकिन साचो हो मिताव येन ब दाव ताके। जे फरी, ‘गेपुर्खा अब्राहामनी ज़ परमेस्वरए ओज़ार ताद गेले’ है जेमालिदी ब ताए। डा साचो है डादाचिज्या, परमेस्वरए सीर लुँरानी तादी ब अब्राहामए ओथोर याजैधुव। ⁹किताव तोबो मिँए चाव सै माझा:ज्याव सीर धलैद में:ल ओराख्याज्याव, हिताव ज़ परमेस्वरए ब धलैन्याए जूँनी ओरोवा सीए ओजराक झा:द नैव।”

¹⁰हा:त ज़ नो माहोल्याराए, “हिताव ताकिन ते गे कै लिन्या ओताव?” है यादोक ते, ¹¹यूहन्नाए, “जे जोस नेब्लो क्वा उलिकिन माल्योलाई तोबो ओयोक, सोनो ज्याव उलिकिन माल्योलाई ब

ओयोक्क,” है यादोक्को। 12 सिर्मा स्योःज्यावर मनी सछैंसिना हुद, “गुर्बा, गे कै लिन्या?” है यादोक्के ते, 13 यूहन्नाए, “जेलाई खा स्योःन्या है दाद नैचिर, हाःज स्योःच्यो, आगल्या ताराहाइच्यो,” है यादोक्को। 14 फरी सिपाईराए पाला, “गे कै लिन्या?” है यादोक्के ते, यूहन्नाए, “जे कोभालाई सचेःद धुत खत लैद हाइद ताराज्युच्यो। जेतलब खा लिज्या हाःत ज़ लिच्यो,” है यादोक्को।

15 हाः बेलाक प्राईं मिंराए यूहन्नाए ओपां थैद, “आव ते आस दाद कीद गेनैज्याव ख्रीस ची सा,” है लिकेर। 16 यूहन्नाए नो यापां थैद, “डा जेलाई रील सछैंज्याव वाज ची। डा डाछींनी डाकिन ओसक्ती ल्यो तोबो हरिज्या। डा होए ओपोलाए ओचें पलान्या स्यासो ब डामाले। होए परमेस्वरए छैव उपरूस सोनो मेंःनी सछैंचिरिज्याव। 17 होए गेदा भरी नाडलील च्यापूद चाव भरी धन्सारल झाःद पुल भरिलाई खर्क ज़ माजिपतिन्या मेंःल मुन्या ले।”

18 इताव अर्थर कुधु ज़ झाःद यूहन्नाए मिंरालाई परमेस्वरए ओपां यासथैक्को। 19 हाः बेलाक राजा हेरोदए, ओभाइए ओज्या हेरोदियासलाई रैद ओनैज्याव। यूहन्नाए, “नभाइए ओज्या नँ रैन्या माताए। नँ प्राईंल ज़ माचाव येन नदोज्या,” है ओदोवए, 20 यूहन्नालाई इयालखानाल झाःक्को। है जैद हेरोदलाई पापए तर्त पाप चाःसिके।

येसु रील ओसछैंसिउ

(मत्ती ३:१३-१७; मर्कूस १:९-११)

21 यूहन्ना इयालखानाल ओमाबाद मिं भरी प्राईं यूहन्नानी यासछैंसिज्याक येसु पाला सछैंसिके। येसु रील सछैंसिद ओपोंखारिज्याक नम फैसिद, 22 परमेस्वरए छैव उपरूस कुइतम मिताव भुहुद येसुए ओक्यांत चुसिके। हाःत ज़ नमतिन तोबो गा अइ लिद हुके, “नँ डायुंलाव डाजा ज़। नँलाई रँःद डायुं होलाँ ताज्या।”

येसुए ओसाखा पुर्खार

(मत्ती १:१-१७)

23 येसु ओयेनत उथूसिज्याक तीस बर्सवाकाव ओल्यो। नोलाई
मिराए योसेफए ओज्जाल यागनिज्याव।

योसेफए ओबाबु एली,

24 एलीए ओबाबु मत्तात,

मत्तातए ओबाबु लेबी,

लेबीए ओबाबु मल्की,

मल्कीए ओबाबु यान्ना,

यान्नाए ओबाबु योसेफ,

25 योसेफए ओबाबु मत्ताथियास,

मत्ताथियासए ओबाबु आमोस,

आमोसए ओबाबु नहूम,

नहूमए ओबाबु इसली,

इसलीए ओबाबु नग्गै,

26 नग्गैए ओबाबु माथ,

माथए ओबाबु मत्ताथियास,

मत्ताथियासए ओबाबु सेमैन,

सेमैनए ओबाबु योसेख,

योसेखए ओबाबु योदा,

27 योदाए ओबाबु योआनन,

योआननए ओबाबु रेसा,

रेसाए ओबाबु यरूबाबेल,

यरूबाबेलए ओबाबु सालतिएल,

सालतिएलए ओबाबु नेरी,

28 नेरीए ओबाबु मल्की,

मल्कीए ओबाबु अदी,

अद्दीए ओबाबु कोसाम,
 कोसामए ओबाबु एलमादम,
 एलमादमए ओबाबु एर,
 29एरए ओबाबु यहोसू,
 यहोसूए ओबाबु एलीएजर,
 एलीएजरए ओबाबु योरीम,
 योरीमए ओबाबु मत्तात,
 मत्तातए ओबाबु लेबी,
 30लेबीए ओबाबु सिमियोन,
 सिमियोनए ओबाबु यहूदा,
 यहूदाए ओबाबु योसेफ,
 योसेफए ओबाबु योनान,
 योनानए ओबाबु एल्याकीम,
 31एल्याकीमए ओबाबु मलेआ,
 मलेआए ओबाबु मिन्ना,
 मिन्नाए ओबाबु मत्ताथा,
 मत्ताथाए ओबाबु नातान,
 नातानए ओबाबु दाऊद,
 32दाऊदए ओबाबु यिसै,
 यिसैए ओबाबु ओबेद,
 ओबेदए ओबाबु बोअज,
 बोअजए ओबाबु सल्मोन,
 सल्मोनए ओबाबु नहसोन,
 33नहसोनए ओबाबु अम्मीनादाब,
 अम्मीनादाबए ओबाबु आराम,
 आरामए ओबाबु हेसोन,
 हेसोनए ओबाबु फारेस,

फारेसए ओबाबु यहूदा,
 34यहूदाए ओबाबु याकूब,
 याकूबए ओबाबु इसहाक,
 इसहाकए ओबाबु अब्राहाम,
 अब्राहामए ओबाबु तेरह,
 तेरहए ओबाबु नाहोर,
 35नाहोरए ओबाबु सरूग,
 सरूगए ओबाबु रऊ,
 रऊए ओबाबु पेलेग,
 पेलेगए ओबाबु एबेर,
 एबेरए ओबाबु सेलह,
 36सेलहए ओबाबु केनान,
 केनानए ओबाबु अर्पसद,
 अर्पसदए ओबाबु सेम,
 सेमए ओबाबु नोआ,
 नोआए ओबाबु लेमेख,
 37लेमेखए ओबाबु मतूसेलह,
 मतूसेलहए ओबाबु हनोक,
 हनोकए ओबाबु येरेद,
 येरेदए ओबाबु महलालेल,
 महलालेलए ओबाबु केनान,
 38केनानए ओबाबु एनोस,
 एनोसए ओबाबु सेत,
 सेतए ओबाबु आदम,
 आदम फरी परमेस्वरनिकाव ओल्यो।

4

सैतानए येसुलाई ओजाँचिउ
 (मत्ती ४:१-११; मर्कूस १:१२-१३)

1 येसु यर्दन भैल ओसछैसिउत छैव पुरुसए ब्याल्द ननी पुलुस्द ओबाज़्याक नो पुरुसए तोबो साईसुईव पोड लाँक्यो। 2 नल चालीस दिन भरी सैतानए येसुलाई झुकैन्याए जूनी जाँचिउ ज़ नैक्यो। ना: भरिल येसु काता ज़ माज़्याद लिके। चालीस दिन ओतावत ओकरेए माधुनाक्यो। 3 हा:त ज़ सैतान ओल्योक हुद, “नँ साचो ज़ परमेस्वरए ओज़ा ताकिन आव लुँलाई भरेस जैके,” है ओदोक ते, 4 येसुए, “धर्मसास्त्रल अइ लिद सर्सिउ लिज़्या, ‘मिँलाई ज़्यावए वाज़ माडाव,’ ” है दोक्यो। 5 नकिन सैतानए तोबो झे:व पोत लाँद संसारलाव राज्या भरी तोचोइत ज़ सतैद्याद, 6 “नो नरँ:ज़्याव राज्या भरी ज़गै मगैवस नमीं ज़ जैद डार्इरिज़्या। आव भरी डाकुइत ज़ लिज़्या, जोलाई डा याव डापैज़्या होलाई ज़ डाएधुइ। 7 है जैद नँ डाडाक फुलुप्सिद धो नदाँकिन नो भरी नमींर ज़ तान्या लेर,” है दोक्यो। 8 ना:त ज़ फरी येसुए, “धर्मसास्त्रल अइ लिद सर्सिउ लिज़्या, ‘नप्रभु परमेस्वरए ओडाक फुलुप्सिद होए ओसेवा वाज़ दान्या ताए,’ ” है दोक्यो। 9 सैतानए फरी येसुलाई यरूसलेमल लाँद ध्यान झिमए उतुपात बैद, “नँ साचो ज़ परमेस्वरए ओज़ा ताकिन आतिनी मेल ज़ो:निके। 10 धर्मसास्त्रल अइ लिद सर्सिउ लिज़्या, ‘नँलाई बाँचैन्याए जूनी परमेस्वरए ओचाकर्यार परींदीरिज़्याव। 11 नोराए नँलाई छींद नखँ लुँत बजारिउ यान्या मालेर,’ ” है ओदोक ते, 12 येसुए, “धर्मसास्त्रल आव ब सर्सिउ लिज़्या, ‘नप्रभु परमेस्वरलाई जाँचिन्या माताए,’ ” है दोक्यो। 13 सैतानए येसुलाई प्राइँनी ज़ जाँचिद छुत मौका ओमादैवा पै रास्द ख्यानैक्यो।

येसु परमेस्वरए ओपाँ सथैन्यात उथूसिउ

(मत्ती ४:१२-१७; मर्कूस १:१४-१५)

14 हा:त ज़ येसु छैव पुरुसए ओसक्ती दैद गालीलदा ज़ ओल्द बाके। हा:किन येसुए ओयेन नयाल प्राईदा ज़ थासुनाके। 15 धर्मसासुत्र झिम झिमक बाद परमेस्वरए ओपाँ ब प्राईलाई ज़ यासथैक्यो। नो पाँ थैद प्राईए ज़ येसुए उमिन सघ्यो:दिकेर।

येसुलाई ओनाखारनी यापलेव

(मत्ती १३:५३-५८; मर्कूस ६:१-६)

16 नकिन येसु ओल ओघ्यो:व नाखार नासरतल ज़ हुके। एकतारकाव ओदोज़याव मिताव ज़ नासिन्या छयाम धर्मसासुत्र झिमल बाद परमेस्वरए ओपाँ परिन्याए जूनी च्याँ:सिके। 17 नलावराए यसैया अगमबक्ताए ओसरो पोस्तोको एकेर। येसुए नो पोस्तोको फैद नल ओल उजूनी सर्सिउलाई पलेक्यो। नलाव सर्सिउ आव ज़,

18 “परमेस्वरए उपरूस डाक्याँत लिज्या।

गरीबरालाई चाव था सथैन्या डालाई खतैद नैनाव।

कैतल लिज्यावरालाई पुलुसुन्या येम आव ज़ लिद सथैन्याए जूनी,

मारँ:ज्यावरालाई यामी फैद्यान्याए जूनी,

दुखल लिज्यावरालाई रासुन्याए जूनी,

19 सोनो परमेस्वरए ओल उमीरालाई ओराबाँचैरिज्याव था सथैन्याए जूनी परींद नैनाव।”

20 हा:त ज़ येसुए नो पोस्तोकोलाई बन जैद नो याज्यावलाई सोवोलुद्याद चुसिके। नलाव दुप्सिद लिज्याव भरिराए यामी येसुए ओक्याँत ज़ उलिज्याक, 21 येसुए नोरालाई, “आछिमकाव परिद डायचिउ धर्मसासुत्रलाव पाँ जेथैज्याक ज़ यो:के,” है यादोक्यो।

22 नलाव लिज्याव भरिए येसुए ओपाँ बनै चाव थरैद अचम्ब ताद, “काता आव योसेफए ओजा मा:क रो?” है लिद जाँ मापतिकेर।

23 है जैद येसुए नोरालाई, “जे डालाई प्राईए याझा:ज्याव घर्ती

सूयासो जेजैनाजूयाखेहो। नो घर्ती आव ज़ — ‘ए सगराँजूयाव, डादा नक्याँलाई नसगराँधुजूयाव सतैके।’ जे कफर्नहुमल डादोव जेथैव मिताव ‘आव ननाखारल ब दोके,’ है जेदाँजूयाखेहो। ²⁴ है जैद डा जेलाई साचो है डादाचिजूया, अगमबक्तालाई ओल ओनाखारलावराए खर्क ज़ ओमान नैद माएर। ²⁵ जे आव ब चेतैच्यो, एलियाए ओपालाक ब स्मोरिम छ मैना पै नम मावाद बनै घ्योःव अनिकाल उलिजूयाक ओल उलिजूयाव इस्राएल देसल राँदी मेंमार कुधु ज़ याल्यो। ²⁶ हितावत ब परमेस्वरए एलियालाई नोराए ल्योक मापरींद इन सीदोन खन्दलाव सारपत नाखारलाव राँदी मेंमाए ल्योक वाज परीक्यो। ²⁷ फरी एलीसा अगमबक्ताए ओपालाक ब इस्राएल देसल कुरीर बनै ज़ याल्यो। हितावत ब नोरालाई सुलाई ज़ मासगराँद इन सिरिया देसलाव नामानलाई वाज सगराँक्यो,” है यादोक्यो।

²⁸नो धर्मसास्त्र झिमलाव मिँराए येसुए ओपाँर थैद बनै ज़ रसिद, ²⁹थर च्याँःसिद नोलाई नाखारनी पलेद यानाखारलाव दाँदातिन हाँदा ख्याव पैकेर। ³⁰खाली येसु नोराए खानी सिउःसिद बाके।

येसुए माचाव पुरूसलाई ओपलेव

(मर्कूस १:२१-२८)

³¹छींनी येसु फरी गालीललाव कफर्नहुम सहरल झरिद नासिन्या छचाम मिँरालाई परमेस्वरए ओपाँ ओरासथैजूयाव। ³²नलावर येसुए ओपाँ थैद अचम्ब ताकेर, काराव ल्यो ताकिन होए बनै हकस ओरापैजूयाव।

³³नो बेलाक ज़ दुप्सिद यालिजूयाव धर्मसास्त्र झिमल बोःलैजूयाव पुरूसए क्योःद ओनैजूयाव तोबो मिँ उलिजूयाव। नो पुरूस बनै चोइस किद, ³⁴“अ नासरतलाव येसु, गेस नखै काता उलिजूयाव?

गेलाई खेमना नहुव रो? डा नँलाई डासरेस्निज्या। नँ परमेस्वरए छैव उमीं ज़,” है लिके। ³⁵ हाःत ज़ येसुए नोलाई हप्कैद, “इयाउँ तालिनी, आवए ओक्याँतिन पुलुस्द बान्के,” है ओदोव प्राइँना ज़ नो माचाव पुरूसए नो मिँलाई याखार्ल पछारिद कैज माजैद पुलुस्द बाके।

³⁶निताव रँःद नलावर अचम्ब ताद या याल, “आवए ओपाँ किताव ओताव? नाः ओसक्ती ल्यो, नाः ओहक ल्यो। माचाव पुरूसरालाई ओराहपकैक मनी ओपाँर यादोज्याव ची ओल्यो,” है लिकेर।

³⁷हाःकिन येसुए ओदोव येन भरी नजीलाव पो पोड प्राइँदा ज़ थासनाके।

येसुए सिमोनए उमुइँज्युलाई ओसगराँव

(मत्ती ८:१४-१५; मर्कूस १:२९-३१)

³⁸नकिन येसु नो धर्मसास्त्र ज़िमनी पुलुस्द सिमोनए उज्जिमक बाके। नल सिमोनए उमुइँज्यु ओजोरो हुद घ्याँसिद उलिज्याव। नलावराए नो ओजोरो हुवए उज्जनी येसुलाई है दोकेर। ³⁹ है जैद येसु नो ओजोरो हुज्यावए ल्योक बाद नो जोरोलाई उसिडारो प्राइँना ज़ जोरोए रास्द नो मेंमा सोद नोरालाई ज़यावर जैद याएक्यो।

येसुए याजोरो हुवरालाई ओरासगराँव

(मत्ती ८:१६-१७; मर्कूस १:३२-३४)

⁴⁰निमी ओफेरनाव बेलाक नजीलाव याजोरो हुज्याव भरी येसुए ओल्योक यारारैकेर। येसुए नोरालाई उकुइए छापूद प्राइँलाई ज़ यासगराँक्यो। ⁴¹ कुधु मिँराए याक्याँतिन माचाव पुरूसर ब चिर चिर क्रिद, ‘नँ परमेस्वरए ओज़ा ज़’ लिद पुलुस्द बाकेर। नोराए येसुलाई ‘ख्रीस ज़’ लिद यासरेसोए येसुए नोरालाई हप्कैद पाँव ज़ ओमाराएज्याव।

येसुए परमेस्वरए ओपाँ ओरासथैव

(मर्कूस १:३५-३९)

42हो पराःती नम उसँवत येसु तोबो साइँसुइँव पोक बाके। माहोल्याराए येसुलाई खिम्द दैद यास नैन्याए जूनी छुतदा बान्या वैव पैकेर। 43 येसुए फरी नोरालाई, “डा परमेस्वरए ओराज्यालाव पाँ छुत नाखार नाखार, सहर सहरल ब सथैव ज़ परिके। नोए उजूनी ज़ परमेस्वरए उपरीनाव,” है यादोक्यो।

44है जैद येसुए यहूदिया खन्द भरिलाव धर्मसास्त्र झिम झिमक परमेस्वरए ओपाँ यासथैनाक्यो।

5

ल्यो माल्यो डाँःर

(मत्ती ४:१८-२२; मर्कुस १:१६-२०)

1तछा गनेसरेत दह* छचोक च्याँःसिद येसुए परमेस्वरए ओपाँ ओरासथैज्याक माहोल्यार येसुए ओपाँ थैन्याए जूनी बनै याछुइसिहुज्याव। 2 हो बेलाक दह छचोक नेब्लो दोङ्गानी निरँःक्यो। नो दोङ्ग चलेज्यावर डाँः क्योःज्यावर याल्यो। नोर दोङ्गानी हाइसिद याजालर याछेज्याव। 3 येसु सिमोनए ओदोङ्गाल पसिद रील जाँ होकसै लाँव परीद ननी ज़ परमेस्वरए ओपाँ माहोल्यारालाई यासथैक्यो।

4ओपाँ ओखेमोत सिमोनलाई, “नदोङ्गा उर्जी ल्योदा लाँद डाँःर यान्न्याए जूनी नजाल ख्याके,” है ओदोक ते, 5 सिमोनए, “तुबुरी ज़ धामा दाद गेनाल क्याके गुर्बा, तोबो डाँः ज़ गेमादैए। हैदी ब नँ है नलिकिन नँ नपांनी ज़ डाख्या,” है दाद, 6 ओजाल ख्याक्यो। ओख्याव प्राइँना ज़ डाँःर बनै कुधु परिद जाल ज़ चीवा चीवा जैकेर। 7 है जैद ओलापकाव छुत दोङ्गात लिज्याव यानैरालाई ‘सवैहसिचिके’ लिद सान दाद यारायो प्राइँना ज़ नोर हुकेर। नो नेब्लो दोङ्गाल डाँःर ब्याल्द दोङ्गानी ब गदिवा गदिवा ताकिनी।

8है जैद सिमोन पत्रुसए नो रँःद येसुए उखँत फुलुपसिद, “अ प्रभु,

* 5:1 5:1 गनेसरेत दह यादोज्याव गालील दह ज़।

डा इताव पापी नडाक लिन्या स्यासो डामाले। नँ डानी बाव ताके,” है दोक्यो। 9 डाँ:र बनै ल्यो माल्यो यापरिउए सिमोन ओनैरास अचम्ब ताद यालिज्याव। 10 हो बेलाक सिमोनस येन दोज्यावनी जब्दियाए ओजानी याकूब सोनो यूहन्नानी निल्यो। नोनी ब अचम्ब ताकिनी। हा:त ज़ येसुए सिमोनलाई, “ताछे:नी, अबकिन नँलाई डाँ:र मा:क, मिँर खिम्न्या डाजैनिरिज्या,” है दोक्यो। 11 है जैद नोर यादोङ्गार पाखाक यारारैव प्राईना ज़ यादोङ्गार याजालर रासुद येसुस बाकेर।

येसुए कुरीलाई ओसगराँव

(मत्ती ८:१-४; मर्कूस १:४०-४५)

12तछा येसु नजीलाव तोबो नाखारल उलिज्याक तोबो कुरीए येसुलाई रँ:द ओडाक फुलुप्सिद, “अ प्रभु, डाल्योदा नयुँ ओताकिन डालाई सगराँन्या नले,” है लिद बिन्ती ओदोव प्राईना ज़, 13 येसुए नोलाई उकुइए छाप्द, “नल्योदा डायुँ लिज्या ज़, गरानिके,” है ओदोव प्राईना ज़ नो कुरीए ओबेथा चक चक ज़ माके। 14 येसुए फरी नोलाई, “आव नक्याँताव डादोव येन सुलाई ज़ है तारादोयो। बुरू नगराँव साचो ज़ ओल्यो लिन्या थरैव परीन्याए जूनी पुजारीए ल्योक सतैसिनाद मोसाए ओकानुनलाव मिताव चरै:न्यार चरै:नाके,” है दोक्यो।

15हितावत ब येसुए ओबयेन झन ज़ तादा तादाड थासुनाके। है जैद ओपाँ थैन्याए जूनी सोनो याजोरो हुवर सगराँसिन्याए जूनी मिँर ल्यो माल्यो याहुज्याव। 16 ओल कैताक याल्योनी अलगजा हाइसिद साईंसुईवक बाद ओपोखारिनाज्याव।

येसुए उखँ उकुइ सिउलाई ओसगराँव

(मत्ती ९:१-८; मर्कूस २:१-१२)

17तछा येसुए परमेस्वरए ओपाँ ओरासथैज्याक फरिसीर सोनो

कानूनलाव यागुर्बार नल चुसिद यालिज्याव। नोर ख्वार गालील सोनो यहूदिया खन्दलाव नाखार नाखारनी हुवर यालिज्याव, ख्वार यरूसलेमनी हुवर यालिज्याव। हो बेलाक परमेस्वरए सगराँन्या ओसक्ती येसुए ओक्याँत उलिज्याव। 18 फरी नो बेलाक ज़ तोबो उखँ उकुइ सिउलाई झेलोङ्गाल झाःद येसुए ल्योक यारैज्याव। 19 खाली मिँर बनै माहोल्या यातावए येसुए ल्योक बान्या येम मादैद नोर थालात बाद झिम कप्सिउ फल्यार जाँवा हाइद सघ्वाँःद नो उखँ उकुइ सिउलाई ओझेलोङ्गारास येसुए ओडाक झरैदिकेर। 20 येसुए नोराए यारुँ उहुबो रँःद नो उखँ उकुइ सिउलाई, “अ कान्छा, नपाप क्याल्सिके,” है दोक्यो।

21नो थैद नलाव हुव सास्त्रीर सोनो फरिसीराए या याल रूम्रूमैद, “आव मिँए कै जैद परमेस्वरए उमिन ओबलेज्याव? मिँए ओपाप क्याल्न्या ते परमेस्वरकिन सु ची उलिज्यावदा?” है लिकेर। 22 येसुए नोराए यारुँलाव पाँ सैद, “जे काराव जेरुँल नै जेलिज्याव? 23 नो मिँलाई ‘नपाप क्याल्सिके’ है दान्या सै ‘सोद बान्के’ है दान्या काताकाव सजालो उलिज्याव? 24 अब डा मिँ मिनसिद हुवए आव मानुवात पाप क्याल्न्या डाकुइत उलिज्याव सै ओमालिज्याव चिरुचिके,” है दाद नो उखँ उकुइ सिउलाई, “डा नँलाई है डादीज्या, सोद नझेलोङ्गार घुर्द नझिमदा बान्के,” 25 है ओदोव प्राइँना ज़ नो उखँ उकुइ सिउ याडाकिन ज़ सोद ओझेलोङ्गार घुर्द परमेस्वरए उमिनर सघ्योःद्याद रेंए रेंए उझिमदा बाके। 26 नो रँःव भरी बनै अचम्ब ताद छेःद, “आछिम काता गेरँःव इताव?” लिद परमेस्वरलाई बनै घ्योःव ज़ थरैकेर।

येसुए लेबीलाई उसिस ओजैव

(मत्ती ९:९-१३; मर्कूस २:१३-१७)

27येसु ननी पुलुसुद ओबाज्याक तोबो सिर्मा स्योःज्याव लेबी

यादोज्ञयावलाई सिर्मा स्योऩ्या अद्दाक चुसिद उलिज्ञयाव रँःक्यो। येसुए नोलाई, “डास हुन्के,” है ओदोव प्राइँना ज़, ²⁸ नो च्याँःसिद ओयेन भरी रासद् येसुए उछींत बाके।

²⁹नकिन लेबीए येसुलाई उझिमक लाँद बनै घ्योःव भतयार जैक्यो। नो भतयारल लेबीए ओनैर सोनो सिर्मा स्योऩ्यावर ब कुधु ज़ याल्यो। ³⁰ फरिसीर सोनो यासकाव सास्त्रीराए नोरालाई येसुस सिप याज्ञयुज्ञयाव रँःद येसुए उसिसरालाई, “जे कै जैद निताव सिर्मा स्योऩ्यावर सोनो पापीरास सिप जेज्ञयुज्ञयाव?” है लिद गन गन यारादोकेर। ³¹ नो है यारादोज्ञयाव येसुए थैद, “याजोरो माहुज्ञयावरालाई सगराँन्या मिँ माचाहिए, याजोरो हुज्ञयावरालाई वाज़ चाहिज्ञया। ³² हो मिताव ज़ डा मनी ‘गे धर्मर’ है लिज्ञयावरालाई परमेस्वरए ल्योदा बान्या डाराखुल्हुव माःक, ‘गे पापीर’ है लिज्ञयावरालाई डाराखुल्हुव ची,” है यादोक्त्यो।

उपासिन्या

(मत्ती ९:१४-१७; मर्कूस २:१८-२२)

³³ख्वा ख्वा मिँराए येसुलाई, “रील सछैँज्ञयाव यूहन्नाए उसिसर सोनो फरिसीराए यासिसर एकतार ज़ उपासिद पोंखारिज्ञयार। नँ नसिसर ते माउपासिद ज़याद ओद लिज्ञयार,” है यादोक ते, ³⁴ येसुए, “जन्तीर ब्याहोल्यास यालेवा पै कै जैद याउपासिज्ञयाव? ³⁵ खाली जो छचामकिन ब्याहोल्यालाई छुतैर, हो छचामकिन वाज़ उपासिन्या लेर,” है यादोक्त्यो।

³⁶फरी घर्ती तोबो झाःद याएक्त्यो, “ओरे छिबो क्वालालाई तालिन्याए जूँनी सुए ज़ साःरो क्वा चीद मातालिउ, मानी साःरो क्वा ब बलेसज्ञया, पुराँदोत साःरो तालिसिउ ब माखैए।

³⁷“हो मिताव ज़ पुराँदो प्रिर्गुलल साःरो दाखमद्य सुए ज़ माझाःर, मानी उस०ए प्रिर्गुललाई सुफुद दाखमद्य ब भोऩ्या ले, प्रिर्गुल ब खेर

बान्या ले। ³⁸ है जैद सा:रो दाखमद्य सा:रो प्रिर्गुलल वाज़ झा:र।
³⁹ पुराँदो दाखमद्य ओद बानी परिउए ‘आव ची डमो लिज़्या’ लिद
 सा:रो दाखमद्य ओव माभै:ए।”

6

येसु न्नासिन्या छचामकिन घेप्पा ज़
 (मत्ती १२:१-८; मर्कूस २:२३-२८)

¹ न्नासिन्या छचाम येसु उसिसरास एँ: खालाव घ्याँ याबाज़्याक
 उसिसराए बाला फ्यान्द जुद याकैज़्याव ² फरिसीराए रँ:द येसुलाई,
 “न्नासिन्या छचाम मादान्या येन काराव जेदोज़्याव?” है यादोक ते,
³ येसुए, “धर्मसास्त्रलाव सर्सिउ दाऊद राजा ओनैरास याकरेकाव
 यादोव येन जेमापरिए रो? ⁴ दाऊद ध्यान झिमल पसिद
 परमेस्वरलाई चरै:सिउ भरेस हाइद ओल मनी ज्युक्यो, ओनैरालाई
 मनी याएक्यो। नो भरेस पुजारीराए वाज़ ज़्यान्या ओताज़्याव।”
⁵ नकिन येसुए फरी, “डा मिँ मिन्सिद हुव न्नासिन्या छचामकिन ब
 घेप्पा ज़ डालिज़्या,” है यादोक्यो।

येसुए उकुइ थँवलाई ओसगराँव
 (मत्ती १२:९-१४; मर्कूस ३:१-६)

⁶ फरी हुकिनकाव न्नासिन्या छचाम येसुए धर्मसास्त्र झिमल
 परमेस्वरए ओपाँ ओरासथैज़्याक नल तोबो वोर्फताव उकुइ
 थँव मिँ ब उलिज़्याव। ⁷ हो बेलाक सास्त्रीर सोनो फरिसीराए
 येसुए ओपाहा झा:घान्याए जूनी न्नासिन्या छचाम सगराँन्या येन
 मादोज़्याव ब्याँ लिद चिऊद यानैज़्याव। ⁸ येसुए नोराए यार्युंलाव
 यापाँ सैद ज़न नो उकुइ थँवलाई, “आक हुद च्याँ:सिन्के,” है
 ओदोक ते, नो प्राइँए याड़ाक च्याँ:सिके। ⁹ येसुए नो सास्त्रीरालाई,
 “दे, डालाई है दाँचिके, न्नासिन्या छचामकाव येन चाव जैन्या
 सै माचाव जैन्या? मिँलाई बाँचैन्या सै बलेन्या? कानुनए कै

उलिज़्याव?" है दाद, ¹⁰ प्राईलाई तछचोनी चिऊद नो उकुइ थँवलाई, "नकुइ तङ्गैके," है दोक्यो। नोए उकुइ ओतङ्गैव प्राईना सोजोकाव ज़ ताके। ¹¹ नो सास्त्रीर स्रोनो फरिसीराए येसुए ओदोव येनलाई रँ:द यारिस बनै चोद 'आवलाई कै जैन्या ओताव?' लिद सल्ला दोकेर।

येसुए बाह जना ओसाचीर

(मत्ती १०:१-४; मर्कूस ३:१३-१९)

¹²हा: बेलाक तछा येसु तोबो दाँदात पोंखारिना बाके। नत परमेस्वरलाई तुबुरी पोंखारिद ज़ झा:क्यो। ¹³ हो परा:ती छकाल्नुया ओलस बारिज़्यावरालाई ओल्योदा खुल्द, हो भरिनी बाह जनालाई छाँतिद ओसाचीर याजैक्यो। ¹⁴ नोराए यामिनर आवर ज़ — डादाकिनकाव उमिन सिमोन (छिंनी होए उमिन पत्रुस जैदिक्यो), होए ओभाइ अन्द्रियास, नकिन याकूब, यूहन्ना, फिलिप, बारथोलोमाइ, ¹⁵ मत्ती, थोमा, अल्फयसए ओज़ा याकूब, देसभक्ता है यादोज़्याव सिमोन, ¹⁶ याकूबए ओज़ा यहूदा स्रोनो छिंनी येसुलाई धोका याज़्याव यहूदा इस्कुरियोत।

येसुए कुधु मिँरालाई ओरासगराँव

(मत्ती ४:२३-२५)

¹⁷नकिन नोरास दाँदातिन झरिद येसु तोबो बाँक च्याँ:सिके। नक ओलस ओलस बारिज़्याव माहोल्थार ब यालिज़्याव। यहूदिया खन्दलाव मिँर, यरूसलेम सहरलाव मिँर, समुन्द्र छचोकाव तुरोस स्रोनो सीदोन खन्द जीदाडाव मिँर ब बनै माहोल्थार यालिज़्याव। ¹⁸ नोर ख्वा ओपाँ थैना हुवर, ख्वार याजोरोनी सगराँसिना हुवर, ख्वार याक्याँताव माचाव पुरूस पले:ना हुवर यालिज़्याव। ¹⁹ येसुए ओक्याँताव अचम्बलाव ओसक्तीए प्राईलाई ओरासगराँज़्यावए ओललाई छाप्न्याए जूँनी नो माहोल्थार ओल्योक बनै याछुइसिहुज़्याव।

परमेस्वरनी धन्याकावर
(मत्ती ५:१-१२)

20नकिन येसुए ओलस बारिज्ञयावरालाई चिऊद अइ लिद पाँके,
“धन्या, जे गरीबर,

परमेस्वरए ओराज्ञया जेमीं ज्ञ।

21धन्या, जे आज्याल करे लिज्ञयावर,
जेकरे सिन्या ले।

धन्या, जे आज्याल घर्ज्ञयावर,
रेंन्या ज्ञ जेले।

22डा मिं मिन्सिद हुवए डाजूनी जेलाई सोद, याखानी पलेद,
बीज्ञयात जैद, जेमिन बलेद यायाचिक धन्याकावर ज्ञ जेताज्ञया।

23 हो छचाम जेरेंतए ज्ञोचिके, काराव ल्यो ताकिन स्वर्गताव
घ्योःव इनाम दैन्या जेले। नो जेखिरी पसिज्ञयावराए यासाखा
पुर्खाराए ब अगमबक्ता भरिरालाई ब हैज्ञ याराजैकेर।”

थैए माँतकन

24“जे धनीरालाई थैए माँतकन,
आव जेजिउत वाज्ञ जेयुं होलाँ ताद जेलिरिज्ञया।

25जे आज्याल द० द० सर्वाँसिज्ञयावरालाई थैए माँतकन,
करे ज्ञ जेतारिज्ञया।

सासूद रेंद लिज्ञयावरालाई थैए माँतकन,
पाँकी पाँ घर्न्या जेले।

26जे प्राइँ मिंराए यासघ्योःचिज्ञयावर थैए माँतकन,
नो सघ्योःज्ञयावराए यासाखा पुर्खाराए तँनी पैज्ञयावरालाई ब
हिताव ज्ञ यारासघ्योःज्ञयाव।”

सुतुररालाई समारिन्या
(मत्ती ५:३८-४८)

27“जे थैज्ञ्यावरालाई है डादाचिज्ञ्या, जेसुतुररालाई यारासमारिच्यो, जेलाई सोज्ञ्यावरालाई चाव येन दाद याराएच्यो। 28 जेलाई थलज्ञ्यावरालाई असिक याराएच्यो, जेलाई बलेव पैज्ञ्यावराए जूनी पोंखारिच्यो। 29 तँनिकाव नगालात प्रोद याईकिन फरी तँनिकाव नगाला ब थॉद याएयो। नफुतु यानैनिकिन नकमेस ब सिउःद याएयो। 30 नँस निज्ञ्यावरालाई याएयो, नमीं हाइद लाँज्ञ्यावरास फरी तानियो। 31 जे छुतए ल्योनी किताव जेपैज्ञ्या, जे ब छुतए ल्योदा हितावनी ज्ञ दोचिके।

32“जेलाई समारिज्ञ्यावरालाई वाज्ज जेरासमारिकिन नो ते काता ज्ञ माताके। नाःवाकाव येन ते पापीराए ब दोज्ञ्यार। 33 फरी जेलाई चाव येन दाद्याज्ञ्यावरालाई वाज्ज चाव जेराजैकिन नो ब काता ज्ञ माताके। निताव ते पापीराए ब दोज्ञ्यार। 34 सोवोल्धुन्यारालाई वाज्ज जेरालोइकिन नो ब काता ज्ञ माताके। निताव ते पापीराए ब ‘डालाई सोवोल्धाँवा ज्ञ’ लिद यारालोइज्ञ्यार।

35“है जैद जे ते जेसुतुररालाई चाव येन दाद यारासमारिच्यो। रिन जेराएक ‘खर्क सोवोलोके’ लिद आस मादाद याराएच्यो। हो ताकिन ची माहान परमेस्वरनी घेप्पा इनाम दैन्या ताद ओज्जार ब तान्या जेले। ओल ब उगुन माचेतैज्ञ्याव पापीराए ल्योदा उयुं यालो ज्ञ लिज्ञ्या। 36 किताव स्वर्गताव जेबाबुए उयुं जेल्योदा नाज्ञ्या, हिताव ज्ञ जे ब छुतए ल्योदा जेयुं ओनाक।”

छुतलाई रास्न्या

(मती ७:१-२)

37“जे अर्काए ओखत पलेःद ताएच्यो, मानी परमेस्वरए जे जेखत ब पलेःद्यान्या ले। अर्कालाई ‘इताव हिताव’ है दान्या ब माःक, मानी परमेस्वरए जेलाई मनी है दान्या ले। जेउपर्त मादान्या दोज्ञ्यावलाई जेरासकिन परमेस्वरए जेलाई मनी रास्न्या ले। 38 है जैद जे छुतलाई जेएकिन जे मनी जेदैरिज्ञ्या। किताव गोईनी जेगोइँज्ञ्या, जे मनी

हिताव गोइँनी ज़ दैन्या जेले, झन हलैद छुइए छुइए ज्याल्द जेघोइँल ब भोन्या ले।”

अर्काए ओखत पलेद मायान्या

(मत्ती ७:३-५)

39नकिन येसुए फरी अइ लिद घर्तीरानी यासथैक्यो — “उमी मारै:वए उमी मारै:वलाई दौरैद ओलाँकिन नोनी नेब्लो ज़ भल्खादाल तेन्या लिनी।

40“फरी, उगुर्बाकिन उसिस घेप्पा माताए। प्राइँ उतीधुवत वाज़ उगुर्बा स्यासो ताज़्या।

41“हिताव ज़ फरी, कै जैद ननैए उमीलाव तकेज़ा सींका नरँ:ज़्याव, नँ नमीलाव ना:ल्दिउ मुँदा ताकितर नमारँ:ज़्याव? 42 नमीलाव ना:ल्दिउ मुँदा मारै:द कै जैद ननैलाई, ‘नमीलाव सींका हाइद डाई’ है नदोधुरिज़्याव? ए निताव पाँज़्याव कैफती, ड़ादा नमीलाव मुँदा हाइकेदा, ननैए उमीलाव सींका नहाइक छर्लङ्ग रँ:न्या नले।”

सीए ओसै

(मत्ती ७:१६-२०; १२:३३-३५)

43“चाव सीए माचाव सै माझा:व, माचाव सीए चाव सै ब माझा:व।

44 है जैद जो मिताव सीं तादी ब ओसैनी ज़ सरेस्सिज़्या। जुसैत कोराली मासैए, कारजुत जोम्परसै ब मासैए। 45 हो मिताव ज़ चाव मिँए उयुँनी चाव वाज़ हुज़्या, माचाव मिँए उयुँनी माचाव वाज़ हुज़्या। युँल किताव लिज़्या या:नी ब हिताव ज़ हुज़्या।”

लुँ तर्त जैसिउ झिम

(मत्ती ७:२४-२७)

46“जे डापाँ जेमादोकिन डालाई ‘प्रभु, प्रभु’ है जेमादाँदी ब ताए।

47 जोए डाल्योदा हुद डापाँ थैद दोज़्याव, नो मिँ किताव उलिज़्याव सतैद डायचिरिज़्या। 48 नो तोबो झिम जैज़्याव मिँए गज बनै पतालल लुँ तर्त ओझा:व स्यासो लिज़्या। नो झिम बनै पक्कास

जैसिउ ओतावए घ्योःव भल उहुदी ब कैज़ माजैधुव। 49 फरी जो मिँए डापाँ थैद ओमादोकिन नो गज माखालिद झिम जैज़याव मिँ स्यासो लिज़्या। नो झिमलाई भल उहुक तैःद प्याःपी जैद लाँद उमिन ज़ समैदिज़याव।”

7

येसुलाई उयुँ हुबो कप्तान
(मत्ती ८:५-१३)

1 येसुए नो ओपाँ भरी मिँरालाई ओरासथैवत फरी कफर्नहुमदा बाके।
2 हाः बेलाक नल तोबो रोमी कप्तानए उयुँलाव मिताव ओनोकोर ओजोरो हुद सिउ ओपैज़याव। 3 नो कप्तानए येसुए ओबयेन थैद ओनोकोरलाई सगराँन्याए जूँनी यहूदीराए यासेरर नेबरेँवा परींद येसुलाई किनाव यापरींक्यो। 4 नोर येसुए ओल्योक बाद बिन्ती दाद, “नो कप्तानए नँ नसाएता दैन्याकाव ज़ लिज़्या। 5 नोए गेजातलाव मिँराए ल्योदा उयुँ ताद गेजूँनी धर्मसास्त्र झिम ब जैद्यासिक्यो,” है दोकेर।

6 है जैद येसु नोरास बाके। याबाज़याक कप्तानए नोर झिमकिन सर्बा तादाड याहुज़याव रँःद तोबो नेब्लो ओनैरालाई येसुए ल्योदा, “अ प्रभु, डाजूँनी आः दुख तादैयो। डा इतावए डाझिमक नँलाई लाँन्या स्यासो डामाले। 7 डा नड़ाक सतैसिन्या स्यासो ब डामाले। बुरू ननी ज़ ‘गराँनिके’ है नलिकिन डानोकोर गराँन्या ले। 8 डा ब छुतए ओहक धूँलाव मिँ ज़। डा डाधूँल मनी कुधु सिपाईर लिज़्यार। नोरालाई ‘बाचिके’ है डारादोक बाज़्यार, ‘हुचिके’ है डारादोक हुज़्यार। डानोकोरलाई ब ‘इताव दोके’ है डादोक दोज़याव है दोच्यो,” है लिद यापरींक्यो। 9 येसुए कप्तानए ओरापरींवरए यापाँ थैद कप्तानस अचम्ब ताद ओलस बाज़याव माहोल्याराए ल्योदा भाल्सिद, “डा जेलाई है डादाचिज़्या, इस्राएलीराए याखाल मनी आव मिताव डाल्योदा उयुँ हुबो सु ज़ डामादैताए,” है यादोक्यो।

10नकिन नो कप्तानए ओरापरींवर ओल्द झिमक याबाक नो ओजोरो हुज्याव गरॉद उलिज्याव रँ:केर।

येसुए सिउलाई ओजागैव

11येसु नकिन फरी जाँवाक नाइन यादोज्याव नाखारदा बाके। नो बेलाक उसिसर सोनो माहोल्यार ब ओलस कुधु ज़ याबाज्याव।

12 नाखार डाक याकेसोत तोबो मोरो घुर्द यालाँज्याव यारँ:क्यो। नो सिउ छोर्या तोबो राँदी मेंमाए ओजा ना: तोबो ज़ ओल्यो। नो लाँज्याव मलामीर सर्बा कुधु ज़ याल्यो। 13 प्रभुए नो राँदी मेंमालाई रँ:द उयुँ नाद ओल्योक बाद, “ताघर्नी,” है दाद, 14 मोरो झा:सिउ बाकसलाई ओछापोत नो मोरो बैज्यावर ब च्याँ:सिकेर। याच्याँ:सिक येसुए नो मोरोलाई, “अ बुचा, सोनिके,” है ओदोव प्राइँना 15 नो सिउ छोर्या सैसिद चुसिद पाँके। है जैद येसुए नो छोर्यालाई ओआमाए ओजिम्बाल झा:क्यो।

16निताव रँ:द मलामीर बनै छे:द परमेस्वरलाई बनै घ्यो:व थरैद, “माहान अगमबक्ता ज़ गोखाल हुद ले, ओल परमेस्वर ज़ उमीरास दैसिहुद ले,” है लिकेर। 17 है जैद ‘येसुए इताव येन दोक्यो दी’ लिन्या यहूदियाल सोनो नजीलाव खन्द भरिल प्राइँदा ज़ थासनाके।

यूहन्नाए येसुए उजूनी उसुधिउ

(मत्ती ११:२-६)

18रील सछैँज्याव यूहन्नाए उसिसराए ब आव भरी यूहन्नालाई है दोकेर। 19 है जैद यूहन्नाए नेब्लो उसिसनिलाई खुल्द प्रभुए ल्योक, “नो धर्मसास्त्रलाव सर्सिउ ‘हुरिज्या’ है यालिज्याव नँ ज़ रो, सँ छुतलाई कीन्या?” है दोनाव निपरींक्यो। 20 है जैद नोनी येसुए ल्योक बाद, “गिनलाई रील सछैँज्याव यूहन्नाए उपरींसिनो। होए नँलाई है दीज्याव — नो धर्मसास्त्रलाव सर्सिउ ‘हुरिज्या’ है यालिज्याव नँ ज़ रो, सँ छुतलाई कीन्या?” है दोकिनी।

21 नो बेलाक येसुए याजोरो हुवरालाई, माचाव पुरूसराए क्योःद यारानैजूयावरालाई सोनो यामी मारैःवर कुधुलाई ओरासगराँजूयाव।
 22 है जैद येसुए नोनिलाई, “आव डादोव जिन्ऱैःव जिन्थैव भरी यूहन्नालाई है दोचिन। ‘यामी मारैःवरालाई सरैःद याएजूयाव, माबाधुन्यारालाई बाधुन्या याजैजूयाव, कुरीरालाई यासगराँजूयाव, याना माथासोरालाई थैधुन्या याजैजूयाव, सिउरालाई याजागैजूयाव, गरीबरालाई ब परमेस्वरए ओपाँ यासथैजूयाव,’ है दोनाचिन्के।
 23 डालाई रँःद यायुँ माक्याजूयावर असिक दैवर लिजूयार,” है निदोक्यो।

यूहन्नाए उजूनी येसुए ओपाँ
 (मत्ती ११:७-१९)

24 यूहन्नाए उनीपरीवनी निबाव छीनी येसुए माहोल्यारालाई यूहन्नाए उजूनी अइ यादोक्यो, “जे यूहन्नाए ल्योक बनल जेबाक नोलाई किताव जेरैःया? बतासए आदा फुलुपनी होदा फुलुप ओजैजूयाव छी स्यासो ते जेमारैःखेहो। 25 हिताव ओमालिकिन किताव जेरैःया? सैं बनै चाव चाव क्वा क्वाइसिउ मिँलाई जेरैःव? निताव क्वा क्वाइसिद थॉतस लिजूयावर ते दरबारल वाज्ज लिजूयार सानी। 26 है जैद ओल्योक जेबाक नोलाई किताव जेरैःया? अगमबक्ता ज़ जेरैःखेहो सानी। डा फरी है डादाचिजूया, अगमबक्ताकिन ज़न घेप्पालाई ज़ जेरैःके। 27 नो यूहन्ना धर्मसास्त्रलाव सर्सिउ मिँ ज़। नोए उजूनी सर्सिउ आव ज़, ‘डाकत्वाल्यालाई नड़ा नड़ा परीद डाईजूया।

नजूनी नोए नड़ादा ज़ नयेम तयार जैदीरिजूयाव।’

28 है जैद डा जेलाई है डादाचिजूया, मिँनी जर्मिउ भरिरानी यूहन्नाकिन घेप्पा सु ज़ माले। हैदी ब परमेस्वरए ओराज्यालाव गोइँनी ताकिन ते प्राइँरानी ज़िम्ज़ा नोकिन घेप्पा लिजूया,” है

यादोक्थो।

29नो पाँ थैजूयाव मिँर सोनो सिर्मा स्योःजूयाव पापीर यातादी ब जाँकोसै यूहन्नानी यासछैँसिउए नोराए डादाकिन ज़ 'परमेस्वरए ओयेन साचो ज़ लिजूया' लिद याथरैजूयाव। 30 फरिसीर सोनो कानुनलाव यागुर्बार ते यूहन्नानी मासछैँसिद नोराए जूनी परमेस्वरए ओदोजूयाव येन माभैःकेर। 31 है जैद येसुए, "आव बेलाकाव मिँर कितावर यालिजूयाव, किताव अर्थनी है डादाचिके, है लिक ते, 32 आव बेलाकाव मिँर बजार खार्ल रैःसिजूयाव लुजा स्यासोर लिजूयार। नोर यानैरास गन्गनैद,

'बाँसुली तपूद गयाचिक ब जेमास्याके,
लँसिद गयाचिक ब जेमाघर्के।'

33हो मिताव ज़ रील सछैँजूयाव यूहन्नाए ज्ञयान्यार ओमाज्युक, दाखमद्य ओमाओक नोलाई 'दैनी परिद ले' है जेदोज़्या। 34 डा मिँ मिन्सिद हुवए फरी ज्ञयान्यार डाजूयुक, ओन्यार डाओक 'चिऊचिके, काता ज़ मानैजूयाव ज्ञयास्ती, दाखमद्य ओए ओए बारिजूयाव, सिर्मा स्योःजूयाव पापीराए यानै' है जेदाँजूया। 35 हैदी ब परमेस्वरए ओगहक थंरिउ लिजूया लिन्या ओल उबुद्धी दैवराए ज़ थरैजूयार," है यादोक्थो।

येसुए उखँ हुर्याव मेमा

36तोबो फरिसीए येसुलाई उझिमक काँ ज्ञयान्या खुल्क्यो। येसु नोए उझिमक बाद चुसिद काँ उजूयुजूयाक, 37 नो सहरलाव तोबो पातर्नी मेमाए 'येसु फरिसीए उझिमक काँ ज्ञयुना बाद ले दी' लिन्या थैद नो मेमाए बनै चाव जिम्जा लुँ जाल उसी डरो बनै ओएः ल्यो मास लाँद येसुए ल्योक बाके। 38 नक उछींक बाद घर्द उपिलए उखँलाई सचिऊद्याद ओचेमए सीद नो औरैव मास थीद्याद उखँलाई माइँ दोदिक्यो। 39 नो येसुलाई काँ याजूयाव फरिसीए नो मेमाए ओदोव येन रँद उयुँल उयुँल, "आव साचो अगमबक्ता ओताव ताकिन नो

उखँ छाप्ज्याव मेंमा माचाव पापीनी ओल्यो लिन्या सरेस्खेहो," है लिके।

40 हा:त ज़ येसुए नो फरिसीए उयुंलाव पाँ सैंद, "अ सिमोन, नँलाई तोबो पाँ है डादीरिज़्या," है ओदोक ते, "ताए गुर्बा, है दाँके," है दोक्यो। 41 नकिन येसुए, "तोबो साहुए उरूप्या रिन लाँवनी नेब्लो निल्यो। नोनी तोबोए चाँदीए सिक्का पाँच सय, तोबोए पचास लाँद निनैज़्याव। 42 नोनी नो रिन निमाफोःधुवए साहुए नेब्लोलाई ज़ निरास्क्यो। नोनी साहुए उगुन काताकावए कोसै चेतैनिके? है दाँके," है ओदोक ते, 43 नो सिमोनए, "नो कुधु ओरासोए ज़ ताखेहो," है ओदोक ते, येसुए, "थिक ज़ है नदाँके," है दाद, 44 नो मेंमाए ल्योदा भाल्सिद सिमोनलाई है दोक्यो, "आव मेंमाए ओदोव नरँ:खेहो। डा नज़िमक डाहुक डाखँ हुर्न्या री ब नमायाँके, आवए ते उप्रिलए डाखँ हुर्द्याद ओचेमए सीघाँक्यो। 45 नल्योक डाहुक माइँ ब नमादाँके, आवए ते डाहुवकिन ज़ डाखँत माइँ दाव ज़ नैज़्याव। 46 नँ फरी डाडैत मास ब थीद नमायाँके, आवए ते झन डाखँत चाव सी डरो मास ब थीघाँक्यो। 47 है जैद डा नँलाई है डादीरिज़्या, आव मेंमाए ओपाप कुधु ज़ उलिदी ब ओपोःस ज़ ओक्याल्सिउए डागुन कुधु ज़ चेतैक्यो। फरी छ्या रास्सिउए छ्या गुन ज़ चेतैज़्याव," है लिद, 48 येसुए नो मेंमालाई, "नपाप पाइँ ज़ क्याल्सिके," है दोक्यो। 49 ओलस काँ ज़्युज़्यावराए नो पाँ थैद, "आव मिँ कै जैद पाप क्याल्धुन्या ओजैसिज़्याव?" है लिकेर। 50 येसुए फरी नो मेंमालाई, "डालाई नयुँ उहुबोए नबाँचिके, नज़िमदा चावस बानी," है दोक्यो।

8

येसुए ओसेवा दाज़्याव मेंमार

1 नकिन जाँवाक येसु सहर सहर, नाखार नाखार भरी ब परमेस्वरए ओराज्यालाव चाव था ओरासथैज़्याव। बाह जना उसिसर

ब ओलस ज़ यालिज़्याव। ² येसुए ड़ादा माचाव बेथारानी, माचाव पुरुसरानी ओरासगराँव मेंमार ब तोबो नेब्लो ओलस ज़ यालिज़्याव। नोरानी तोबो मरियम मग्दलिनी, नोए ओक्याँतिन सात गोता माचाव पुरुसर पलेद ओयो। ³ फरी राजा हेरोदए उझिमलाव येन चलैज़्याव खुजासए ओज्या योअनना, सोनो सुसन्ना, नोराकिन छुतर ब याल्यो। नो भरिए या याझिमनी ज़ येसुलाई उसिसरास माथैव मायोव्ल सयोद याराएज़्याव।

धुर वासून्या घर्ती

(मत्ती १३:१-९; मर्कूस ४:१-९)

⁴नजीलाव नाखार नाखारलाव मिँ येसुए ओल्योक बनै माहोल्या याहुज़्याव। नोरालाई अइ लिद घर्ती तोबो झाःद याएक्यो, ⁵“तोबो मिँ ओएँःल धुर वासूना बाके दी। धुर ओवारूज़्याक ख्वा धुर येम जीदा परिके दी। नो येमलाव परिउ ख्वा मिँराए छिल्केर दी, ख्वा बाज़ाराए ज़्युकेर दी। ⁶ फरी ख्वा धुर गम छ्या छ्या ल्यो ओदादरत परिके दी। नत उझी ओमाल्योए उपरीव प्राईना ज़ थैके दी। ⁷ फरी ख्वा धुर जुर रमराए खार्ल परिके दी। नो जुर रमरास सरा भरी परीद जुर रमराए गाल्क्यो दी। ⁸ फरी ख्वा धुर ते गमस्याल परिके दी। नो बनै चावस परीद सय गुना सैके दी।” येसुए निताव पाँर सथैद माहोल्यारालाई है ओरादोज़्याव, “आव पाँ जोए थैन्या उयुँ लिज़्या, चावस ओथैवक।”

धुर वासूसिउ घर्तीए ओअर्थ

(मत्ती १३:१०-२३; मर्कूस ४:१०-२०)

येसुए उसिसराए ओललाई, “आव नझाःव घर्तीए ओअर्थ काता?” है यादोक ते, ¹⁰ येसुए, “जेलाई वाज़ परमेस्वरए ओराज्यालाव कपसिउ पाँर छर्लङ्ग सतैसिउ लिज़्या, उपुर्कावरालाई ते घर्ती मिताव ज़ लिज़्या। है जैद,
‘नोराए रँःद ब मारँःधुर,

थैद ब मातीधुर।’

11“है जैद नो आछचाकाव डाझाःव घर्तीए ओअर्थ आव ज़ — धुर परमेस्वरए ओपाँ ज़। 12 नो येमलाव परिउ धुर आव ज़, जोए परमेस्वरए ओपाँ ओथैक सैतान हुद ‘आव ते परमेस्वरए ल्योदा बाद अजम्बरी जुनी दैवा’ लिद उयुँलाव पसिउ पाँ ब स्याप सिप जैद लाँदिज्याव। 13 फरी नो ओदादरताव परिउ आव ज़, जोए परमेस्वरए ओपाँ ओथैव प्राइँना रेंद ज़ भैःज्या। खाली ओजरा माल्यो मिताव ओतावए नो पाँत जाँवा पै बाद कातारानी दुखर खिरीर उपसिकिन ह्वाँ हों रासज्याव। 14 फरी नो जुुर रमराए खालाव परिउ आव ज़, जोए थैन्या ते थैज्याव, खाली नोए ‘आव डाजिउत कै तान्या ओताव, कातानी कोसै जैद थाँतस लिन्या?’ लिद वीनी फुइ उलिज्यावए नो परमेस्वरए ओपाँत ओसै माझाःज्याव ताज्या। 15 फरी नो गमस्याल परिउ आव ज़, जोए परमेस्वरए ओपाँ थैद जात्त ज़ मारासूद चाव साचो युँस दोज्याव, नो परमेस्वरए ओपाँत थ॰रिद ओसै झाःज्याव चाव धुर स्यासो ज़ ताज्या।”

दिउ बाल्न्यात तैःसिउ लोसै

(मर्कुस ४:२१-२५)

16“सुए ज़ लोसै तैःद जाए माकबो, खात खँल ब मामोंव। बुरू ‘झिमल पसिज्यावरालाई पलाँ घताक’ लिद दिउ बाल्न्यात झाःज्याव। 17 हिताव ज़ मारैःव भरी तछा रैःन्या ज़ ले, कप्सिउ भरी ब फैसिद पलाँवल तान्या ले। 18 है जैद जे नो पाँलाई पाथस थैच्यो। जोए धिद थैज्याव, होए झन ज़ तीधुन्या ले। जोए चावस माथैव, होए झन ज़ थैन्या युँ मादाद डादाडाव ओथैव ब ओपोःस ज़ मान्या ले।”

येसुए ओआमार ओभाइर

(मत्ती १२:४६-५०; मर्कूस ३:३१-३५)

19 छीनी तछा येसुए ओआमा सोनो ओभाइर येसुस दैसिना याहुक मिँर बनै माहोल्या यातावए ओल्योक बान्या येम मादैकेर।
20 नलाव तोबो नेब्लो मिँराए येसुलाई, “लाँक नआमा सोनो नभाइर नँस दैसिना हुद लेर,” है यादोक ते, 21 येसुए, “जोराए परमेस्वरए ओपाँ थैद दोज्यार, होर ज़ डाआमार डाभाइर,” है यादोक्यो।

येसुए बतासलाई ओथकनैव

(मत्ती ८:२३-२७; मर्कूस ४:३५-४१)

22 तछा येसु उसिसरास दोङ्गाल पसिद नोरालाई, “दह होफत गेबाया,” है दाद नो यालिज्याव दोङ्गास बाकेर। 23 याबाज्याक येसु उमीर हुद डल्द उलिज्याव। नाःत ज़ दहल ल्यो माल्यो बतास हुद री बनै छल्किद दोङ्गाल पसिद नोरालाई गदैवा गदैवा याजैक्यो।
24 उसिसराए येसुलाई सोचोइद, “गुर्बा, गुर्बा, खदम ज़ गेतारिके,” है यादोक ते, येसु सोद बतास सोनो रीनिलाई निसिडार्क्यो। हो प्राइँना ज़ बतास ब थकनिके, री ब अदिके। 25 हाःत ज़ उसिसरालाई, “खैकी जेयुँ उहुबो?” है ओरादोक ते, नोर छेःद अचम्ब ताद या याल, “आव किताव मिँ ओताव? बतासर रीराए ब ओपाँ यादोज्याव,” है लिकेर।

खादर पोल लिज्याव बूलिउ मिँ

(मत्ती ८:२८-३४; मर्कूस ५:१-२०)

26 येसु उसिसरास गालील दह होफताव गेरासेनस यादोज्याव पोड केसुकेर। 27 दोङ्गानी यापुलुसोत नलाव सहरनी बोःलैज्याव पुरूसए क्योःद ओनैज्याव तोबो मिँस दैसिकिनी। नो मिँ क्वार ब ओमाक्वाइसिज्याव, झिमक मालिद रील ब खादर जीदा ज़ उलिज्याव। 28 नोए येसुलाई उरँव प्राइँना बनै चिर चिर किद येसुए उखँत फुलुप्सिद बनै चोइस, “अ येसु, माहान परमेस्वरए

ओजा, डास नखै काता उलिज्याव? नँस डाबिन्ती लिज्या, डालाई दुख तायॉयो,” है दोक्यो। 29 नो माचाव पुरुसलाई येसुए डादा ज़ “पुलुसनी” है दाद ओनैज्याव। नो माचाव पुरुसए नो मिँलाई घरी पाला ज़ ओक्योःज्याव। कैताक मिँराए झँए साँगलए किद गुन्या मिँर यारानैदी ब साँगलर फ्याद नो माचाव पुरुसए साईसुईवक ओलाँज्याव।

30 येसुए फरी, “नमिन कै?” है ओदोक ते, “डामिन फौजी,” है दोक्यो। नोए ओक्याँत माचाव पुरुसर कुधु याल्योए ज़ ‘फौजी’ है ओदोव। 31 फरी नोराए, “गेलाई नो नर्गलाव भलखादाल ताझाःसियो,” लिद बिन्ती यादोज्याव।

32 नो बेलाक ज़ नक तोबो दाँदात ऊर तबगाल यालाज्याव। नो माचाव पुरुसराए, “गेलाई बुरू नो ऊराए क्यॉत बाव यासिके,” लिद बिन्ती यादोक ते, येसुए भैःद याएक्यो। 33 है जैद नो माचाव पुरुसर नो बूलिउ मिँए ओक्याँतिन पुलुसूद ऊराए क्यॉत बाकेर। हो प्राईना ज़ ऊ भरी बूलिद दाँदातिन सुईःकिनाद दहल ज़ोद प्राई ज़ सुद सिकेर।

34 निताव रँःद नो ऊ गावलार धोंःनाद नाखार जीदा, सहर जीदा बाद नो यारँःव भरी है यारादोकेर। 35 नो पाँ थैव भरी साचो सैँ माःक लिद चिऊना हुवर येसुए ल्योक याबाक नो माचाव पुरुसराए यारासो मिँ ओक्वार क्वाइसिद येसुए उखँक सोजोकाव ज़ चुसिद उलिज्याव रँःकेर। निताव रँःद नोर छेकेर। 36 नो चिऊना हुवरालाई, नो येन रँःव भरिए, “बूलिउ इतावनी ज़ गरॉके,” लिद है यारादोक ते, 37 नो गेरासेनस खनूद जीलाव मिँराए याछचाचे येसुलाई, “आनी पुलुसूद बान्के,” लिद बिन्ती दोकेर। है जैद येसु दोङ्गाल पसिद ओल्द बाव ओपैज्याक, 38 निताव रँःद नो माचाव पुरुसराए यारासो मिँए, “डालाई ब नँस लाँनाके,” है लिद बिन्ती ओदोक ते, येसुए अइ लिद परीक्यो, 39 “नँ नझिमदा बाद ‘परमेस्वरए डाजूनी आःल्दिउ येन

दाघाँक्यो' है लिद सथैनाव ताके।" है जैद नो मिँ बाद सहर भरी ओल उजूनी येसुए ओदोव येन यासथैक्यो।

याइरसए ओज़ा सोनो झी भोन्या ओबेथा ल्यो मेमा

(मत्ती ९:१८-२२; मर्कूस ५:२१-३४)

40 आफताव मिँर बनै माहोल्या दुप्सिद 'येसु खर्क हुके' लिद कींद यानैजूयाव। येसु ओल्द उहुवत नोराए सुम्केर। 41 नोरास तोबो याइरस यादोजूयाव धर्मसासूत्र झिमलाव याधेपूपा उलिजूयाव। नो मिँ येसुए ल्योक हुद उखँत फुलुप्सिद, "डाझिमक तखेप बाघाव ताके," लिद बिन्ती दोक्यो। 42 नोए तोबोका तोबो बाह बर्सकाव मेमा ओज़ा ओजोरो हुद सिउ ओपैजूयाव।

है जैद येसु नोस ओबाजूयाक मिँर बनै माहोल्या ओलस याछुइसिनाजूयाव। 43 नो माहोल्याराए याखार्ल तोबो बाह बर्स भरी ओक्याँतिन झी भोन्या बेथाए क्यो:द ओनैजूयाव मेमा ब उलिजूयाव। नो मेमालाई सुए ब यामासगराँधुजूयाव। 44 है जैद नो मेमा माहोल्याराए खार्ल छुइसिनाद येसुए उछीनी हुद ओक्वाए उतुपात छाप्दिक्यो। ओछापो प्राइँना नो झी भोन्या बेथा गराँके। 45 हा:त ज़ येसुए, "डालाई सुए ओछापूनाव?" है ओरादोक ते, प्राइँए ज़ "डा मा:क" है दोकेर। पत्रुसए फरी, "प्रभु, माहोल्यार बनै छुइसिहुजूयार सानी," है ओदोक ते, 46 येसुए, "डालाई तोबोए छाप्द ज़ नैनाव। डाक्याँतिन सगराँन्या सक्ती पुलुसूद ओबाव दारिँद डाले," है दोक्यो। 47 हा:त ज़ नो मेमाए 'डा डामामाँसिधुके ब' लिद ओछाचाचे गूद येसुए उखँत फुलुप्सिद प्राइँराए डाक येसुलाई, "डा सुए ज़ यामासगराँनाधुजूयाव बेथाए उजूनी ज़ डाछापूनिउ। डाछापूनिउ प्राइँना ज़ डागराँके," है ओदोक ते, 48 येसुए, "अ माँज़ा, डालाई नयुँ नसुहुबोनी ज़ नगराँके। चावस बानी," है दोक्यो।

येसुए याइरसए ओज़ालाई सिउनी ओसोचोइव
(मत्ती ९:२३-२६; मर्कूस ५:३५-४३)

49 येसु नो मेंमास ओपाँज़्याक ज़ धर्मसासत्र झिमलाव याघेपपा याइरसए उझिमनी तोबो मिँ हुद याइरसलाई, “गुर्बालाई काराव हत्या यान्या, नज़ा सिधुके,” है दोक्यो। 50 नोए ओपाँ थैद येसुए याइरसलाई, “नयुँ तासतेयो, नयुँ वाज़ उहुपूक। नो नज़ा बाँचिन्या ले,” है दाद, 51 याइरसए उझिमक याकेसोत छुतरालाई ओलस बाव मायाद पत्रुस, यूहन्ना, याकूब सोनो नो लुज़ाए ओबाबु ओआमानी वाज़ लाँद झिमल पसिकेर। 52 नल नो लुज़ाए उजूनी मिँर बने याघर्ज्याव रँ:द येसुए, “ताघर्च्यो, लुज़ा मासिए, अइज़ डल्द ले,” है ओरादोक ते, 53 नो घर्ज्यावराए ‘सिधुव ज़’ लिन्या यासैवए येसुलाई हसैकेर। 54 हा:त ज़ येसुए नो लुज़ालाई उकुइनी क्यो:द, “अ बुची सोनिके,” है ओदोव प्राईना ज़, 55 उपुरूस ओल्द हुद सोके। नकिन येसुए, “आवलाई ज्ञयान्यार जैदिचिके,” है यादोक्यो। 56 येसुए ओयेन रँ:द नो लुज़ाए ओबाबु ओआमानी अचम्ब ज़ ताकिनी। खाली येसुए, “आव येन सुलाई ज़ है तारादोच्यो,” है यादोक्यो।

9

येसुए उसिसर ओरापरीव

(मत्ती १०:५-१५; मर्कूस ६:७-१३)

1 येसुए तछा बाह जना उसिसरालाई खुल्द माचाव पुरूसर पलेन्या सोनो याजोरो हुवरालाई सगराँन्या सक्तीर याद, 2 परमेस्वरए ओराज्यालाव पाँ सथैना सोनो याजोरो हुवरालाई सगराँना अइ लिद यापरीक्यो, 3 “येमत जेबाक जेस काता ज़ तालाँच्यो। झुइ तादी ब, झैँ तादी ब, अर्नी तादी ब, पैसा तादी ब, फेरैसिन्या क्वा तादी ब काता ज़ तालाँच्यो। 4 जो नाखारल जेबाज्या, जेमापुलुसा पै तोबो झिमक वाज़ लिच्यो। 5 फरी जेबाव नाखारल जेलाई ल्यो यामायाचिकिन ननी जेपुलुस्क नोरालाई चेतावनी यान्याए जूनी

जेखँताव गालो धुइरो नल ज़ थरैद ख्यानैद याराएच्यो,” है लिद यापरीक्यो। ⁶ है जैद नोर येसुए ल्योनी पुलुसुद नाखार नाखारल चाव था सथैए सथैए, याजोरो हुवरालाई सगराँए सगराँए बाकेर।

⁷ गालील खन्दलाव राजा हेरोदए येसुए ओदोज़्याव येनर थैद उथुपुल ताके। येसुए उजूनी ख्वाराए, “रील सछैँज्याव यूहन्ना जन्द हुद ले,” है यादोज़्याव। ⁸ ख्वाराए, “एलिया फरी हुद ले,” है यादोज़्याव। ख्वाराए फरी, “काताकाव भाःकाव अगमबक्ता सिउनी सैसिद उहुव सा,” है यादोज़्याव। ⁹ हेरोदए है लिके, “यूहन्नालाई ते डा ज़ ओडैँ च़मूद सैःव डारापरींव ची। आव इताव येन दाज्याव सु ओताव?” लिद नोलाई तखेप सरेसो ओपैँज्याव।

येसुए पाँच हजारलाई भरेस ओरायो

(मती १४:१३-२१; मर्कूस ६:३०-४४; यूहन्ना ६:१-१५)

¹⁰ येसुए नो ओरापरींव ओसाचीर ओल्द हुद, यादोव येन भरी है दोकेर। नकिन येसुए नोरालाई सुए यामासैद बेथसेदा यादोज़्याव नाखारदा यालाँक्यो। ¹¹ छीनी माहोल्याराए ओबाव सैद ओल्योदा ज़ बाकेर। याहुज्याव रँःद येसुए नोरालाई ओल्योक हुव याद परमेस्वरए ओराज्यालाव पाँ यासथैक्यो सोनो याजोरो हुवरालाई ब यासगराँक्यो।

¹² जाँ रिमदा रिमदा बाह जना उसिसर ओल्योक हुद, “आव माहोल्यारालाई यापरीके। गे इताव साइँसुइँवक गेलिज्या। हो ताकिन आजीलाव नाखार जीदा बासिन्या बासर खिम्द ज़्यावर लँःद घज्युनारक,” है यादोक ते, ¹³ येसुए, “आवरालाई ज़्यावर जे ज़ याव ताके,” है ओरादोक ते, उसिसराए, “गेस भरेस पाँच गोता, डाँः नेब्लो वाज़ लिज्या। सैँ ज़्यावर लँःद रैघान्या है नलिज्याव?” है दोकेर। ¹⁴ नो माहोल्यार खेपार वाज़ पाँच हजारा याल्यो।

नकिन येसुए उसिसरालाई नो माहोल्यारालाई पचास पचासलाव

ताना जैद सोचोइँव यापरींक्यो। 15 नोराए हैज जैद प्राइँलाई यारासोचोइँकेर। 16 नकिन येसुए नो पाँच गोता भरेस सोनो नेब्लो डाँ: उकुइत रैद स्वर्गदा भाल्सिद, असिक निद भरेसर डाँ:र के:द, उसिसरालाई माहोल्याराए याड़ाक याड़ाक झा:द्याव यापरींक्यो। 17 नोर प्राइँए याफू तसी ज़्याद यासयेलोर यादुपूक बाह झुर्नु ताके।

पत्रुसए येसुलाई खीस लिन्या ओथरैव

(मती १६:१३-२३; मर्कूस ८:२७-३३)

18 छींनी तछा येसु उसिसरास बाद ओबातड ज़ ओपोंखारिज्याव। पोंखारिद ओखेमोत उसिसरालाई, “माहोल्याराए डालाई सु है दाँज्यार?” है ओरादोक ते, 19 उसिसराए, “ख्वाराए रील सछैँज्याव यूहनना है दींज्यार, ख्वाराए एलिया है दींज्यार, ख्वाराए फरी काताकाव भा:काव अगमबक्ता सिउनी सैसिउ ताखेहो है दींज्यार,” है दोकेर। 20 येसुए फरी, “जे डालाई सु है जेदाँज्या नी?” है ओरादोक ते, पत्रुसए, “नँ परमेस्वरनी हुव खीस ज़,” है दोक्यो।

21 नकिन येसुए, “आव पत्रुसए है ओल्यो पाँ सुलाई ज़ है तारादोच्यो,” लिद नोरालाई अर्थेद, 22 “डा मिँ मिन्सिउए कुधु दुखर दैद आव गेदेसलाव स्मेर, मुख्या पुजारीर सोनो सास्त्रीराए ल्योनी सोसी निन्या डातारिज्या। नोराए यासै:नाव सोलात सिउनी सैसिद डासोरिज्या,” है यादोक्यो।

येसुए उसिस जैसिन्या

(मती १६:२४-२८; मर्कूस ८:३४-९:१)

23 नकिन फरी माहोल्याराए ल्योदा भाल्सिद प्राइँलाई ज़, “जोए डास हुन्या युँ दोज्याव, होए उजिउए मया मादाद दिनकाव ज़ क्रुसत सिन्या मिताव दुखर सहिद डाछीत उहुक। 24 जोए आव उजिउत ओललाई तान्या वाज़ खिमज़्याव, होए उजुनीलाई समैज्याव। फरी जोए आव उजिउत उजिउए मया मादाद डा डाजूनी दोज्याव, होए

जुनी दैरिज्याव। ²⁵ जोए आव मानुवात लिज्याव भरी दैद उजुनीलाई ओसमैकिन नोलाई काता ची ता? ²⁶ जो आव बेलाक डा सोनो डापांत ओलाज हुज्या, डा मिं मिन्सिउ ब फरी छैव डाचाकर्यारास डाबाबुए ओज्गै मगैरास डाहुक डा ब नोलाई रँ:द डालाज हुन्या ले। ²⁷ डा साचो है डादाचिज्या, आकाव च्याँ:सिद लिज्यावरानी जे ख्वा ख्वाराए परमेस्वरए ओराज्या जेमारँ:वा पै सिन्या जेमाले,” है यादोक्त्यो।

येसुए ओज्गै ओसरै:व

(मती १७:१-८; मर्कूस ९:२-८)

²⁸नो है ओरादोव छचामकिन तसातावाक येसुए ओलस पत्रुस, यूहन्ना सोनो याकूबलाई लाँद तोबो गोंत पोखारिनाक्त्यो। ²⁹ नक येसुए ओपोखारिज्यावत ज़ ओडा:र चबनै त्तोसिद ओक्वार ब तक तकौ ताद मी झी:न्या ताके। ³⁰ हा:त ज़ फरी मोसा सोनो एलियानी हुद येसुस पाँकेर। ³¹ नोनी ब बनै ज़गै ज़गैवनी निरै:ज्याव। सोनो येसुए यरूसलेमल उजिउ ओझा:रिज्यावए जूनी यापाँज्याव।

³²पत्रुस डादा ओनैनिस यामीर पातिद डल्द यालिज्याव। यासैसिउत येसु ओज्गै मगैस नो मिंनिस ओपाँज्याव यारारँ:केर। ³³ नकिन मोसा सोनो एलियानी येसुस भा:सिद निबाज्याव रँ:द पत्रुसए येसुलाई, “अ गुर्बा, गे आक लिन्या बनै चाव लिज्या। गे जेलाई सोम्लो पाल तज़ैद गयाक्त्यो, तोबो नँलाई, तोबो मोसालाई, तोबो एलियालाई,” है दोक्त्यो। पत्रुस ओछ्याचेए काता पाँन्या लिन्या ब ओमासैज्याव।

³⁴ओपाँज्याक ज़ बादल तोबो हुद नोरालाई याकपूक्त्यो। उसिसर बनै छे:केर। ³⁵ नो बादल जीनी तोबो गा अइ लिद थास्के, “आव डा डाछाँतिउ डाज़ा ज़, जे आवए ओपाँ थैक्त्यो।” ³⁶ ना: ओपाँवत नक येसुलाई वाज़ रँ:केर। नो सोम्लोराए फरी नो यारँ:व भरी हा:

बेलाक सुलाई ज़ है मारादोकेर।

माचाव पुरूसए ओक्योःव छोर्या

(मत्ती १७:१४-१८; मर्कूस ९:१४-२७)

37हो पराःती नो गोंतिन याझरिउत मिँर बनै माहोल्या येसुस दैसिना हुकेर। 38नो माहोल्यारानी तोबोए, “अ गुर्बा, नँस डाबिन्ती लिज्या। डाज़ा तोबोका तोबो ज़ लिज्या, नोलाई नयुँ नाद चिऊद्याँके। 39नोलाई कैताक माचाव पुरूसए क्योःद, चिर चिर क्रिउ परींद, उमँःजानी ख्याङ्ग्याँ खेङ्गे जैद ओयाःनी फुइ गज्या पलेःद बनै दुख ओमाएवा पै मारासो। 40नसिसरालाई ‘पलेःदिचिके’ है डारादोक ते मापलेःधुकेर,” है दोक्यो। 41नकिन येसुए नक लिज्यावरालाई, “ए जेयुँ माहुबोर, परमेस्वरस माखैवर, डा जेस खा ची डालिरिज्याव, खा डासहिचिके!” है दाद छोर्याए ओबाबुलाई, “नज़ालाई आदा रैके,” है दोक्यो। 42ओबाबुए ओरैज्यावत ज़ नो पुरूसए छोर्यालाई नक ज़ पछारिद खागरा खगर० जैक्यो। है जैद येसुए नो माचाव पुरूसलाई हप्कैद पलेःद्याद सोजोकाव जैद ओबाबुलाई एक्यो। 43नकाव लिज्यावर परमेस्वरए अचम्बलाव ओसक्तीर रँःद अचम्ब ज़ ताकेर।

येसु उसिन्याए जूनी फरी ओपाँव

(मत्ती १७:२२-२३; मर्कूस ९:३०-३२)

नोर अचम्ब ताद यालिज्याक ज़ येसुए उसिसरालाई, 44“आव डापाँ जेर्ना घ्याँ जैद थैच्यो। डा मिँ मिन्सिद हुवलाई मिँराए याकुइत सँपिनारिज्यार,” है यादोक्यो। 45नोराए नो पाँ यामाबुझिदी ब येसुलाई सुधिन्या छेःकेर। नो पाँए ओअर्थ कप्सिउ उलिज्यावए माबुझिधुकेर।

घेप्पा जैसिन्या पाँ

(मत्ती १८:१-५; मर्कूस ९:३३-३७)

46नकिन येसुए उसिसर या याल, “गे सु घेप्पा गेलिज्याव?” लिद

याखर्लेसिज्ञ्याव। 47 नोर याखर्लेसिज्ञ्याव सैंद येसुए तोबो जिम्ज़ा लुज़ालाई रैंद ओलापक सच्यौंद, 48 उसिसरालाई है यादोक्त्यो, “जोए डा डामिनत आव मिताव जिम्ज़ारालाई यासुम्ज्ञ्याव, होए डालाई मनी सुम्नाज्ञ्याव। डालाई सुम्ज्ञ्यावए फरी डालाई वाज़ माःक, डालाई परीज्ञ्यावलाई ब सुम्ज्ञ्याव। है जैद जे जेखार्ल जो सज़िम्सिज्ञ्या, हो ज़ घेप्पा लिज्ञ्या।”

गेकिन तँदा लिज्ञ्यावर

(मर्कूस ९:३८-४०)

49 फरी यूहन्नाए, “गुर्बा, तोबोए नमिननी माचाव पुरूसर ओरापलेज्ञ्याव गेरेंके। नो गेस ओमाल्योए नोलाई पलेव गेमाएके,” है ओदोक ते, 50 येसुए, “नोलाई तावैच्यो। जो जेकिन तँदा माजैसिए, हो जेस ज़ लिज्ञ्या,” है दोक्त्यो।

सामरियालावराए येसुलाई ल्यो यामायो

51 येसु स्वर्गदा बान्या बेला उहुनावए यरूसलेमदा बान्या पक्का युँ दाद, 52 उज्ज़नी पोर जैन्याए जूनी तोबो नेब्लो उमीर ड़ादा ज़ यापरीक्त्यो। नोर सामरिया खन्दलाव तोबो नाखारल बन्दोबस्त जैनाकेर। 53 नो नाखारलावराए फरी, येसुए यरूसलेमदा बान्या उयुँ थू ओजैवए नल ल्यो माएकेर। 54 निताव रेंद उसिसनी याकूब सोनो यूहन्नानी येसुलाई, “अ प्रभु, सैं आवरालाई नमतिन में: सवाद्याद चुयाप जैन्या?” है निदोक ते, 55 येसुए, “निताव जैन्या माःक,” है दाद नोनिलाई सिडार्द, 56 छुत नाखारदा बाकेर।

येसुस बाव पैज्ञ्यावर

(मत्ती ८:१९-२२)

57 याबाज्ञ्याक येमक येसुस तोबो दैसिद, “नँ जोदा नबाज्ञ्या, डा ब होदा ज़ डाबाया,” है ओदोक ते, 58 येसुए, “स्यालर लिन्या कुँ लिज्ञ्या, बाज़ार लिन्या सिप ब लिज्ञ्या। डा मिँ मिन्सिद हुवलाई ते

डै कपन्या पो ब माले,” है दोक्यो।

59 फरी येसुए तोबोलाई, “डास हुन्के,” है ओदोक ते, नोए, “अ प्रभु, डादा डाबाबुलाई डागादैदा,” है दोक्यो। 60 येसुए फरी, “सिउरालाई सिउ स्यासोराए घरागादैज्यारक, नँ भन्या परमेस्वरए ओराज्यालाव पाँ सथैना बान्के,” है दोक्यो।

61 फरी छुत तोबो हुद, “प्रभु, डा ते नँस ज़ डाबारिज्या, खाली डादा डाझिमलावरास तखेप बिदा डानिनारिज्या,” है ओदोक ते, 62 येसुए नोलाई, “एँ: कीक घोर क्यो:द उछींदा भालसिज्याव मिँ परमेस्वरए ओराज्याल पसिन्या स्यासो माताए,” है दोक्यो।

10

प्रभुए सत्तरी जनालाई खतैद ओरापरीव

1 नकिन जाँवाक प्रभुए उसिसराकिन छुतर सत्तरी जनालाई खतैद नेबेरेँ नेबेरेँ जैद ओल ओबारिज्याव पो पोड डादा बान्या याजैक्यो।

2 नोरालाई दुप्द है यादोक्यो, “तामर चिकार यामी:नाव मिताव, परमेस्वरए ओराज्याल हुन्यार कुधु ज़ ताद लेर। खाली नोरालाई रैन्या बाहोर्यार ते छ्या ज़ ताकेर। है जैद नोरालाई रैन्या मिँ ओरापरीवक लिद परमेस्वरलाई पोँखारिच्यो। 3 जे फरी जोगोइसिद बाच्यो, जेलाई प्र मितावराए खाल बेधा पाथा मितावर जैद डापरीचिज्या। 4 जेबाक पैसा ब तालाँच्यो, झैँ ब तालाँच्यो, पोला ब तालाँच्यो। काङ्क ज़ ताँपै तोँपै मालिद ज़ बाच्यो।

5 “जो झिमक जेपसिज्या, डादा ‘आव झिमलाई चाव ओताक’ है लिच्यो। 6 नल घच सहिन्या मिँर यालिकिन, नो जेरायो असिक नोराए याक्याँत ज़ रहिरिज्या। फरी नलावर घच मासहिन्यार यालिकिन, जेअसिक याक्याँत रहिन्या माले। 7 फरी जो झिमक ल्यो याचिज्यार, हो झिमकिन आदा होदा माबाद जो याचिज्यार हो ज़ ज्याद ओद लिच्यो। जो येनत तादी ब येन दाज्यावए ओजेला

दैव ज़।

8“फरी जो नाखारल जेबादी ब जेलाई ल्यो यायाचिकिन, जो मिताव ज्ञ्याव याचिज्ञ्यार हो ज़ ज्ञ्युच्यो। 9 नलाव याजोरो हुवर ब यारासगराँच्यो। नोरालाई ‘परमेस्वरए ओराज्ञ्या सो हरिके’ है यारादोच्यो। 10 फरी जो नाखारल जेलाई ल्यो यामायाचिकिन, दोहाक बाद, 11 ‘जेनाखारलाव गेखँताव गालो धुइरो ब आल ज़ थरैद ख्यानैद गयाचिज्ञ्या। खाली आव ब सँच्यो, परमेस्वरए ओराज्ञ्या सो हरिके,’ है यारादोच्यो। 12 डा जेलाई है डादाचिज्ञ्या, परमेस्वरए फाल्न्या छचाम नो नाखारलाव मिँराकिन बुरू सदोमलावरालाई सहिधुन्या तारिज्ञ्या,” है यादोक्च्यो।

यायुँ माफकैज्ञ्याव सहरर

(मत्ती ११:२०-२४)

13“हिताव ज़ जे खोराजीन सोनो बेथसेदालावरालाई थैए माँतकन ज़ लिज्ञ्या। जे जेरँ:व परमेस्वरए ओसक्तीलाव येनर तुरोस सोनो सीदोनलावराए यारँ:व ताकिन आ: झरी यापापए जूँनी यायुँ माचाव दाद बर्ला सुर्सिद धुलील चुसिद यायुँ फकैद यापापर रास्धुखेरहो। 14 है जैद परमेस्वरए फाल्न्या छचाम जेकिन बुरू तुरोस सोनो सीदोनलावरालाई सहिधुन्या तारिज्ञ्या। 15 हिताव ज़ फरी जे कफर्नहुमलाव मिँर, स्वर्गत केसो मितावर जेडम्सिज्ञ्या, झन नर्गल ज़ बान्या जेले।”

16नकिन येसुए उसिसरालाई, “जोए जेपाँ थैज्ञ्याव होए डा डापाँ ब थैज्ञ्याव। हिताव ज़ जोए जेलाई मासुम्चिउ, होए डालाई ब मासुम्नाव। फरी जोए डालाई मासुम्नाव, होए डालाई परीज्ञ्यावलाई ब मासुमो,” है लिद यापरीक्च्यो।

सत्तरी जना ओल्द हुवर

17छींनी नो सत्तरी जना बाद ओल्द याहुवत येसुए ल्योक बनै रें रें बाद, “प्रभु, नँ नमिननी माचाव पुरूसर ब गेपाँ धूँल ज़ ताकेर,” है यादोक ते, 18 येसुए, “सैतानलाई बिजुली मिताव नमतिन ओतेहुज़्याव डारँ:के। 19 डा सैतानए ओसक्ती भरी जेधूँल ज़ जैद नैद डयाचिए। है जैद ज़ निताव घुल स्यासोर बिछी स्यासोर जेराछिल्क कै मै ज़ जेमाताके। 20 हैदी ब ननी जे तारेच्यो, बुरू स्वर्गत जेमिन सर्द नैसिउ उलिज़्यावनी रेंच्यो,” है यादोक्यो।

येसु ओबाबु परमेस्वरस ओपाँव

21ना:त ज़ येसु छैँव पुरूसनी बनै रेंद, “अ बाबु, नाम नमलावराए याडैताव, नँलाई धन्याबाद डाचरै:निज़्या। नँ नपाँर सैन्या जैसिज़्यावर, याबुद्धी ल्यो जैसिज़्यावरालाई सतैद मायाद, भाउज़ा मितावरालाई सतैद नराएके। हैज़ बाबु, नल्योदा बान्या येम नो ज़ चाव नथरैके,” है लिद पोखारिक्यो।

22नकिन येसुए, “ताव भरी डाबाबुए डाकुइत ज़ याद नैनाव। किताव परमेस्वरए वाज़ ओज़ालाई सरेसूज़्याव, हिताव ज़ ओज़ाए वाज़ परमेस्वरलाई सरेसूज़्याव। है जैद डा छुतलाई सतैद डाएकिन वाज़ होए परमेस्वर डाबाबुलाई सरेसूधुज़्याव,” है यादोक्यो।

येसुए ओपाँ थैद असिक दैवर

23नकिन येसुए उसिसरालाई अलगज़ा है यादोक्यो, “जे जेरँ:व भरी रँ:ज़्यावर असिक दैवर ज़। 24 डा जेलाई है डादाचिज़्या, अगमबक्तर, घेप्पा राजाराए ब आव जे जेरँ:व पाँर रँ:न्याए जूनी यायुँ थू जैद ब रँ:व मादैकेर, थैन्या युँ दाद ब थैव मादैकेर।”

चोरराए याप्रोवलाई समारिज़्याव मिँ

25येसुलाई जाँचिन्याए जूनी, तछा कानुनलाव तोबो यागुर्बा हुद, “अ गुर्बा, डा अजम्बरी जुनी दैन्या किताव दान्या?” है ओदोक ते, 26 येसुए, “मोसाए ओकानुनल किताव सर्सिउ उलिज़्याव, नोए

ओअर्थ किताव नथरैजूयाव?" है दोक्यो। 27 नो कानुनलाव यागुर्बाए फरी, " 'जेयुँलाई आदा होदा मादुलैद, जेसा मामाँद, जेप्रभु परमेस्वरए ल्योदा युँ थू जैद ओललाई वाज्र मया दान्या,' सोनो, 'जेक्याँलाई किताव जेसमारिजूया, नैं मेंलाई ब हिताव ज़ समारिन्या,' " है दोक्यो। 28 येसुए, "थिक ज़ है नदौके। आव भरी नदोकिन ननी ज़ अजम्बरी जुनी दैन्या नले," है ओदोक ते, 29 नो कानुनलाव यागुर्बाए ओल थिक उलिजूयाव सतैन्याए जूनी, "डानैं डामेर कितावर तार?" है दोक्यो।

30 है जैद येसुए अइ लिद घर्ती तोबो झा:दिक्यो, "तोबो मिँ यरूसलेमनी यरीहोदा ओबाजूयाक चोरराए फेला पारैद, प्रोद, ओक्वार हाइद लाँद, ओललाई येमक ज़ लल्यातोरो जैद ख्यानैकेर दी। 31 कातानी तोबो पुजारी नो येम हुद नो याप्रोव मिँलाई रँ:द झन तँनिकाव घ्याँ बाके दी। 32 फरी तोबो लेबी* थरलाव मिँ हुद नोए पाला नोलाई रँ:द तँनिकाव घ्याँ ज़ बाके दी। 33 बलल तोबो तादादा बाजूयाव सामरियालाव मिँ हुद, नो याप्रोवलाई रँ:द, उयुँ नाद, 34 ओल्योदा बाद, ओघाइर छेद्याद, वास:र झा:द, क्वाराए पो:द्याद, गधाहा तर्त झा:द तोबो भत्तीक लाँद पाथस नैक्यो दी। 35 हो परा:ती नो भत्ती वालालाई, 'आव मिँलाई पाथस नैयो,' है दाद चाँदीए सिक्का नेब्लो याद, 'आवकिन आगल्या ओलागिकिन फरी डाहुक डायौ,' है दाद ख्यानैक्यो दी।"

36 नकिन येसुए नो कानुनलाव यागुर्बालाई, "नो सोम्लोरानी नो चोरराए याप्रोवए ओनैं काताकाव ताया?" है ओदोक ते, 37 नो कानुनलाव यागुर्बाए, "नो उयुँ नाजूयाव ज़," है दोक्यो। येसुए फरी, "नँ ब बाद हिताव ज़ दोयो," है दोक्यो।

10:27 10:27 लेबी १९:१८; ब्य ६:५ 10:28 10:28 लेबी १८:५ * 10:32 10:32 लेबी है लिन्या ध्यान झिमल येन दोजूयाव मिँ ज़। 10:34 10:33-34 २ इति २८:१५

मार्था सोनो मरियमनी

38 येसु उसिसरास यरूसलेमदा याबाजूयाक येमक तोबो नाखारल पसिकेर। नो नाखारल मार्था यादोज्याव तोबो मेंमाए येसुलाई बनै मानस उझिमक लाँक्यो। 39 मार्थाए ओबैनी मरियम ब नल ज़ उलिज्याव। नो येसुए उखँक चुसिद ओपाँ बनै धिद ओथैज्याव। 40 मार्थाए ते ज़्यावर काता कातार ओजैज्यावए नो पाँ थैव मादैक्यो। है जैद मार्था येसुए ल्योक बाद, “प्रभु, डाबैनीए आव येनत ओमासघैनाज्याव नरं:ज्याखेहो। नोलाई नँ तखेप है दाद्याव ताके,” है ओदोक ते, 41 प्रभुए, “अ मार्था माँजा, नँ काताए जूनी प्राइँत वीनी फुइ नताज्याव? 42 खास तोबोए ओचाहित वाज़ लिज्या। नो ओचाहित ल्यो मरियमए रैद ओनैज्याव पाँ ज़। है जैद नो रैद ओनैज्याव नोनी सुए ज़ मालाँधुव।”

11

पोंखारिन्या

(मत्ती ६:९-१३)

1 येसुए तछा पोंखारिद ओखेमोत, उसिसरानी तोबोए, “प्रभु रील सछैँज्याव यूहननाए उसिसरालाई पोंखारिन्या ओरासिऊव मिताव गेलाई ब पोंखारिन्या सिऊसियो,” है ओदोक ते, 2 येसुए, “जेपोंखारिक इतावनी पोंखारिच्यो,

‘परमेस्वर बाबु, नमिन प्राइँए ज़ छैँव ओथरैरक।

स्वर्गताव नराज्या आव नामल उहुक।

3 गेलाई चाहिज्याव ज़्याव दिनकाव ज़ जोरैद्यासियो।

4 नउपर्त गेदोव पापरानी रास्सियो।

हो मिताव ज़ गे ब मिँराए गेउपर्त यादोव पापरानी गेरारासूज्या।

सोनो गेलाई माचाव चेतैन्यारानी जोगोइसियो,

है लिच्यो,” है यादोक्यो।

ओनैए ल्योक भरेस निज्याव

(मत्ती ७:७-११)

५फरी येसुए उसिसरालाई है यादोक्यो, “जेनी तोबोए जेनै लिज्याखेहो। आधा रील नो जेनैए ल्योक बाद, ‘अ डानै, भरेस सोम्लो लोइव ताके। ६ तोबो डानै बनै तादानी हुद ले, डा नोलाई यान्या काता ज़ माले,’ है जेदोकिन, ७ नो झिमलावए, ‘डालाई दुख तायाँ, यामर डागल्धुके, डाज़ारास स्याँद गेले। डा सोद नँलाई डामाईधुइ,’ है उलिकिन, ८ नोए नै नै नित्तावए ओमाएदी ब फरी ओनैए ‘मायाद माताए’ लिद जात्त ज़ ओमारासोए करनी वाज़ उन्नित भरी एक्यो।

९“हिताव ज़ डा जेलाई है डादाचिज़्या, परमेस्वरस जेन्किन जेलाई यान्या ज़ ले, जेखिम्किन दैन्या ज़ जेले, याम कोतो कोतो जेजैकिन जेजूनी फैसिन्या ले। १० जोए निज्याव होलाई यान्या ले, जोए खिमज़्याव होए दैन्या ले, जोए कोतो कोतो जैज़्याव होए उजूनी फैसिन्या ले। ११ जेनी किताव बाबु लिके? [ओज़ाए भरेस उन्निकिन लुँ यान्या?] डाँ: उन्निकिन घुल यान्या, १२ बाज़ुरी उन्निकिन बिछी यान्या? १३ है जैद जे नित्ताव पापल लिज्याव मिँराए जेज़ारालाई नित्ताव चाव चाव यान्या जेसैकिन, स्वर्गताव जेबाबुए इन ओलस जेन्किन छैँव पुरुस कै जैद मायाचिउके?”

येसुलाई सैताननिकाव याजैव

(मत्ती १२:२२-३०, ४३-४५; मर्कूस ३:२०-२७)

१४फरी तछा येसुए तोबो मिँए ओक्याँनी माचाव पुरुस पलेदिक्यो। नो पुरुस मापाँधुन्या लाता जैज़्याव पुरुस ओल्यो। नो पुरुस उपुलुसो प्राइँना नो मिँ पाँधुन्या ताके। नित्ताव रँद नक लिज्याव माहोल्यार अचम्ब ताकेर। १५ ख्वा ख्वाराए, “आवए ते माचाव पुरुसराए याघेप्पा बालजिबुलए उमिननी ओरापलेज्याव ची,” है लिकेर। १६ ख्वाराए फरी येसुलाई जाँचिन्याए जूनी, “स्वर्गताव

नसरेस तोबो सतैके,” है यादोज्ञयाव। 17 येसुए नोराए यायुंलाव पाँ सैद, “तोबो राज्यालाव मिँर या या यामाखैकिन नो राज्याए उमिन ज़ माज़्या। हो मिताव ज़ तोबो झिमलावर या या यामाखैकिन चितराँ पुतराँ तान्या लेर। 18 हिताव ज़ सैतानए ओराज्यालावर पाला या या यामाखैकिन नोराए यामिन कातानी ओरहिरिज्ञयाव? जे ते झन डालाई ‘बालजिबुलए उमिननी माचाव पुरूसर यापले-ज्ञयाव’ है जेदाँज्ञया। 19 डा ननी डारापले-ज्ञयाव ताकिन जेसकावराए कातानी यारापले-ज्ञयाव? है जैद नो जेपाँ जेसकावराए ज़ जेडैत फुलुपुद्यान्या लेर। 20 खाली डा परमेस्वरए ओसक्तीनी डारापले-ज्ञयाव ताकिन परमेस्वरए ओराज्या जेखार्ल ज़ हुद ले।

21“तोबो ओसा ल्यो मिँए ओहत्यारर रैद उझिमलाई उगुकिन नोए उझिमलाव भरी सुए ज़ मालाँधुर। 22 नोकिन ओसा ल्यो हुद खपुद ओहारैधुकिन वाज़ ओहत्यारर नैद उझिमलाव जा-यार हाइद लाँद भाःन्या ले।

23“जो ड़ास माखैए, हो डाकिन तँदाडाव ज़ लिज्ञया। फरी जोए ड़ास मादोव, होए ज़ डापाँ बले-ज्ञयाव।

24“मिँनी पलेःसिउ माचाव पुरूस नो मिँए ओक्याँनी उपुलुसोत री माल्यो साइँसुइँवक नासिन्या पो खिम्नाज्ञयाव। लिन्या पो ओमादैकिन फरी ओल्द ड़ादाडाव उपुलुसोए ओक्याँत ज़ पसिउ पैज्ञयाव। 25 नल ओबाक स्यासी जैद थिक थाक जैसिउ पो रँःद, 26 ओलकिन माचाव पुरूसर सात गोता ओलस रैद नल पसिद नो मिँलाई ड़ादाडावकिन झन ज़ माचावए क्योःज्ञयाव,” है यादोक्यो।

असिक दैवर

27येसुए नाः ओपाँवत नो माहोल्यारानी तोबो मेंमाए येसुलाई, “नँलाई जर्मैद नुइँ सवैव मेंमा असिक दैव लिज्ञया,” है ओदोक ते, 28 येसुए, “नोकिन बुरू परमेस्वरए ओपाँ थैद ओपाँ दोज्ञयावर

असिक दैवर लिज्जयार,” है दोक्यो।

योनाए ओक्याँत ताव सरेस

(मत्ती १२:३८-४२)

29 माहोल्यार झन ज़ माहोल्या यातावत येसुए है यादोक्यो, “आव जुकलाव मिँर बनै पापीर लिज्जयार। डासरेस वाज़ खिमूज्जयार। खाली यादैरिज्जयाव सरेस ते योनाए ओक्याँत ताव सरेस वाज़ दैरिज्जयार। 30 किताव योनाए ओक्याँत ताव पाँर निनवे सहरलाव मिँरालाई सरेस ओताव, हिताव ज़ डा मिँ मिन्सिद हुवए डाक्याँत हुरिज्जयाव पाँर ब आव जुकलाव मिँरालाई सरेस तारिज्जया। 31 नो दखिन देसलाव रानीए परमेस्वरए ओपाँ सोलोमनए ओयाःनी थैना बनै तादानी हुके। जे जेखार्ल हुद लिज्जयाव ते सोलोमनकिन झन घेप्पा लिज्जया। है जैद परमेस्वरए ओराफाल्रिज्जयाव छचाम आव बेलाकाव मिँराए यागल्ती नो रानीए ओक्याँनी ज़ थ०रिरिज्जया। 32 हो मिताव ज़ नो निनवे सहरलाव मिँराए योनाए ओरासथैव पाँर थैद परमेस्वरए ल्योदा यायुँ फकैकेर। जेखार्ल हुद लिज्जयाव ते योनाकिन ब घेप्पा लिज्जया। है जैद परमेस्वरए ओराफाल्रिज्जयाव छचाम नोराए याक्याँनी ब आव बेलाकाव मिँराए यागल्ती थ०रिरिज्जया।”

क्याँताव बत्ती

(मत्ती ५:१५; ६:२२-२३)

33 “सुए ज़ लोसै तैःद मारैःवल ब मानैव, जाए ब माकबो। बुरू ‘झिमल पसिज्जयावरालाई पलाँ घताक’ लिद दिउ बाल्न्यात झाःज्जयाव। 34 हिताव ज़ जेक्याँताव बत्ती जेमी लिज्जया। नो जेमी चाव उलिकिन जेक्याँ भरी पलाँव ज़ ताज्जया। फरी नो जेमी ज्जाज्जया जिझिव उलिकिन जेक्याँ भरी ओपोःस ज़ चुम चुमोल ताज्जया।

35 है जैद नो जेक्याँताव पलाँव ताव परिन्या चुम चुमो ताताक।
36 पलाँवल लिज्याव मिँ चुम चुमोल माताद दिउ बाल्न्या डाकाव
जगैवल उलिज्याव मिताव लिज्या।”

येसुए फरिसीराए यापाहा झाःद ओरायो

(मत्ती २३:२५-२६)

37 येसुए नो पाँ भरी ओरासथैवत तोबो फरिसी हुद येसुलाई
काँ यान्याए जूनी खुल्क्यो। येसु नोए उझिमक बाद, 38 उकुइ
माचोखोइद ज़ ज़यान्यात थूसिके। नो फरिसीए निताव रँःद बनै
हार मानिक्यो। 39 प्रभुए नोलाई, “जे फरिसीर, ताथीर खुरीर
जेराचोखोइज्याव नो पाखाताव वाज़ लिज्या। जेयुँल ते लोभ सोनो
माचाव वाज़ जेनैज्या। 40 ए जेती माल्योर, परमेस्वरए पाखाताव
जेक्याँ वाज़ जैद ओयाचिउ माःक, जेयुँ ब जैद्याचिक्यो। 41 जेयुँनी
माथैव मायोःवरलाई जेराचिऊकिन जेयुँ ब चोखो तान्या ले।”

फरिसीरालाई थैए माँतकन

(मत्ती २३:१-२४, २७-३६; मर्कूस १२:३८-४०)

42 “जे फरिसीरालाई थैए माँतकन ज़ लिज्या। जे तके दँ जरार घोद
दस भा जैद तभा भितील जेझाःज्या। नो जेदोज्याव ते चाव ज़,
खाली नत वाज़ जेयुँ थू जैद झन ओचाहित ल्यो सतस दान्या सोनो
परमेस्वरए ल्योदा युँ थू जैन्या भरी जेरास्के। जे झन नो ओचाहित
ल्योलाई ब रासो मापरिन्या।

43 “फरी ब जे फरिसीरालाई थैए माँतकन ज़ लिज्या। जे सघ्योःसिद
धर्मसास्त्र झिमराल प्राइँराए रँःन्या पोक चुसिउ जेपैँज्या। बजार
जीदा ब ‘मिँराए धो घदासिरक’ लिद जेदुलिरिज्या।

44 “जेलाई थैए माँतकन ज़ लिज्या, जे मारैःव खादर स्यासोर
जेलिज्या। जेल्योदा हुज्यावर मासैँद ज़ बलेसुँयार,”* है

11:42 11:42 लेबी २७:३० * 11:44 11:44 यहूदीराए याचलनल खादर तर्त बाज्याव
मिँ उछुसिज्याव — गन्ती १९:१६।

यादोक्थो।

45 आव भरी थैद कानुनलाव तोबो यागुर्बाए येसुलाई, “गुर्बा, इताव नपाँए ते गेइज्यात ब खुलिद नयासिके,” है ओदोक ते, 46 येसुए, “जे कानुनलाव यागुर्बारालाई ब थैए माँतकन ज़ लिज़्या। जे सुए ज़ यामासयोःधुज्याव कानुनर जैद छुतरालाई वाज़ दाव जेरापरींज्या, जे ताकितर तोबो ओछचो ब जेमाछुए।

47 “जेलाई थैए माँतकन ज़ लिज़्या, जेसाखा पुर्खाराए अगमबक्ता भरिरालाई यारासैःकेर। जे फरी नोराए याखादरर जेराबनैज्या। 48 है जैद जेसाखा पुर्खाराए यादोव येन जे ज़ जेथरैज्या। यारासैःवराए यापो जेबनैक फरी नोरास झन खदेप ब जेलिज़्या। 49 है जैद जे मितावराए जेजूनी परमेस्वरए झदा ज़ थिक है लिद ले। नो पाँ आव ज़, ‘डा नोराए ल्योदा अगमबक्तार सोनो डापाँ सथैन्यार डारापरींज्या। नोरानी ख्वारालाई यारासैःरिज्यार, ख्वारालाई याखिरी पसिद्यान्या लेर।’

50 “है जैद आव संसार सुरू ओतावकिनकाव अगमबक्तारालाई यारासैःव भरिराए याझी आज्यालकाव मिँराए याक्याँत ज़ तारिज्या। 51 ओदाज्युए ओसैःव हाबिलए ओपालाकिन, नो थान सोनो ध्यान झिमनी निखार्लाव यासैःव जकरिया पैकावराए याझी आव बेलाकाव मिँराए याक्याँत लागिस्रिज्या।

52 “जे कानुनलाव यागुर्बारालाई थैए माँतकन ज़ लिज़्या। जे धर्मसास्त्रलाव सर्सिउ परमेस्वरए ओराज्याल पसिन्या साँचा जेमोँके। है जैद जे ननी ज़ परमेस्वरए ओराज्याल पसिउ जेमाभैःए, पसिउ पैंज्यावरालाई ब जे ज़ जेरावैँके,” है यादोक्थो।

53 येसु ननी पुलुस्द ओबाज्याक नो फरिसीर सोनो कानुनलाव यागुर्बार येसुकिन तँदा जैसिद बनै कुधु पाँर सुधिकेर। 54 नोराए यार्थुल ‘ओल ओयाःनी पुलोसो पाँनी ज़ गेक्थोःया’ लिन्या

उलिज्याव।

12

येसुए उसिसरालाई ओरासम्जैव

(मत्ती १०:२६-३३)

1हाः बेलाक बनै माहोल्या मिँर येसुए ओपाँ थैन्याए जूनी छिल्सिवा छिल्सिवा जैसिद बनै याछुइसिज्याव। नो बेलाक ज़ उसंक्त उसिसरालाई इतावनी यासथैक्यो, “जे फरिसीराए यादोज्याव मिताव कप्तें येननी जोगोइसिद लिच्यो। निताव येन सरालिसिज्याव वासः मिताव ताज्या। 2 कप्सिउल लिज्याव भरी तछा प्राईए सैन्या लेर, मोसिउल लिज्याव भरी ब छर्लङ्ग ज़ रैःरिज्यार। 3 है जैद जे आज्याल मोसिद जेपाँदी ब तछा पाखात थास्रिज्या। झिमलाव खुस खुसनी जेपाँव भरी ब थालातिन यारासथैरिज्यार।”

4येसुए फरी, “जे डानैरालाई है डादाचिज्या, जेक्याँलाई वाज़ सैःद छुत काता ज़ माजैधुज्यावर रँःद ताछेच्यो। 5 बुरू जेक्याँलाई सैःद नर्गल ख्यान्या ओहक ल्योलाई रँःद वाज़ छेच्यो। साचो है डादाचिज्या, नोलाई रँःद जुनी ब छेव ज़ परिके। 6 आव ब चेतैच्यो। पाँच गोता बिडर्या नेपैसाल ओमाबिकैज्याव रो? नाः सोङ्गो ओतादी ब परमेस्वरए तोबो ब मारामेंःव। 7 होए जेडैताव जेचेम आः लिज्या लिन्या ब सैज्याव। है जैद काताल ज़ ताछेच्यो। कुधु बिडर्याराकिन होए जेलाई घेप्पा रँःचिज्याव।

8“है जैद डा जेलाई है डादाचिज्या, जोए मिँराए डाक ओलाज माहुद ‘डा येसुसकाव ज़’ है लिज्या, डा मिँ मिन्सिउए ब नोलाई परमेस्वरए ओचाकर्याराए याडाक ‘डासकाव ज़’ है लिन्या डाले। 9 फरी जोए मिँराए डाक ‘डा येसुसकाव माःक’ है दाँज्याव, डा ब परमेस्वरए ओचाकर्याराए याडाक ‘आव डासकाव माःक’ है दान्या डाले। 10 जोए डा मिँ मिन्सिद हुवए डाडैत माचाहिउ पाँर

झाःद डामिन बलेःज्याव, होए ओपाप कयालो दैसिए। खाली जोए परमेस्वरए छैव उपुरूसए उमिन बलेःदिज्याव, नो पाप कयालो मादैसिए। ¹¹ है जैद जेलाई धर्मसास्त्र झिमलाव सेरर, घेप्पा घेप्पार सोनो हाकिमराए याड़ाक यालाँचिकिन, नो बेलाक ‘डा नोरास काता पाँन्या, काता जवाप यान्या ओताव?’ लिद जेयुँ आँचा पाँचा ताजैच्यो। ¹² नो बेलाक परमेस्वरए छैव उपुरूसए जे काता पाँन्या ओल ज़ पैन्या ले।”

मुख्र धनी मिँए ओघर्ती

¹³हाःत ज़ नो माहोल्यारानी तोबोए येसुलाई, “गुर्बा, डादाज्युलाई ‘नभाइस जिनबताहा भाःचिन्के’ है दाघाँसाँ,” है ओदोक ते, ¹⁴येसुए, “डा जेत्याला जैसिद जिनबताहा भाःद्यान्या डा डायेन माःक,” है दाद, ¹⁵नकाव लिज्यावरालाई प्राईलाई ज़, “प्राईनिकाव लोभनी जोगोइसिद लिच्यो। जती उलिदी ब मिँए उजिउलाई धनए साचो जुनी माएधुव,” है लिद, ¹⁶घर्ती तोबो झाःद याएक्यो — “तोबो धनी मिँए ओएँःलाव ज्यावर बनै सैद, ¹⁷उयुँल उयुँल, ‘आःकाव डाज्यावर कान्ल डाससुईःके?’ लिद, ¹⁸‘बुरू डादहरा बुम भरी उफारैद प्राई नल ज़ झाःद, ¹⁹डाक्याँलाई, कुधु बर्स पै चाव चाव ज्याद ओद थाँतस लिनके, है दान्या डाले,’ है लिके दी। ²⁰नो उयुँलाव पाँ परमेस्वरए सैद, ‘ए मुख्र, काता नपाँज्याव इताव? आछिम रील ज़ नस० हाइद डाईरिज्या। नो नदुपो भरी सुए उज्युरिज्याव?’ है दोक्यो दी।

²¹“है जैद जोए ओधन सम्पती परमेस्वरए ल्योदा मादुप्द ओल उजुँनी वाज़ दुपूज्याव, नो आव घर्तीलाव मिँ स्यासो तान्या ले।”

व्रीनी फुइ मालिन्या

(मत्ती ६:२५-३४)

²²नकिन येसुए उसिसरालाई है यादोक्यो, “है जैद डा जेलाई ब है डादाचिज्या, जे जेक्याँ उजुँनी ‘काता डाज्युके, काता

डाक्वाइसिके?' लिद वीनी फुइ तालिच्यो।²³ आव गेजिउ ज्ञ्यान्या क्वाइसिन्याए जूनी वाज माःक।²⁴ कारालाई याराचिऊचिके। नोराए धुर ब माझाःर, क्याःन्या ब माक्यार, ज्ञ्याव ब मादुपर। हितावत ब चाहिज्ञ्याव भरी परमेस्वरए जोरैद याएज्ञ्याव। परमेस्वरए जेलाई झन बाजाराकिन घेप्पा रेंःचिज्ञ्याव।

²⁵“जेनी सुए ची सोगो दाद जेजिउत तघन्ता जेचाःधुरिज्ञ्याव?²⁶ निताव तकेजा येन जेमादोधुकिन जे काराव वीनी फुइ जेलिज्ञ्याव?²⁷ वासर ब याराचिऊचिके। नोराए धामा दाद माखलर। हितावत ब सोलोमन राजा बनै तह महौ ओजैसिदी ब वास तकल माताए।²⁸ परमेस्वरए आछिम वैद पराःती मेंःल बाज्याव छीर नाः चाव याजैज्ञ्याव ल्यो ताकिन जेलाई झन कै जैद माक्वाइचिउके? काता नाः जेयुं माहुबोर जेलिज्ञ्याव!²⁹ हिताव ज्ञ जे ‘काता डाज्युके, काता डाओके’ लिन्यादा जेयुं थू जैद वीनी फुइ तालिच्यो।³⁰ आव भरी ते परमेस्वरलाई मासरेसूज्याव मिराए याध्यावना ची। जे जेजूनी चाहिज्ञ्याव भरी ते परमेस्वर जेबाबुए सैज्ञ्याव।³¹ है जैद जे परमेस्वरए ओराज्ञ्या खिमचिके। हो ताकिन ची जेलाई चाहिज्ञ्याव भरी ओल ज्ञ जोरैद्याचिरिज्ञ्याव।

³²“है जैद जे ज़िमज़ा डाबगालर, ताछेच्यो। जेलाई जेबाबु परमेस्वरए ओल ओराज्ञ्या खुसीस यान्या युं दाद नैव।³³ जे जेसम्पतीर योःद माल्योरालाई भाःद याराएचिके। स्वर्गताव स्वर्क ज्ञ माचिसन्या जेस्याकलर रूप्द नैचिके। नलाव जेदुपो धन कै मै ज्ञ माताए। चोरराए ब मालाँधुर, घुनराए ब माज्युधुर।³⁴ काराव ल्यो ताकिन जोड जेधन लिज्ञ्या, जेयुं ब होड ज्ञ तान्या ले।”

सैसिद लिन्या

(मती २४:४५-५१)

³⁵“जे जेवाँःफोर पोःसिद बत्तीर तैःद झाःसिद लिच्यो।³⁶ भत्यारल

बाव तोबो धनी मिँए ओयेन दाजूयाव मितावर जैसिउ ताके। नोर जो बेलाक तादी ब याघरपती हद ग्राम कोतो कोतो ओजैहुव प्राईना फैदिज़्यार। 37 सैसिद लिद ओयेन यादोजूयाव याघरपतीए ओरादैहुकिन नोर असिक दैवर तान्या लेर। डा साचो है डादाचिज़्या, नो याघरपतीए ओल ज़ झन ओवाँ:फोर पो:सिद ओयेन दाजूयावरालाई सोचोईद ज़्यावर भा:द्यान्या ले। 38 है जैद नो धनी मिँ आधा री उघर्किनावत उहुदी ब, उसंनाक उहुदी ब सैसिद यालिज़्याव ज़ ओरादैहुकिन नोर असिक दैवर लिज़्यार।

39“फरी आव ब सैच्यो, तोबो झिमए ओगेँए ‘चोर आ: बेलाक हुरिज़्या’ लिन्या ओसैकिन झा:सिद लिद उझिम पाव माएखेहो। 40 हिताव ज़ जे मनी सैसिद लिच्यो, काराव ल्यो ताकिन डा मिँ मिन्सिउ मनी जेमासैद उमँ:जानी ज़ डाहुरिज़्या।”

41हा:त ज़ पत्रुसए येसुलाई, “प्रभु, आव नपाँ गेजूनी वाज़ सै प्राईँए जूनी की?” है ओदोक ते, 42 येसुए, “किताव तोबो धनी मिँए सतस दाजूयाव ओतह ल्यो ओनोकोरलाई उझिमलाव येन भरी उकुइत याद ओयेन दाजूयावरालाई थिक बेलाक ज़्यावर यान्या जैद ओख्यानैक, 43 नो नोकोर सतस येन ओदोज़्याव ओघरपतीए ओदैहुकिन नो नोकोर असिक दैव ज़ तान्या ले। 44 डा साचो है डादाचिज़्या, नो ओघरपतीए प्राईँ ज़ उकुइत यान्या ले।

45“फरी नो नोकोरए, ‘डाघरपती हतपूत माहु’ लिद उधूँलाव लिज़्याव बाँदा बाँदानीरालाई प्रोद, ओल ज़्याद ओद मँ:ए मँ:ए ओबारिज़्याक, 46 ओमासैद ओघरपतीए ओदैहुकिन, नोलाई चम चम जैद यायुँ माहुपज़्यावर ओराख्याजूयाव पोल ख्यान्या ले।

47“जोए ओघरपतीए ओयेन सैद ब मादोव नो कुधु प्रोसिनिन्या तान्या ले। 48 जोए मासैद प्रोसिनिन्या मिताव येन दोजूयाव हो छ्यावा वाज़ प्रोसिरिज़्या। जोलाई कोसै यासिउ लिज़्या होए कोसै

ज़ सोवोलो परिज़्या। फरी जोए कोसै जिम्बा दैद नैव होए कोसै ज़ बुझैव परिके।”

येसुए ओपाँए मिँरालाई याफातैज़्याव
(मत्ती १०:३४-३६)

49“डा डापाँए आव मानुवात में: लैना डाहुव मिताव लिज़्या। नो डाय़ेन चाँदो ज़ ओखेमकिन ताखेहो है डालिज़्या। 50 खाली नोकिन डादा तोबो दुखल गदिउ परिन्या लिज़्या। नो ओमायोःवा पै डायुँ धो थाइव ताज़्या। 51 जे डालाई ‘आव मानुवाताव मिँरालाई सखैना उहुव ताखेहो’ है जेलिज़्याखेहो। आव डापाँए इन मिँरालाई याफातैरिज़्याव। 52 अबकिन तोबो झिमलावर पाँच जना यालिकिन सोम्लो तँदा नेब्लो तँदा तान्या लेर। 53 ज़ा बाबुनी ब माखैद ओज़ा तँदा ओबाबु तँदा तान्या लिनी। हिताव ज़ ज़ा-मा तादी ब, फुबु भदै तादी ब, या याल माखैव तान्या लेर।”

बेलाए ओसरेसर
(मत्ती १६:२-३)

54येसुए माहोल्यारालाई ब है यादोक्यो, “जे आव गेपोल बादल पछचुँनी उहुज़्याव जेरँक ‘नम वान्या ले’ लिद जेथरैज़्या। हिताव ज़ ताज़्या। 55 दखिननी बतास उहुज़्याव जेरँक ‘आछिम बनै घाम तारिज़्या’ है जेलिज़्या। हिताव ज़ ताज़्या। 56 ए कैफतीर, नाम नमलाव सरेसर ते जेथरैज़्या, कै जैद आखकाव बेला ताकितर जेमाथरैधुज़्याव?

57“ओलेखा ल्योलाई इन कै जैद जेमाप्राल्धुज़्याव? 58 नँलाई तोबो नजगर्याए अदालतदा ओलॉनिक होड माकेसूद येमक ज़ नोस खैन्या उदिम दाव ताके, मानी नोए न्याधिसए ल्योक सकेस्निरिज़्याव। न्याधिसए पुलिसलाई सँपिद, पुलिसए फरी इयालखानाल झाःनिरिज़्याव। 59 साचो ज़, नल नपरिकिन तपैसा

तादी ब ओपोःस ज़ नमाफोःवा पै पुलुसो दैन्या नमाले।”

13

उयुं माफकैज्यावलाई ओछ्यास लिज्या

¹हो बेलाक तोबो नेब्लो हुद येसुलाई, “पिलातसए मार पलहुज्याव गालीललावरालाई सैःद होराए याझी मारए उझीस बरेःकेर,” है यादोक ते, ² येसुए नोरालाई, “नोर निताव दुखस यासिउए ‘यादेसलाव भरिरानी प्राइरानी पापीर ज़ याल्यो ओल्यो’ है जेलिज्याखेहो। ³ डा ते निताव ते माःक है डादाचिज्या। हैदी मनी जे परमेस्वरए ल्योदा जेयुं जेमाफकैकिन फाल्न्या छचाम जेलाई ब नो मिताव ओछ्यास लिज्या। ⁴ हिताव ज़ फरी नो यरूसलेमलाव सिलोआम धरर धलिद अथार जना नल यासिक, नोरालाई ब ‘यरूसलेम भरिनी अपराधीर ज़ ताखेरहो’ है जेलिखेहो। ⁵ डा फरी हिताव ते माःक है डादाचिज्या। हैदी ब परमेस्वरए ल्योदा जेयुं जेमाफकैकिन फाल्न्या छचाम जेलाई ब नो मिताव ओछ्यास लिज्या,” है यादोक्यो।

ओसै माझाःज्याव सीए ओघर्ती

⁶नकिन येसुए नोरालाई तोबो घर्ती झाःद यासथैक्यो, “तोबोए ओएँःल कोराली तोबो रूपिद ओनैज्याव। तछा ओसै उचिऊनाक ते मादैक्यो दी। ⁷ नकिन ओयेन दाज्यावलाई, ‘आव कोरालीलाई धलैके। सौरिम ताके सै ज़ मासैए, एँः वाज्ज छचाज्याव,’ है ओदोक ते, ⁸ ओयेन दाज्यावए, ‘थारे सायेब, आईसी पै नैव ताके। ओजरा जीदा घोद मलर झाःद डाएरिज्या, ⁹ कसा मासैए। नाःत ब ओमासैकिन नधलैया,’ है दोक्यो दी।”

येसुए नासिन्या छचाम तोबो मेंमालाई ओसगराँव

¹⁰तछा येसुए नासिन्या छचाम धर्मसास्त्र झिमक परमेस्वरए ओपाँ ओरासथैज्याक, ¹¹ नल तोबो थ० मालिधुज्याव घांत्यानिसो मेंमा उलिज्याव। नोलाई माचाव पुरूसए नै ओजेव अथार बर्स

ताद उलिज्याव। ¹² येसुए नोलाई रँ:द ओल्योक खुल्द, “अ माँ आछिमकिन आव नदुखनी नरास्सिके,” है दाद, ¹³ नोए ओक्याँत उकुइ नैद ओयो प्राईना सोजोकाव ज़ ताद परमेस्वरलाई बनै घ्यो:व ज़ थरैद उमिन सघ्यो:दिक्यो।

¹⁴ हा:त ज़ नो धर्मसास्र झिम चलैज्यावए नासिन्या छचाम येसुए नो मेंमालाई ओसगराँव रँ:द बनै रसिद नक लिज्यावरालाई, “येन दान्या छ दिन जैसिउ लिज्या। सगराँसिन्या ताकिन ना: भरिल ज़ सगराँसिहुच्यो। नासिन्या छचाम मा:क,” है ओरादोक ते, ¹⁵ प्रभुए नोलाई रँ:द, “ए कैफतीर, जे नासिन्या छचाम जेधें जेगधाहारालाई बँनी पला:द री जेरासवैनाज्याखेहो सानी। ¹⁶ झन आव अब्राहामए ओथोलाव सैतानए अथार बर्स पै किद ओनैज्याव मेंमालाई कै जैद नासिन्या छचाम मापलान्या?” है यादोक्यो। ¹⁷ निताव ओपाँए ओलकिन तँदा जैसिउ भरी लाज मोर्नो ज़ ताकेर। माहोल्याराए ते येसुए अचम्बलाव ओयेन रँ:द यायुँ होलाँ ताद रेकेर।

बाजीए उधुर

(मत्ती १३:३१-३२; मर्कुस ४:३०-३२)

¹⁸ है जैद येसुए नोरालाई, “परमेस्वरए ओराज्या किताव उलिज्याव, कितावनी पलासद डायाचिके लिक ते, ¹⁹ परमेस्वरए ओराज्या तोबो बाजीए उधुर स्यासो लिज्या। बारील झा:किन परीद ओघ्यो:वत नमताव भुज्याव बाज़ार सिपर जैद ओखारत बासिज्यार।”*

भरेस सोगोइन्या वास:

(मत्ती १३:३३)

²⁰ फरी येसुए, “परमेस्वरए ओराज्यालाई डा कातास डागोईकै ल्यो ताकिन, ²¹ परमेस्वरए ओराज्या भरेस सोगोइन्या वास:

स्यासो ब लिज्या। सोःसेमे मुछिसिउ कनेल तोचोप झाःदी ब पाई सरालिज्याव,” है लिके।

चूव याम

(मत्ती ७:१३-१४, २१-२३)

22 येसुए नाखार नाखार, सहर सहर जीदा परमेस्वरए ओपाँ सथैए सथैए यरूसलेमदा ओबाज्याक 23 येमक तोबोए, “प्रभु, अजम्बरी जुनी दैन्यार छया वाज्र यालिज्याव सा?” है ओदोक ते, 24 येसुए, “चूव यामनी पसिन्या जोर दोच्यो। कुधु पसिउ पैज्यावर पसिधुन्या मालेर। 25 झिमए ओर्गेए याम ओगलो छीनी जेबाकिन लाँक च्याँसिद, याम कोतो कोतो जैद, ‘प्रभु, गेलाई याम फैद्यासिके’ है जेदोकिन, झिमए ओर्गेए, ‘जे काताडावर, डा डामासरेस्चिए,’ है दान्या ले। 26 जे फरी, ‘गे नँस ज्युज्यावर ज़, नसथैसिज्याव नाखारलावर ज़,’ है जेदोकिन, 27 ओल फरी, ‘जे काताडावर, जात ज़ डामासरेस्चिए। जे पापीर आनी पुलुस्द बाचिके,’ है दान्या ले। 28 हाः बेलाक जे अब्राहाम, इसहाक, याकूब सोनो अगमबक्ता भरी परमेस्वरए ओराज्याल यालिज्याव रँन्या जेले। जे फरी, ‘गे ते लाँक लिन्यार ची गेताव ओल्यो’ लिद जेहार डर डर कैद चिर्लनी बिर्ल घर्न्या जेले। 29 हो छयाम मिँर आव संसारलाव चार कोन्यानी हुद परमेस्वरए ओराज्यालाव भत्यारल चुसिन्या लेर। 30 नो भरिनी ख्वा ख्वा ड़ात लिज्यावर छीत तारिज्यार, छीत लिज्यावर ड़ात तारिज्यार।”†

यरूसलेमए उजूनी येसुए उयुँ माचाव ओजैव

(मत्ती २३:३७-३९)

31 नाः बेलाक ज़ फरिसीर तोबो नेब्लो हुद येसुलाई, “हेरोद राजाए नँलाई सैःव पैज्याव, नँ आनी पुलुस्द बाव ताके,” है यादोक ते, 32 येसुए, “नो स्याललाई है दोनाचिके, ‘तछा नेला पै माचाव पुरूसर

पलेःद यासगराँरिज्ञ्याव दी। नकिन ओयेन भरी तुपिन्या ले दी।
 33 जुनी तादी ब नेला सोंलात डाबान्या पोड माकेसूद माताए, मानी अगमबक्ता यरूसलेमल मासिद काङ्कु उसिरिज्ञ्याव?

34 “ए यरूसलेमलाव मिँर, कै जैद अगमबक्ता भरिरालाई जेरासैःज्ञ्याव, जेल्योक परीसिउरालाई ब लुँ लुँए जेराङ्गेःज्ञ्याव? बामाए ओचर्ल्यानीर ओकर धूँल ओरादुपूज्ञ्याव मिताव, डा ब जेलाई कुधु पाला ज़ डाल्योदा पाथस दुपो डापैके, खाली जे ते जेमाभैःके। 35 है जैद जेझिम रितो ज़ तारिज्ञ्या। डा जेलाई है डादाचिज्ञ्या, आकिन ते ‘परमेस्वरए उमिनताव हुज्ञ्याव धन्याकाव ओताक’ है जेमादाँवा पै डालाई फरी रँःन्या जेमाले।”

14

नासिन्या छचाम तोबो गोवलाई ओसगराँव

1 नासिन्या छचाम येसु तोबो फरिसीराए याघेपपाए उझिमक काँ ज्युना बाके। नक छुत फरिसीर पाला येसुए उचिवार्या यालिज्ञ्याव। 2 नल गोन्या बेथाए क्योःद ओनैज्ञ्याव तोबो मिँ ब येसुए ओङ्काक चुसिद उलिज्ञ्याव। 3 हाःत ज़ येसुए नलाव लिज्ञ्याव फरिसीर सोनो कानुनलाव यागुर्बारालाई, “नासिन्या छचाम याजोरो हुवरालाई मासगराँन्या कानुन उलिज्ञ्याव रो?” है ओरादोक ते, 4 सु ज़ यामापाँधुवए येसुए नो ओजोरो हुवलाई छाप्द याङ्काक ज़ सगराँद ननी परीद, 5 नलाव लिज्ञ्यावरालाई, “जे नासिन्या छचाम जेज़ा तादी ब जेधें तादी ब भल्खादाल ओतेकिन होल ज़ जेनैज्ञ्याव सैं जेहाइज्ञ्याव?” है ओरादोक ते, 6 येसुस सु ज़ मापाँधुकेर।

यानी सघ्योःसिज्ञ्यावर

7 नकिन येसुए नो भत्त्यारल खुल्सिउ पाहुनाराए ओमान ल्यो पो याखिमज्ञ्याव रँःद अइ लिद घर्ती तोबो झाःद याएक्यो, 8 “बिह्यालाव भत्त्यारल जेलाई सुवाराए याखुल्चिकिन ओमान

ल्यो पो ताखिम्च्यो। नँकिन घेप्पा मिँलाई ब खुल्द ओनैज्याव ताकिन, 9 नो भत्यारल खुल्ज्यावए, 'नँ आवलाई पो रासद्याव ताके,' है दान्या ले। ननी मेकसै ओसारैनिकिन लाज मोर्नो तान्या नले। 10 बुरू डादा ज़ प्राइँरानी ओछचोडाव पोड चुसिउ ताके। हो ताकिन ची भत्यारल खुल्ज्यावए, 'अ डानै, जाँ रोकसै हुन्के,' है उदीकिन प्राइँराए डाक नइज्यात रहिन्या ले। 11 है जैद जो ओलनी सघ्योःसिज्या, हो जिम्रिज्या। फरी जो ओलनी सजिमसिज्या, हो घ्योःरिज्या।”

काता ज़ माल्योरालाई यान्या

12 नकिन येसुए ओललाई काँ ज्युना खुल्ज्यावलाई ब है दोक्यो, “नँ भत्यार जैद मिँरालाई नराखुल्क नक्याँदाडावर, नदाज्यु भाइर, ननै मेंर सोनो घेप्पा मिँर वाज ताराखुल्यो। मानी नोराए फरी नँलाई ब भत्यारल खुल्द नलोइ फोःन्या लेर। 13 बुरू भत्यार नजैक काता ज़ माल्योर काना दूँदारालाई दुप्द याज्यासके। 14 नोराए नलोइ यामाफोःधुवए नोए ओपोल असिक दैन्या नले। धर्मीर सैसिद यासोव छचाम परमेस्वरए ल्योनी नलोइ दैन्या नले।”

घ्योःव भत्यारए ओघर्ती

(मत्ती २२:१-१४)

15 हाःत ज़ नो भत्यारल लिज्यावरानी तोबोए, “साचो ज़ प्रभु, परमेस्वरए ओराज्यालाव भत्यारल ज्याव दैज्याव ओभागी ल्यो ज़,” है ओदोक ते, 16 येसुए अइ लिद घर्ती तोबो झाःक्यो, “तोबो मिँए तछा बनै घ्योःव भत्यार जैद कुधुलाई याखुल्क्यो दी। 17 ज्याव भरी ओतावत तोबो ओनोकोरलाई नो है ओरादोव भरिलाई खुल्नाव परीक्यो दी। नो बाद, ‘ज्याव भरी ताधुके, हुचिके दी,’ है ओरादोक ते, 18 नोराए तोबो तोबो निउँ जैद, उसंकतावए, ‘डा एँः तोथो लँःद डानै, नो एँः डाचिऊनारिज्या। है जैद ‘माधाःए दी’

है दोयो।' 19 हुकिनकावए, 'डा घेर पाँच हल लँ:द डारानै, नोरालाई बिचारिना डाबारिजूया। है जैद 'माधा:ए दी' है दोयो।' 20 प्राइरानी छीनीकावए, 'डा भर्जा ज्या रैद डानै, है जैद 'माधा:ए दी' है दोयो।' 21 "है जैद नो ओयेन दाजूयाव ओघरपतीए ल्योक बाद किताव है यादोव हिताव ज़ है दोक्यो। नो घरपती रसिद, 'हो ची ताकिन्दा नँ चाँदो बाद सहरलाव दोहा जीलाव गरीब गुरूवा, काना दूंदारालाई खिम्द यारैके,' है ओदोक ते, 22 नो ओयेन दाजूयावए ओघरपतीए है ओदोव मिताव मिँर रैद, 'है नदाँव मिताव मिँर रैद डारानै। हैदी ब पो लिजूया,' है ओदोक ते, 23 ओघरपतीए फरी, 'येम जीलावर काना कुनी जीलावर काचाबुल घरारैयो, डाझिमल घब्याल्रक,' है दाद, 24 'डादाडाव खुल्सिउराए डाभत्यारल तके ब दारो तादैरक,' है दोक्यो।"

येसुए उसिस जैसिन्या

(मत्ती १०:३७-३८; ५:१३; मर्कूस ९:५०)

25 हा: बेलाक येसुस ल्यो माल्यो मिँर उछीं उछीं याबाजूयाव। येसु नोराए ल्योदा भाल्सिद अइ लिद यासथैक्यो, 26 "जो डस हुव पैजूयाव, होए ओबाबु ओआमा, ओजूया ओज़ा, ओदाजूयु भाइ, ओनाना बैनीर सोनो उजिउलाई डाकिन कोसै मया ओरादोकिन, हो डासिस तान्या माले। 27 डाजूनी क्रुसत सिन्या मिताव दुखर सहिउ माभै:द डाछींत ओमाहुकिन हो ब डासिस तान्या माले। 28 हिताव ज़ जे झिम तोबो जेजैक 'आ: लागिरिजूया' लिद डादा ज़ हिसाप जेदोज़्या। 29 हिसाप मादाद गज वाज़ थालिद ओमातुपैधुकिन मिँराए नोलाई हसैद, 30 'मातुपैधुन्यालाई ज़ काराव ओथालिउ?' है लिन्या लेर। 31 हिताव ज़ तोबो राजाए ब छुत राजास लरै ओताकिन डादा हुनी हुजूयाव बीस हजार मिँरालाई दस हजार मिँरास गेमाराखेपैधुके लिद, उधूँलाव घेपपा घेपपारास सल्ला दोजूयाव। 32 नोरालाई माहारैधुन्या मिताव ताकिन नोर तादाड

यालिज्याक ज़ सखैन्या मिँर यापरींज्याव। ³³ है जैद जे ब जेस लिज्याव भरी जेमारासधुकिन डासिस तान्या जेमाले।

³⁴“सापी चाव ज़ लिज्या, खाली ओदार ओमालिकिन नोलाई कै जैद ची ओदार ल्यो जैन्या। ³⁵ नोलाई एँ:ल झा:द ब माताए, मलल झा:द ब माताए, ख्यान्या वाज़ ताज़्या। आव डापाँ जोए थैन्या उयुँ लिज्या, चावस ओथैवक।”

15

डोइव बेधाए ओघर्ती

(मत्ती १८:१२-१४)

¹येसुए ल्योक सिर्मा स्यो:ज्यावर सोनो पापीर कुधु ज़ ओपाँ थैना याहुज्याव। ² हिताव रँ:द नकाव फरिसीर सोनो सासत्रीराए, “आवए कै जैद निताव पापीरालाई सुम्द नोरास उज्युज्याव?” है लिद रूम्रूमैकेर। ³ येसुए नोराए यापाँ थैद अइ लिद घर्ती तोबो झा:द याएक्यो, ⁴ “तोबोए ओबेधार तसय यालिकिन, ननी तोबो ओडोइकिन उनान्सयलाई बनल ज़ ख्यानैद नो डोइवलाई ओमादैवा पै खिमज्याखेहो। ⁵ नोलाई ओदैक रेंए रेंए ओधेंल छींद, ⁶ ओबासक रैद ओनैरालाई खुल्द, ‘आव माव डाबेधालाई डादैके। जे ब डास रेंचिके,’ है दान्या ले। ⁷ डा साचो है डादाचिज्या, परमेस्वरस खैव उनान्सयराकिन तोबो पापी ओपाप रासूद परमेस्वरए ल्योदा उहुकिन नोलाई रँ:द स्वर्गत बनै रेंन्या लेर।”

चाँदीए सिक्का समैव मेंमा

⁸“फरी हो मिताव ज़ तोबो मेंमाए चाँदीए सिक्का दस गोता उलिकिन, ननी तोबो ओसमैकिन नोलाई ओमादैवा पै में: तै:द ज़िम सीद खिमो ज़ नैज्याव। ⁹ ओदैवत ओनैरालाई खुल्द, ‘डा नो डासमैव सिक्का डादैके। जे ब डास रेंचिके,’ है दान्या ले। ¹⁰ हो मिताव ज़ तोबो पापी परमेस्वरए ल्योदा उहुकिन परमेस्वर मनी

ओचाकर्यारास बनै रेंन्या लेर।”

ओबाबुए ओपैसा ओदोइद हुव छोर्या

11“हो मिताव ज़ फरी तोबो मिएँ ओज़ानी दुई भाइ निल्यो दी।

12 ओभाइए ओबाबुलाई, ‘बाबु, डालाई डाबताहा भरी याव ताके,’ है ओदोक ते, ओबाबुए ओज़ानिलाई सु सु निबताहा निएक्यो दी।

13“हुकिन जाँवाक नोए उजुँ भरी योःद पैसा भरी दुपूद तादा देसदा बाके दी। होड बाद ओमन लागिउ येन दाद ओपैसा भरी ओदोइक्यो दी। 14 प्राइँ ओखेमोत नो देसल बनै घ्योःव अनिकाल हुद नोलाई माथैक्यो दी। 15 है जैद नो देसलाव तोबोए ल्योक बाद, ‘नँस येनर मादैसिके’ है ओदोक ते, नोए ऊ गावला जैक्यो दी। 16 ऊ गावला उलिज़्याक ओकरेए माधुद ऊराए यापुल ब ज़्याव पैक्यो दी। नोलाई सुए ज़ काता ज़ यामाएज़्याव दी।

17“बल्ल बल्लड ओचेतर फर्किद, ‘डाबाबुए उझिमलाव ओनोकोरर ते याफू तसी ज़्याद ब सयेल्ज़्यार। डा ताकितर करे करेए डाध्याज़्या। 18 माताके ब, डाबाबुए ल्योदा ओल्द बाद ची, ‘जेरो बाबु, डा परमेस्वरए उउपर्त सोनो नँ नउपर्त पाप डादोके। 19 अब ते डा नज़ा है लिन्या स्यासो ब डामाले। तोबो ननोकोरल गनिनाके,’ है डाघा ब,’ लिद, 20 ननी पुलुस्द ओबाबुए ल्योदा बाके दी।

“ओबाबुए झिमकिन जाँ तादाड उहुज़्याव रँःद उयुँ नाद होड ज़ धोःनाद लापूद माइँ दोक्यो दी। 21 ओज़ाए, ‘बाबु, डा परमेस्वरए उउपर्त सोनो नँ नउपर्त पाप डादोके। डा फरी नज़ा है लिन्या स्यासो डामाले,’ है दोक्यो दी। 22 हाःत ज़ ओबाबुए ओनोकोररालाई, ‘आवलाई चाँदो ज़ प्राइँरानी चाव क्वा रैद जास्चिके, उकुइत कुइची, उखँत पोला ब जास्चिके। 23 प्राइँरानी सोइव मार तोबो रैद सैःचिके। बनै चावस ज़्याद ओद गेरेंया। 24 आव डाज़ा सिउल गनिसिउनी, बाँचिद हुके, माव डोइवलाई डादैके,’ है दाद भत्यार

जैद बनै रेंकेर दी।

25 “यामानिज्याक ज़ जेथा ओज़ा एँ:नी भर उहुज़्याव। झिमक ओकेसहुक झिमल गित गैद यास्याज़्याव थैद, 26 तोबो नोकोरलाई खुल्द, ‘आव काता याजैज़्याव इताव?’ है ओदोक ते, 27 ‘नभाइ हुद ले। सिउल गनिसिउनी बाँचिद उहुए नोए उजूनी नबाबुए प्राइरानी सोइव मार सै:क्यो,’ है ओदोक ते, 28 नो बनै रसिद झिमल पसिउ माभै:के दी। है जैद ओबाबु ओल ज़ ओल्योक बाद फकैनाक्यो दी। 29 ओज़ाए माभै:द, ‘डा आ: बर्स भरी नबाँदा मिताव जैसिद नपाँ खर्क ज़ माख्याद नसेवा डादोके। हितावत ब डालाई डानैरास ‘तोबो बाकरा बाली ब सै:द कैचिके’ है नमादाँ। 30 इन निताव नसम्पती भरी पातर्नीरास ओदोइद हुव नज़ालाई ताकितर सोइव मार सै:द नएके,’ है ओदोक ते, 31 ओबाबुए, ‘अ डाज़ा, नँ एकतार डास ज़ नलिज्या सानी। डास लिज्याव भरी नमीर ज़। 32 आछिम आव नभाइ सिउल गनिसिउनी बाँचिद हुव, माव डोइवनी दैसिउए उजूनी कै जैद मामानिन्या, कै जैद मारेंन्या?’ है दोक्यो दी।”

16

ओबाथें ल्यो येन दाज़्याव मिँ

1 नकिन येसुए फरी उसिसरालाई तोबो घर्ती झा:द है यादोक्यो, “तोबो धनी मिँए ओयेन चलैन्या मिँ तोबो ओनैज़्याव दी। नोए ओघरपतीए ओपैसा ओओदोइज़्याव छुतराए रँ:द, धनीलाई है यादोक ते, 2 नो धनीए नोलाई खुल्द, ‘नयेन जाँ माचाव डाथैज़्या, नँसकाव हिसाप भरी डालाई याव ताके। आकिनी नँ आव येन दाव दैन्या नमाले,’ है ओदोक ते, 3 नो येन चलैज़्यावए, ‘डाघरपतीए आव डायेननी पलेनारिक्यो, डा कै लिन्या ओताव? कीन्या घोन्या डार्सा माले, निद ज़्यान्या डालाज हुज़्या। 4 है जैद आनी ओपलेनावत मिँराए डालाई याझिमक नैन्याए जूनी तोबो बुद्धी पले:द अइ ची डाजैया ब’ लिद, 5 ओघरपतीए उरिन लाँव भरिलाई

तोबो तोबोनी खुल्द प्राइरानी झतावलाई, 'डाघरपतीए ओकाछ नँस खा उलिज्याव?' है ओदोक ते, ⁶ 'भास तसय गाधु लिज्या,' है दोक्यो दी। 'हुकी नतुम्सुक रैकेदा, तसयकाव पचास वाज गिन्जैया,' है दोक्यो दी। ⁷ नकिन फरी छुतलाई खुल्द, 'नँस डाघरपतीए ओकाछ खा उलिज्याव?' है ओदोक ते, 'गेदा तसय धु लिज्या,' है दोक्यो दी। 'हुकी नतुम्सुक रैकेदा, तसयकाव असी वाज गिन्जैया,' है दोक्यो।

⁸ "छीनी ओघरपतीए ओयेन भरी ओसैवत, ओबाथैनिकाव ओदोव सामा ते चाव ज़ रँ:क्यो दी। है जैद परमेस्वरए ओपाँताव मिँराए अजम्बरी जुनीए जूनी यादोज्याव सामाकिन आव मानुवाताव मिँराए याजूनी वाज यादोज्याव सामा झन ज़ ओबाथै ल्यो रँ:ज्या। ⁹ "है जैद डा जेलाई है डादाचिज्या, जे ते आव मानुवाताव जेधनए बुरू जेनैर याराजैचिके। हो ताकिन ची सिन्या बेलाक पैसाए ओचाहित भरी ओखेमोत स्वर्गताव एकमन्या लिन्या पोल जेलाई सुमन्या लेर।"

परमेस्वरए ओसेवा सोनो पैसाए ओसेवा

¹⁰ "जोए तकेज़ा येनत सतस दोज्याव, होए घेप्पा येनत ब सतस दान्या ले। फरी जोए तकेज़ा येनत असत दोज्याव, होए घेप्पा येनत ब असत दान्या ले। ¹¹ है जैद जे आव मानुवाताव धन असतस जेचलैकिन, परमेस्वरए ल्योडाव साचो धन कातानी जेदैरिज्याव? ¹² जेलाई यासिउ छुतए उमीलाई चावस जेमाचलैकिन, जे दैव परिन्या सुए ची ओयाचिरिज्याव? ¹³ है जैद तोबो बाँदाए नेब्लो साहुनी नियेन मादोधुव। दाव उपरिकिन नोए तोबोलाई सोद तोबोलाई चाव रँ:न्या ले, कितर तोबोए ओपाँ भै:द तोबोलाई ओलेखा नैद्यान्या माले। हिताव ज़ जे मनी परमेस्वरए ओसेवा सोनो पैसाए ओसेवा तखेपत जेमादोधुइ।"

¹⁴ नकाव ओपाँ थैज्याव फरिसीर, यायुँ जम्मा पैसा कमैन्यादा वाज

ओतावए येसुस याः दोकेर। ¹⁵ है जैद येसुए नोरालाई, “जे फरिसीर मिंराए डाक वाज़ धर्मी जैसिज़्यावर, जेर्युलाव पाँ भरी परमेस्वरए सैज़्याव। है जैद मिंराए घेप्पा यारँःचिदी ब परमेस्वरए ल्योनी ते जेयेन युँ माजामो ज़ लिज़्या,” है यादोक्यो।

मोसाए ओकानुन सोनो परमेस्वरए ओराज़्या
(मत्ती ११:१२-१३)

¹⁶“यूहनुनाए ओपालाक पै मोसाए ओकानुन सोनो अगमबत्ताराए यापाँ उलिज़्याव। हाःकिन परमेस्वरए ओराज़्यालाव पाँ हुद नल पसिन्या मिंर बनै छुइसिज़्यार। ¹⁷ हैदी मनी नाम नम ओखेम्दी ब नो कानुनलाव पाँ तोबो ब खेर बान्या माले। ¹⁸ है जैद मोसाए ओकानुनलाव सर्सिउ मिताव, तोबोए ओज्यालाई रासूद छुतलाई ओरैकिन जारी येन ओदोव ज़ गनिसिज़्या। फरी ओरेलाई रासो मेंमालाई ओरैकिन नो ब हितावल ज़ गनिसिज़्या।”

धनी मिं सोनो लाजरस

¹⁹फरी ब येसुए घर्ती तोबो झाःद है यादोक्यो, “तोबो धनी मिं चाव चाव ज़्याद चाव चाव क्वाइसिद दिनकाव ज़ बनै थाँतस उलिज़्याव। ²⁰ तोबो निद ज़्याज़्याव लाजरस यादोज़्यावलाई दिनकाव ज़ नोए ओसाँबिलाक यारैज़्याव। नोए ओक्याँ भरी खतेरा वाज़ उलिज़्याव। ²¹ नोए ओखतेरार काःराए लेपहुद याएज़्याव। नोए ‘नो धनी मिंए ओसतेवर ज़्याव डादैकिन ताखेहो’ लिद आस ओदोज़्याव।

²²“तछा नो निद ज़्युज़्याव लाजरस सिके। उसिउ प्राइँना ज़ परमेस्वरए ओचाकर्यार हुद छींद स्वर्गताव अब्राहामए ओल्योक लाँकेर। फरी नो धनी मिं ब सिके। मिंर हुद लाँद गादैनाकेर। ²³ नो मिं नर्गल बाद नलाव मेंःए ओसचपूक नमदा ओभालूसिक नो लाजरस अब्राहामस उलिज़्याव रँःद, ²⁴ अइ लिद बनै चोइस किके, ‘अ अब्राहाम बाबु, डालाई नयुँ ओनाक। नँस लिज़्याव लाजरसलाई

ओआडुला रील झाःद डासेत सथेपघान्याए जूनी परींघाँके। आव मेंःए सचपद धो सहिउ ताद डाले,’ है ओदोक ते, ²⁵ अब्राहामए, ‘अ बाबुज़ा, नँ मानुवात नलेवा भरी बनै थाँतस नलिके, अब ते नल दुखस नलिज़्या। लाजरस ते बनै दुखस लिके, अब ते सन्चस लिज़्या। ²⁶ फरी नँस गेखाल बनै घ्योःव भल्खादा नैसिउ लिज़्या। है जैद गे नल्योदा हुव गेपैदी ब गेमाहुधुइ, नँ ब गेल्योदा नमाहुधुइ,’ है ओदोक ते, ²⁷ नो धनीए, ‘हो ची ताकिन्दा बाबु, नँस डाबिन्ती लिज़्या। नोलाई डाबाबुए उझिमदा परींघाव ताके। ²⁸ डाभाइर पाँच जना लिज़्यार। नोरालाई घरासथैनावक, मानी आव डापरिउल परिन्या ओछ्यास लिज़्या,’ है ओदोक ते, ²⁹ अब्राहामए, ‘नोर नल मापरिन्याए जूनी यास मोसाए ओकानुन ब लिज़्या, अगमबक्तराए यासरो पोस्तोको ब लिज़्या। नो ज़ ओथैरक,’ है दोक्यो। ³⁰ नो धनीए फरी, ‘हिताव ते माता, अब्राहाम बाबु। तोबो सिउनी बावए है ओरादोकिन वाज़ परमेस्वरए ल्योदा यार्युँ फर्केन्या लेर,’ है ओदोक ते, ³¹ अब्राहामए, ‘मोसाए ओकानुन सोनो अगमबक्तराए यापाँ यामाभैःकिन सिउनी सैसिद बावए ओपाँ कातानी याभैःरिज़्याव?’ है दोक्यो।”

17

सम्जैन्या पाँर

(मत्ती १८:६-७, २१-२२; मर्कूस ९:४२)

¹येसुए उसिसरालाई, “पापल पारैन्या पाँर ते जुनी ब हुन्या ज़ लेर, खाली निताव पाँर पलेऽयावलाई थैए माँतकन ज़ लिज़्या। ² जोए आव मिताव ज़िमज़ारालाई पापल ओरापारैकिन, नितावलाई ते बुरू ओधेल राँथे सुर्द्याद समुन्द्रल ख्यान्या पाथ लिज़्या। ³ है जैद जे ननी जोगोइसिद ल्यो ताके।

“ननैए निताव पाप ओदोज़्याव नरँःकिन नोलाई सिडारो ताके। नसिडार्क ओपापनी ओओल्किन नोलाई रासो ताके। ⁴ फरी नँ

नउपर्त तछात ज्ञ सात पाला मादान्या येन दाव येन नँस खैहुव येन ओदोदी ब, नोलाई ब रासो ताके,” है यादोक्यो।

युँ हुपन्या

5फरी येसुए ओसाचीराए ओललाई, “अ प्रभु, परमेस्वरए ओपाँत गेयुँलाई ज्ञन ज्ञ सुहुप्यासियो,” है यादोक ते, 6 येसुए, “परमेस्वरए ओल्योदा बाजीए ओसै हावालिउ तादी ब जेयुँ जेसुहुपकिनी तोबो बनै घ्योःव रूमबू सींलाई ‘भोस्द समुन्द्रल रूपिसिनान्के,’ है जेदोकिन जेपाँ भैःन्या ले।”

बाँदाए दान्या येन

7“जेनी सुए ची जेबाँदालाई एँः कीन्यानी तादी ब बेधा छोन्यानी तादी ब, उहुव प्राइँना ज्ञयावर जैद ओसेवा जेदोज्ञयादा? 8 बुरू उहुव प्राइँना नोलाई, ‘नँ नक्वार फेरैसिद ज्ञयावर जैद डालाई रैद्याँकेदा, डा ज्ञयाद डाखेमोत नँ ब नज्ञयुया,’ है ची जेदोज्ञयाखेहो। 9 है जैद नो जेबाँदाए है दासिउनी वाज्र ओदोवए नोलाई कातानी ची धन्याबाद जेएरिज्ञयाव? 10 हिताव ज्ञ जे ब परमेस्वरए है ओदाचिउ भरी जेदोदी ब ‘गे ते असिक दैन्या स्यासोर गेमाले। गे ते है ओदासिउ येन दाज्ञयावर वाज्र ची गेल्यो ओल्यो’ लिद याका दोच्यो।”

दस जना कुरीर

11 येसु यरूसलेमदा ओबाज्ञयाक सामरिया सोनो गालीलनी निखार्लाव घ्याँ ओबाज्ञयाव। 12 तोबो नाखारल उपसिक कुरीर दस जना येसुस दैसिहुकेर। नोर जाँ अछतड च्याँःसिद, 13 “अ येसु गुर्बा, गेलाई नयुँ ओनाक,” है लिद याकिक ते, 14 येसुए नोरालाई रँःद, “जे पुजारीराए ल्योक सतैसिना बाचिके,” है ओरादोक ते, नोर येमत याबाज्ञयाक ज्ञ प्राइँ गराँकेर। 15 नोर यागराँव सैद तोबो वाज्र येसुए ल्योक ओल्द हुद, बनै चोइस किद परमेस्वरए उमिन

बनै सघ्योःद्याद, 16 येसुए उखँत फुलुप्सिद धन्याबाद चरैःक्यो। नो मिँ सामरिया जातलाव ओल्यो। 17 येसुए नोलाई, “जे गराँवर दस जना माःक रो? नँसकाव नौ जना काना याबाव?” है दाद, 18 नकाव लिज्यावरालाई, “काता, परमेस्वरलाई धन्याबाद चरैःन्या आव तोबो छुत जातलाव मिँ वाज उलिज्याव रो?” है दाद, 19 नो गराँवलाई, “च्याँःसिद चावस बान्के। डालाई नयुँ उहुबोए नगराँके,” है दोक्यो।

परमेस्वरए ओराज्या हुन्या बेलाकाव सरेसर

(मत्ती २४:२३-२८, ३७-४१)

20 फरिसीराए येसुलाई, “परमेस्वरए ओराज्या खर्क उहुरिज्याव?” है लिद यासुधिक येसुए, “परमेस्वरए ओराज्या रँःन्या सरेसरास माहुड। 21 मिँराए फरी, ‘आड लिज्या, होड लिज्या,’ है ब लिन्या मालेर। है जैद जे ज्ञ सँच्यो, परमेस्वरए ओराज्या जेर्युँल ज्ञ ताज्या,”* है यादोक्यो।

22 नकिन फरी उसिसरालाई, “तछा मिँ मिन्सिउलाई फरी तखेप रँःव गेदैकिन ताखेहो है लिन्या बेला ब हुन्या ले। हैदी ब रँःव दैन्या जेमाले। 23 है जैद मिँराए ‘आड लिज्या, होड लिज्या’ है यालिज्यावड ताबाच्यो, नोराए यापाँ ब तापतिच्यो। 24 किताव नमत बिजुली उमिल्किक प्राइँदा ज्ञ जगै ओजैज्याव, हिताव ज्ञ डा मिँ मिन्सिउ ब प्राइँए रँःन्या जैद हुन्या डाले। 25 खाली नोकिन डादा दुखर सहिद आव बेलाकाव मिँराए ल्योनी सोसी निन्या डातारिज्या। 26 डा मिँ मिन्सिउ डाहुन्या बेला, नोआए ओपालाकाव मिताव ज्ञ तारिज्या। 27 नोआए ओपालाकाव मिँर ज्याव ज्ञ यालिज्याव, ओव ज्ञ यालिज्याव, ज्यार रेर ब दाव ज्ञ यानैज्याव। हाःत ज्ञ नोआ री जहाजल उपसिउ प्राइँना रीर ज्यालहुद

* 17:21 17:21 छुत बुझिन्या – परमेस्वरए ओराज्या जेखाल ज्ञ ताज्या। 17:26 17:26 उत ६:५-८

प्राइँलाई यागदैक्यो।

28“लोतए ओपालाकाव मिँर ब हितावर ज़ याल्यो। नोर मनी ज़्याद ओद यालिज़्याव, लँःन्यार लँःव ज़ यालिज़्याव, योःन्यार ब योःव ज़ यालिज़्याव, धुर ब झाःव ज़ यालिज़्याव, झिमर ब जैव ज़ यालिज़्याव। 29 खाली लोत सदोमनी उपुलुसो प्राइँना ज़ परमेस्वरए नमतिन मेंः सवाद याखेम्क्यो।

30“मिँ मिन्सिउ उहुन्या छचाम ब हिताव ज़ तारिज़्या। 31 है जैद जे हो बेलाक थालात लिज़्यावए ओधन सम्पती जोगोइन्याए जूँनी उझिमल तापसिक। हिताव ज़ एँःल लिज़्याव ब उझिमदा ओल्द ताबाक। 32 लोतए ओज्यालाई याका दोच्यो। 33 है जैद जोए आव उजिउत ओललाई तान्या वाज़ खिम्ज़्याव, होए उजुनीलाई समैज़्याव। फरी जोए आव जुनील उजिउए मया मादोव, होए उजुनीलाई बाँचैज़्याव। 34 डा जेलाई है डादाचिज़्या, हो बेलाक, रील तोबो तैत स्याँद लिज़्यावनिलाई तोबोलाई लॉरिज़्याव, तोबोलाई ख्यानैरिज़्याव। 35 हिताव ज़ फरी राँथै हेःज़्यावनिलाई तोबोलाई लॉरिज़्याव, तोबोलाई ख्यानैरिज़्याव। 36 [फरी एँःल येन दाज़्यावनिलाई ब तोबोलाई लॉरिज़्याव, तोबोलाई ख्यानैरिज़्याव,] है यादोक्यो।

37नकिन उसिसराए, “प्रभु, निताव खा बेलाक, काङ्क ओतारिज़्याव?” है यादोक ते, येसुए, “किताव खरल ओताक वाज़ का गिदर हुज़्यार, हिताव ज़ तान्या ले,” है यादोक्यो।

18

न्याधिसलाई ओर्च्या सैःद्याज़्याव मेंमा

1तछा येसुए पोंखारिन्यात यार्च्या मासैःन्याए जूँनी अइ लिद घर्ती तोबो झाःद याएक्यो, 2 “तोबो सहरल परमेस्वरलाई रँःद ब

माछेऒ्याव, मिँरालाई ब उयुँ मानाऒ्याव तोबो न्याधिस उलिऒ्याव दी। 3 नो सहरल ज़ फरी तोबो राँदी मेंमा ब उलिऒ्याव दी। नोए न्याधिसए ल्योक बाद, 'तोबोए डाउपर्ट अन्याय दाद नैव। नो सखैद्याव ताके,' लिद दिनकाव ज़ है ओदोनाऒ्याव दी। 4 नो न्याधिसए जाँवा भरी घाइ ज़ मादोक्यो दी। छींनी ते उयुँल उयुँल, 'डा परमेस्वरलाई रँःद ब डामाछेःए, मिँरालाई ब डायुँ मानाए। 5 खाली आव मेंमाए बनै डार्च्या सैःद ओयाँवए आवलाई सखैद्याव ज़ ताके, मानी घरी पाला हुद डार्च्या सैःद्यान्या ले,' है लिके दी।"

6 प्रभुए नाः है दाद फरी ब है यादोक्यो, "जे नो अन्याय न्याधिसए है उलिऒ्याव चेतैच्यो। 7 है जैद परमेस्वरए ओराछाँतिउरालाई धिलो मिताव ओरैःदी ब लाकनी रील यापोँखारिऒ्यावए कै जैद माराजोगोइवके? 8 साचो है डादाचिऒ्या, जुनी ब नोरालाई मामेःद चाँदो ज़ सखैद्यान्या ले। हैदी ब डा मिँ मिन्सिउ फरी डाहुक आव मानुवात डालाई यायुँ हुपूऒ्यावर डामारादैहुरिऒ्या ब?"

फरिसी सोनो सिर्मा स्योऒ्याव

9 येसुए यानी धर्मी जैसिद 'गे मिताव सु ज़ मालेर' लिद स०ऒ्यावराए जूँनी घर्ती तोबो झाःद याएक्यो। 10 "नेब्लो मिँनी ध्यान झिमल पोँखारिना बाकिनी दी। नोनी तोबो फरिसी ओल्यो दी, तोबो सिर्मा स्योऒ्याव ओल्यो दी। 11 नो फरिसीए जाँ तँदा बैसिद, 'अ परमेस्वर, डा नँलाई धन्याबाद डाचरैःनिऒ्या। डा छुतराए मिताव लुभी ब डामाले, अन्याय ब डामादोए, पातर्या ब डामाजैसिए। डा नकाव सिर्मा स्योऒ्याव मिँ स्यासो ब डामाले। 12 साताकाव नेखेप ब डाउपासिऒ्या। डस लिऒ्याव भरिनी दस भानी तभा ब डाईऒ्या,' है लिद पोँखारिक्यो दी।

13 "नो सिर्मा स्योऒ्यावए ते जाँ तादाड च्याँःसिद ओलाजए परमेस्वरए ल्योदा माभाल्सिधुद ओछाती तपे तपे, 'अ परमेस्वर,

डा मिताव पापीलाई नयुँ ओनाक,' लिद पोंखारिक्यो दी।

14“डा जेलाई है डादाचिज्या, नोनी ननी निपुलुसोत फरिसीकिन बुरू सिर्मा स्योःजूयाव ज़ परमेस्वरए ओड़ाक धर्मी थोरिके। जो ओलनी सघ्योःसिज्या, हो ज़िम्रिज्या। फरी जो ओलनी सज़िमसिज्या, हो घ्योःरिज्या।”

येसुए ल्योक हुजूयाव लुज़ार

(मत्ती १९:१३-१५; मर्कूस १०:१३-१६)

15नकिन मिँराए ज़िमज़ा याज़ार 'येसुए छाप्द असिक घरायोक्' लिद ओल्योक यारारैजूयाक उसिसराए नोरालाई सिडार्द यारावैकेर।

16 येसुए निताव रँद लुज़ारालाई ओल्योदा खुल्द, “नो ज़िमज़ा लुज़ारालाई तारावैच्यो, डाल्योदा हुव याराएचिके। परमेस्वरए ओराज्या नितावराए जूनी ज़ लिज्या। 17 डा साचो है डादाचिज्या, जोर आव लुज़ाराए माँःती परमेस्वरए ओराज्याल पसिन्या युँ मादोर, नोर खर्क ज़ पसिउ दैन्या मालेर,” है लिद उसिसरालाई है यादोक्त्यो।

अजम्बरी जुनी खिमजूयाव धनी

(मत्ती १९:१६-२६; मर्कूस १०:१७-२७)

18हाःत ज़ तोबो यहूदीराए याघेप्पा हुद, “अ धर्मी गुर्बा, डा अजम्बरी जुनी दैन्या किताव दान्या?” है ओदोक ते, 19 येसुए, “डालाई काराव धर्मी है नदाँजूयाव? परमेस्वरकिन धर्मी सु ज़ माले।

20 धर्मसास्त्रलाव सर्सिउ दान्या मादान्या येन नँ ज़ नसैजूयाखेहो — अर्काए ओजूयाए ल्योदा माबान्या, मिँ मासैःन्या, माकुन्या, धुत गोहाई मायान्या, बाबु आमाए ओमान नैद्यान्या,” है ओदोक ते, 21 नो याघेप्पाए, “आव भरी ते ज़िमज़ाकिन दाहुव ज़ डानैजूया,” है दोक्त्यो। 22 येसुए नो थैद, “अझ तोबो नमासयोःताए। नँस लिजूयाव भरी योःद काता ज़ माल्योरालाई भाःद याएकेदा, नँ स्वर्गताव धन

दैन्या नले। नो येन भरी दाद नँ डाछींत हुन्के,” है दोक्यो। ²³ नो पाँ थैद उयुँर स्यासे सतेक्यो, काराव ल्यो ताकिन नोए ओधन बनै कुधु ज़ उलिज़्याव।

²⁴ येसुए नो ओबाज़्याव रँ:द नक लिज़्यावरालाई, “धनी मिँ परमेस्वरए ओराज़्याल पसिन्या बनै धो ताज़्या। ²⁵ गपए उकुँल ऊँत उछिरिज़्यावकिन धनी मिँ परमेस्वरए ओराज़्याल पसिन्या झन धो ताज़्या,” है ओरादोक ते, ²⁶ नो पाँ थैज़्यावराए, “इताव ताकिन ते सुए ची अजम्बरी जुनी ओदैधुरिज़्याव?” है यादोक ते, ²⁷ येसुए, “मिँर यानी सु ज़ माबाँचिधुर, खाली परमेस्वरनी मातान्या काता ज़ माले,” है यादोक्यो।

येसुए उछींत बाज़्यावर

(मत्ती १९:२७-३०; मर्कूस १०:२८-३१)

²⁸ हा:त ज़ पत्रुसए, “गे ते प्राइँ ख्यानैद नछींत हुद गेले,” है ओदोक ते, ²⁹ येसुए प्राइँलाई, “डा साचो है डादाचिज़्या, परमेस्वरए ओराज़्याए जूनी जोए उझिम, ओज्या ओज़ार, ओदाज्यु भाइर, ओबाबु ओआमार याससज़्याव, ³⁰ होए आव उजिउत ज़ कुधु गुना दैज़्याव, फरिकाव जुनील अजम्बरी जुनी ब दैन्या ले,” है यादोक्यो।

येसु उसिन्याए जूनी फरी ओपाँव

(मत्ती २०:१७-१९; मर्कूस १०:३२-३४)

³¹ नकिन येसुए बाह जना उसिसरालाई अछतड लाँद, “गे यरूसलेमदा गेपुलुसनाज़्या। नल डा मिँ मिनसिउए डाजूनी अगमबक्तराए यासरो भरी योन्या ले। ³² है जैद डालाई छुत जातलावराए याकुइत सूपिद उल्ली गिल्ली दाद, बीज़्यात जैद, तिल्द, ³³ यारी:नावत सै:न्या लेर। हैदी ब सोलात सिउनी सैसिद सोन्या डाले,” है यादोक्यो। ³⁴ खाली नो पाँए ओअर्थ भरी नोरालाई

कप्सिउ मिताव ओतावए है ओरादोव भरी माबुझिधुकेर।

येसुए उमी मारैःवलाई रँःधुन्या ओजैव

(मत्ती २०:२९-३४; मर्कूस १०:४६-५२)

35नकिन येसु यरीहो सहरल ओकेस्नाक नक उमी मारैःव तोबो मिं येम छचोक चुसिद उनिज्ञयाव। 36 नोए माहोल्थार याहुज्ञयाव थैद मिंरालाई, “आव काता याजैज्ञयाव?” है ओरादोक ते, 37 नोराए, “नासरतलाव येसु आलाव घ्याँ हुज्ञया,” है यादोव प्राइँना, 38 नो बनै चोइस क्रिद, “अ दाऊदए ओथोलाव येसु, डालाई नयुँ ओनाक,” है ल्यो ज़ उलिज्ञयाक, 39 नलावराए, “इयाउँ तालिनी,” लिद सिडाकैर। खाली नो ज़न ज़ चोइस, “अ दाऊदए ओथोलाव, डालाई नयुँ ओनाक,” है लिद क्रिउ ज़ लिके।

40 येसु नक च्याँःसिद, “नोलाई आदा रैचिके,” है यादोक्यो। नोलाई यारैवत, 41 येसुए, “डा नजुँनी काता दाद्यान्या?” है ओदोक ते, “प्रभु, डा रँःधुन्या डाताक,” है लिके। 42 हाःत ज़ येसुए, “रँःन्या तानके, डालाई नयुँ उहुबोए ज़ नगराँके,” है ओदोव प्राइँना, 43 नो मिं रँःधुन्या ताके। नोए फरी परमेस्वरलाई घ्योःव ज़ थरैद येसुए उछीं उछीं ज़ बाके। नकाव लिज्ञयावराए मनी निताव रँःद परमेस्वरए ल्योदा बनै खुसी ताद उमिन सघ्योःदिकेर।

19

सिर्मा स्योःज्ञयाव जखायस

1 येसु यरीहो सहरल पसिद नलाव घ्याँ ओबाज्ञयाक, 2 नल तोबो जखायस यादोज्ञयाव सिर्मा स्योःज्ञयाव मुख्या उलिज्ञयाव। नो मिं बनै धनी ब उलिज्ञयाव। 3 नोए नो हुज्ञयाव येसुलाई चिऊन्या ओपैज्ञयाव। खाली बनै तेंक्यासो ओतावए माहोल्थाराए खार्नी मारैःधुक्यो। 4 है जैद येसु ओबान्या येमदा डादा ज़ धोःनाद येसुलाई चिऊन्याए जूँनी तोबो सीत पुलुस्के। 5 येसु नक ओकेसोत जखायस उलिज्ञयाव सीदा भाल्सिद, “अ जखायस, चाँदो झरिन्के। आछिम

नझिमक डाबासिरिजूया,” है ओदोव प्राइंना, ⁶ लाला लुलु झरिद बनै रेंए रेंए येसुलाई उझिमक लाँक्यो। ⁷ नलाव मिँराए निताव रँ:द रूम्रूमैद, “कै जैद निताव पापीए ल्योक बासिउ ओपैँजूयाव ओताव?” है लिकेर।

⁸जखायस ते येसुए ओड़ाक च्याँ:सिद, “अ प्रभु, डास लिजूयाव भरी नेभा जैद तभा भरी माथैँव मायोवरालाई डाराएरिजूया। हो वाज मा:क, छुतरलाई हाइद डाराजूयुव भरी चार दोबोर सोवोल्द डाराएरिजूया,” है ओदोक ते, ⁹ येसुए, “आव मिँ आछिमकिन उझिमलावरास परमेस्वरए ल्योदा बान्या येम ब दैक्यो, अब्राहामए साचो ओज़ाल ब गनिसिके। ¹⁰ डा मिँ मिन्सिउ इताव माव डोइवरलाई खिम्द बाँचैना डाहुव ज़।”

सुन खेलैसिन्या घर्ती

(मत्ती २५:१४-३०)

¹¹नलाव मिँराए नो पाँ याथैजूयाक येसु यरूसलेमल ओकेसनावे नोराए ‘परमेस्वरए ओराजूया आव मानुवात बेहार ज़ ओरैरिजूयाव सा’ है यालिजूयाव। नोराए यापाँ सदाँघान्याए जूँनी येसुए घर्ती तोबो झा:द याएक्यो। ¹² “तोबो राजाए ओथोलाव मिँ ओल उलिजूयाव पोडाव राजूया चलैन्याए जूँनी तादाड राजाए ल्योक ओहक चानाक्यो दी। ¹³ ओमाबाद डादा दस जना ओयेन दाजूयावरालाई खुल्द नोरालाई त्तोतोला त्तोतोला सुन याद, ‘डा डामाहुवा पै आव खेलैसिच्यो,’ है दाद याख्यानैक्यो दी। ¹⁴ खाली नलाव ख्वा ख्वा मिँराए नो राजा खलकलाव मिँलाई यासोवए, ‘आवलाई गेडैताव जैद तायासियो,’ लिद राजाए ल्योदा मिँर यारापरींकेर दी।

¹⁵“छींनी नो ओहक भरी दैद उहुवत नो डादाडाव सुन ओरायो ओयेन दाजूयावराए ‘कै जैर्या’ लिद याखुल्क्यो दी। ¹⁶ उसंकताव हुवए, ‘प्रभु, डालाई नयाँव सुन खेलैसिद ओया:त दस तोला हाइद डानै,’ है ओदोक ते, ¹⁷ ओघरपतीए, ‘स्याबास, नँ चाव येन दाजूयाव।

तकेजालाई ब सतस नदोवए डाराज्यालाव दस गोता सहरराए याडैताव डाजैनिरिज्या,' है दोक्यो दी। 18 फरी नोए उछींताव हुवए, 'प्रभु, नयाँव सुन खेलैसिद ओयाःत पाँच तोला हाइद डानै,' है ओदोक ते, 19 ओघरपतीए, 'नँलाई ब पाँच गोता सहरराए याडैताव डाजैनिरिज्या,' है दोक्यो दी।

20 "फरी नोए उछींताव हुद, 'प्रभु, नयाँव सुन हिताव ज़ लिज्या। रूमालल ज़ पोःद डानै। 21 नँ ते नमाझाःव ब नसिमज्या, नमानैव ब नलाँज्या। है जैद निताव कर्रा नतावए नँलाई रँःद डाछेके,' है ओदोक ते, 22 ओघरपतीए नोलाई, 'नँ कान्ल ज़ काम मालागिउ डाबाँदा, नँलाई नपाँनी ज़ डाफाल्निरिज्या। डालाई 'ओमाझाःव ब सिमज्याव, ओमानैव ब लाँज्याव, नाः कर्रा लिज्या' लिन्या नसैव ताकिन, 23 काराव नो सुन ब्याङ्कल नमाझाःव? नल नझाःव ताकिन डाहुवत ओब्याजस दैन्या डाल्यो,' है दाद, 24 नक च्याँःसिद लिज्यावरालाई, 'आवलाई नो सुन नैद दस तोला ल्योलाई एचिके,' है ओरादोक ते, 25 नोराए, 'प्रभु, ओलस ज़ दस तोला लिज्या सानी,' है यादोक ते, 26 नो राजाए, 'डा जेलाई साचो है डादाचिज्या, जोए ओदैवलाई चावस चलैज्याव, होए फरी ब दैरिज्याव। जोए ओदैवलाई चावस माचलैव, होस छ्या छ्या लिज्याव ब नैसिरिज्या। 27 फरी नो डालाई याडैताव तान्या माभैःज्याव डासुतुरालाई आल रैद डाङाक ज़ याराखेमचिके,' है यादोक्यो दी।"

येसुलाई परमेस्वरए उमिनताव राजा याजैव

(मती २१:१-११; मर्कूस ११:१-११; यूहनना १२:१२-१५)

28 येसुए नो घर्तीलाव पाँर तुपैद ननी पुलुसुद यरूसलेमदा पुलुसुनाके। 29 नकिन जैतून दाँदा यादोज्यावए उखँकाव बेथफागे सोनो बेथानिया नाखार जीदा ओकेसुनाक नेब्लो उसिसनिलाई अइ लिद डादा निपरींक्यो, 30 "जिन आव गोङाकाव नाखारल बाचिन्केदा।

नल तोबो सुए ज़ यामाचेप्ताव बछेरा सुर्सिउ दैन्या जिन्ले। नोलाई पलाःद रैचिन्के। 31 सुवाराए, ‘काराव जिन्पलाःजूयाव?’ है यादाचिन्किन, ‘गिनप्रभुलाई चाहिजूया,’ है यारादोचिन,” है लिद निपरीक्यो।

32नोनी बाद है उनिदोव मिताव ज़ बछेरालाई दैकिनी। 33 नोलाई निपलाःजूयाक बछेराए ओर्गेर हुद, “काराव जिन्पलाःजूयाव?” है यारादोक ते, 34 “गिनप्रभुलाई चाहिजूया,” है यारादोकिनी। 35 नोनी नो बछेरालाई येसुए ल्योक रैद, बछेराए ओतर्त याक्वार झाःद येसुलाई चेपो परीकेर। 36 येमत ओबाजूयाक मिँराए याक्वार येमल तैदिकेर।

37जैतून दाँदातिन सहरदा उझरिनावत नो माहोल्यार येसुए ओपाँत बाजूयाव भरिए अचम्ब अचम्बलाव ओयेनर यारैःवनी परमेस्वरए ल्योदा बनै रेंए रेंए अइ लिद याक्किजूयाव —

38“परमेस्वरए उमिनत हुव राजा धन्याकाव ओताक,
परमेस्वरए उयुँ ब होलाँ ओताक,
स्वर्गतावर ब ओरेंरक।”

39नोराए खार्नी ख्वा फरिसीराए नो पाँ थैद येसुलाई, “गुर्बा, नसिसरालाई चिम दाव यापरीके,” है यादोक ते, 40 येसुए, “डा साचो है डादाचिजूया, नोराए चिम यादोकिन लुँर ब किन्या लेर,” है यादोक्यो।

यरूसलेमलाई रँःद येसु ओघरो

41येसु सहर छचोक ओकेसनाक सहरलाई रँःद उपिलर रासूद अइ लिके, 42 “ए यरूसलेमलाव लिजूयावर, जे आछिमकाव जेल्योक हुव परमेस्वरस खैन्या, युँ होलाँ दाव पाँर जेथरैव ताकिन तान्या ओल्यो। अब ते नो जेमारँःधुइ। 43 जेलाई छीनी तछा जेसुतुर हुद गरर जैद प्राइँनी धिरिचिरिजूयार। 44 परमेस्वर जेल्योक उहुव

जेमाथरैधुवए जेसुतुरराए जेसहरलाई तैःद लुँए तर्त लुँ ब नैन्या मालेर। जेलाई सोनो जेज़ारालाई ब पछारिद यारासैःरिज़्यार।”

येसुए बेपारीरालाई ध्यान झिमनी ओरापलेःव

(मत्ती २१:१२-१७; मर्कूस ११:१५-१९; यूहन्ना २:१३-२२)

45नकिन येसु यरूसलेमलाव ध्यान झिमल बाद नलाव पसल्यारालाई पलेःद, 46 नोरालाई, “धर्मसास्त्रल परमेस्वरए ओपाँ अइ लिद सर्सिउ लिज़्या,

‘डा डाझिम पोंखारिन्या झिम जैसिउ लिज़्या।’

जे ते झन चोरराए पुप मिताव जैद जेने,” है यादोक्यो।

47नकिन येसुए नो ध्यान झिमल दिनकाव ज़ परमेस्वरए ओपाँ ओरासथैज़्याव। खाली नलाव मुख्या पुजारीर, सास्त्रीर सोनो नलाव सेर सेरर झन येसुलाई सैःन्याए जूँनी यापाँसिज़्याव।

48 हितावत ब मिँ भरिए येसुए ओपाँ थैद घेप्पा यारँःवए सैःन्या येम मादैकैर।

20

येसुए ओहक सोनो यूहन्नाए ओहक

(मत्ती २१:२३-२७; मर्कूस ११:२७-३३)

1हाः बेलाक तछा यरूसलेमलाव ध्यान झिमल येसुए चाव था ओरासथैज़्याक नलाव मुख्या पुजारीर, सास्त्रीर सोनो यहूदीराए यासेरर ओल्योक हुद, 2 “गेलाई है दासिके, आव नदोज़्याव येनर नँलाई सुए है उदीव, सुए हक उईव?” है यादोक ते, 3 येसुए, “डा ब जेलाई तोबो है डादाचिज़्या, नो पाँ है दाँचिके। 4 रील सछैँज़्याव यूहन्नाए ओयेन परमेस्वरए ल्योनी ओताव सैं मिँराए ल्योनी ओताव?” है ओरादोक ते, 5 या याल, “परमेस्वरए ल्योनी ओताव” है गेद्या गेलिकिन, ‘हुकी काराव यूहन्नाए ओपाँ जेमाभैःव?’ है दान्या ले। 6 फरी ‘मिँनी’ है गेद्या गेलिकिन, मिँ भरिए यूहन्नालाई

अगमबक्ता ज़ याथरैवए गेलाई झे:द सै:न्या ओछ्यास ब लिज़्या,” है लिकेर। ⁷ है जैद नोराए येसुलाई, “यूहन्नाए ओयेन कान्नी ओताव गेमासैए,” है यादोक ते, ⁸ येसुए, “हो ची ताकिन्दा डालाई आव येन दान्या हक सुए ओयाँव डा ब है डामादाच्यो,” है यादोक्यो।

अधिया कमैज़्यावराए घर्ती

(मत्ती २१:३३-४६; मर्कूस १२:१-१२)

⁹नकिन नलाव मिँरालाई घर्ती तोबो झा:द अइ लिद यासथैक्यो, “तोबो मिँए ओएँ: भरिल जोम्परसै झा:द मिँरालाई अधियाल याद, ओल जाँवा पै तोबो तादा देसड लिनाके दी। ¹⁰ नो जोम्परसै किन्या बेलाक तोबो ओनोकोरलाई उजुँ चानाव परीक्यो। खाली नो अधिया कमैज़्यावराए झन नोलाई प्रोद रितो ज़ खेपैकेर दी। ¹¹ फरी छीनी छुत ओनोकोरलाई उपरीक नोलाई ब प्रोद बीज्यात जैद रितो ज़ खेपैकेर दी। ¹² छीनी फरी ब तोबोलाई उपरीक हिताव ज़ नोलाई ब प्रोद लल्यातोरो जैद ख्याकेर दी।

¹³ “नकिन छीनी नो एँ:ए ओर्गेए, ‘कै जैन्या ओताव? डायुँलाव डाज़ालाई ज़ परीव ताके। नोलाई ताकिन ओमान नैदिर सै” लिद नो ओज़ालाई परीक्यो दी। ¹⁴ खाली नो ओज़ा उहुज़्याव रँ:द नो अधिया कमैज़्यावर झन या या पाँसिद, ‘आव ते एँ: दैन्या मिँ ची, आवलाई गेसै:किन आव एँ: गेमीं ज़ तान्या ले,’ लिद, ¹⁵ नो मिँलाई एँ:नी पाखाड लाँद सै:केर दी।”

नकिन येसुए, “नो एँ:ए ओर्गेए अधिया कमैज़्यावरालाई कै याजैवके लिक ते, ¹⁶ नोर प्राईलाई ज़ सै:द नो एँ: छुतरालाई अधियाल यान्या ले,” है ओरादोक ते, नो पाँ थैज़्यावराए यायुँ कैद, “निताव ते खर्क ज़ ताताक,” है लिकेर।

¹⁷नकिन येसुए, “हिताव ताकिन आव धर्मसासूत्रलाव पाँए ओअर्थ किताव जेडम्सिज़्या?

‘भुलीराए कानुल ज़ माज़्यासे लिद याख्याव लुँ
नो ज़ झन भुय़रलाव लुँ ताके।’

18नो लुँत पाज़्याव भरी कुतु कुतु ज़ तान्या लेर। नो लुँ फरी यातर्त
उहुकिन झन नप नप ज़ तान्या लेर।”

माहाराजालाई सिर्मा यान्या सैं मायान्या
(मत्ती २२:१५-२२; मर्कूस १२:१३-१७)

19ना:त ज़ सास्त्रीर स़ोनो मुख्या पुजारीराए ‘आव घर्ती ते गेडैत
ज़ झा:द्यासिक्यो’ लिन्या सैंद येसुलाई हो प्राइंना ज़ क्यो:व
पैंकेर। खाली मिँर रँ:द छे:केर। 20 है जैद नोराए, ‘आवलाई ओपाँ
क्यो:द्याद हाकिमए उकुइत सूँपिउ ताके’ लिद मौका चिऊद,
यासकावर नेबरेंवा येसुस खैव मिताव जैसिउ परींद येसुए ओयेन
साँना यारापरींकेर। 21 नो साँना बावराए येसुलाई, “गुर्बा, नँ गेस
नपाँज्याव भरी साचो वाज़ लिज़्या। परमेस्वरए ल्योदा बान्या येम
नपैसिक ब मिँर रँ:द नमादोए, सोजोनी ज़ नदोज़्या। 22 है जैद गेलाई है
दाव ताके, माहाराजालाई गे सिर्मा यान्या सैं मायान्या?” है यादोक
ते, 23 येसुए नोराए याचाल सैंद, 24 “तोबो पैसा सतैंचिसाँकी। नत
सुए उसुरूप, सुए उमिन उलिज़्याव?” है ओरादोक ते, “माहाराजाए
उमीं ज़,” है दोकेर। 25 “हो ची ताकिन्दा माहाराजाए उमीं भरी
माहाराजालाई ज़ एच्यो, परमेस्वरए उमीं भरी परमेस्वरलाई ज़
एच्यो,” है यादोक्यो। 26 है जैद नोराए मिँराए ड़ाक येसुए ओपाँ
क्यो:व मादैद, झन अचम्ब ताद चिम दाद लिकेर।

सदुकीराए यापाँ

(मत्ती २२:२३-३३; मर्कूस १२:१८-२७)

27नकिन सदुकीराए ब येसुलाई पजैना हुकेर। सदुकी है
यारादोज़्यावराए ‘सिउकिन सैंसिन्या माताए’ है यालिज़्याव। 28 है
जैद नोर हुद, “गुर्बा, मोसाए ओकानुनल इताव सर्सिउ लिज़्या,

‘तोबोए ज्या दाद ज़ार मादैद उसिकिन, ओभाइए ओदाज्युए ओथोर माफ्यान्याए जूनी ओमारूमलाई ओरैवक।’²⁹ है जैद तोबोए ओज़ार सात भाइ याल्यो। यादाज्युए ज्या दाद ज़ार मादैद ज़ सिके।³⁰ होए उधूँलावए ओमारूमलाई रैद, नो ब ज़ार मादैद ज़ सिके।³¹ नकिन साइँला मनी हिताव ज़ ताके। नितावनी ज़ सात भाइ भरिए ज़ नोलाई रैद ज़ार मादैद ज़ सिकेर।³² प्राइँरानी छींनी नो मेंमा ब सिके।³³ है जैद नो मेंमा सात भाइए याज्या ओतावए अजम्बरी जुनील काताकावए याज्या तान्या?” है लिकेर।

³⁴हाःत ज़ येसुए, “आव मानुवाताव मिँराए ज्या ब दोज़यार, रे ब दोज़यार।³⁵ अजम्बरी जुनी दैन्या तावराए ते स्वर्गत ज्या ब मादोर, रे ब मादोर।³⁶ नोर सिउनी यासैसिउत परमेस्वरए ओज़ार ताद ओचाकर्या स्यासोर यातावए फरी खर्क ज़ सिन्या मालेर।³⁷ है जैद सिउकिन सैसिन्या ओताज्याव सै ओमाताज्याव मोसाए ओसरोनी ब सैच्यो। नोए झोपोरा ओचाँःज्यावनी परमेस्वरए ओर्गा थैद अइ लिद सर्क्यो,

‘डा अब्राहामए ओपरमेस्वर, इसहाकए ओपरमेस्वर सोनो याकूबए ओपरमेस्वर ज़।’

³⁸ओल ते मोरोराए यापरमेस्वर माःक, जींदोराए यापरमेस्वर ची। है जैद ओलस लिज्याव भरी जींदो ज़ ताज्यार।”

³⁹नो पाँ थैद नलाव सास्त्रीराए येसुलाई, “थिक ज़ है नरादोके, गुर्बा,” है दोकेर।⁴⁰ हाःकिन सुए ज़ येसुस पाँन्या आँत मादोकेर।

खीस दाऊद राजाकिन घेप्पा लिज्या

(मत्ती २२:४१-४६; मर्कूस १२:३५-३७)

⁴¹नकिन येसुए है यादोक्यो, “मिँराए कै जैद खीसलाई दाऊदए ओथोलाव है यादोज्याव? ⁴²⁻⁴³ ओल दाऊदए ज़ खीसए उजूनी भजन पोस्तोकोल अइ लिद सर्द नैव,

‘परमेस्वरए डाप्रभुलाई,
‘नसुतररालाई नखँ धूँल झाःद डामाईवा पै,
डावोर्दा चुसिद लिन्के,’ है दोक्यो।’

44 है जैद ओल दाऊदए मनी ख्रीसलाई ‘डाप्रभु ज़’ है ओदोकिन नो
कै जैद ओल ओथोलाव ओताजूयाव?” है यादोक्यो।

येसुए सास्त्रीराए यापाहा झाःद ओरायो

(मती २३:१-३६; मर्कूस १२:३८-४०)

45 मिं भरिए येसुए ओपाँ याथैजूयाक उसिसरालाई, 46 “जे ते
सास्त्रीराए यादोजूयाव मिताव येन दान्या माःक। नोर रेरे
बेन्बेनो क्वा क्वाइसिद ‘प्राइँ धो घदासिरक’ लिद बजार जीदा
दुलिरिजूयार, सोनो धर्मसास्त्र झिमराल, घ्योःव घ्योःव भतयारल
प्राइँ रँःन्याक ओमान ल्यो पोल वाज़ चुसिउ पैजूयार। 47 नो
सास्त्रीराए इन राँदी मेंमारालाई तँनी छाम छुम याराख्याजूयार,
मिंराए डाक वाज़ बनै चाव चाव पोंखारिउ जैसिजूयार। नोराए ते
प्राइँरानी घ्योःव सजा ज़ दैरिजूयार,” है लिद यासथैक्यो।

21

राँदी मेंमाए ओचरैःव भिती

(मर्कूस १२:४१-४४)

1 नकिन येसुए यरूसलेमलाव ध्यान झिमल धनी धनीराए
परमेस्वरलाई भिती याचरैःजूयाव ओराचिऊजूयाक, 2 तोबो काता
ज़ माल्यो राँदी मेंमाए नेब्लो पैसा ओचरैःजूयाव रँःक्यो। 3 नो
रँःद येसुए नलावरालाई, “डा साचो ज़ है डादाचिजूया, आव काता
ज़ माल्यो राँदी मेंमाए छुतराकिन कुधु चरैःक्यो। 4 धनीराए
ते यासयेलोनी वाज़ चरैःकेर। नो राँदी मेंमाए ते ओललाई
ओमाथैजूयावत ब ओलस लिजूयाव भरी प्राइँ ज़ चरैःक्यो,” है
यादोक्यो।

खेमन्त्या बेलाकाव सरेसर

(मत्ती २४:१-१४; मर्कूस १३:१-१३)

५ ध्यान झिमनी पुलुसुद याबाजूयाक ख्वा ख्वा मिराए, 'आव ध्यान झिमलाव लुरं काता आ: चावर, काता आ: चावराए सिडारैद यानैजूयाव' है लिद या या यापाँजूयाव येसुए थैद, ६ "आव जेरें:जूयाव भरी तछा तै:द लुँए तर्त लुँ ब रहिन्या माले," है ओरादोक ते, ७ नोराए, "गुर्बा, आव नपाँ भरी खर्क ओतारिजूयाव? नोर तान्या सरेस किताव ओतारिजूयाव?" है यादोक ते, ८ येसुए, "जे जोगोइसिद लिच्यो, मानी सुवाराए झुकैचिर्या। डा डामिन कुद 'ख्रीस डा ज' है लिजूयावर सोनो 'बेला हुके' है लिजूयावर कुधु ज हुन्या लेर। जे नोराए पाँत ताबाच्यो। ९ फरी 'आड लरें ताजूया, होड लरें ताजूया' लिन्या जेथैक जे ताछेच्यो। नो भरी डादा ताव परिए, खाली नो खेमन्त्या बेला मा:क।

१० "नोकिन डादा जात जात, राज्या राज्या लरें दान्या लेर।

११ घ्यो:व घ्यो:व भोचालोर हुद, पो पोड अनिकालर सोनो नुल्पा नुल्मार ताद, नमत ब बनै छे छे डम्सिउ सरेसर तान्या लेर।

१२ "खाली आव भरी ओमाताद ज डाजूनी जेखिरी पसिद क्यो:द इयालखानाल झा:चिरिज्यार। कचरील लाँद हाकिमर सोनो राजाराए डाक सच्याँचिरिज्यार। १३ आव भरिनी जे नोरालाई डासाची यान्या जेले। १४ नो बेलाक जेक्याँलाई जोगोइन्याए जूनी 'डा कै लिन्या, काता पाँन्या ओताव?' लिद जेयुँ आँचा पाँचा ताजैच्यो। १५ डा ज जेलाई नो जेखिरी पसिजूयावराए मापलतैधुन्या पाँर सोनो बुद्धीर यान्या डाले। १६ हैदी ब जे ख्वारालाई जेबाबु जेआमाराए, जेदाज्यु भाइराए, जेरला मेलाराए सोनो जेनेँ मेराए ब जेलाई सै:न्याए जूनी सँपिन्या लेर। १७ जे डामिनतावर जेतावए जेलाई प्राइँए सोन्या लेर। १८ हैदी ब तोबो जेचेम ब जेडैतिन गलिन्या माले। १९ डामिनत थोरिद जेलिजूयावए साचो जुनी दैन्या जेले।"

यरूसलेम खेमून्या बेला

(मत्ती २४:१५-२१; मर्कूस १३:१४-१९)

20“यरूसलेम सहर ओखेमूरिज्ञ्याव बेला आव सरेसनी ज्ञ सैच्यो। तछा आव यरूसलेमस लरें दाना हुव फौजीराए घिरिरिज्ञ्यार। 21 हो बेलाक यहूदियाल लिज्ञ्यावर गों जीदा ओधों:रक। सहरल लिज्ञ्यावर ब पुलुसूद ओधों:रक। फरी नाखारल लिज्ञ्यावर यरूसलेमल ताबारक। 22 नो बेला नो धर्मसासूत्रलाव सर्सिउ मिताव परमेस्वरए ओराएरिज्ञ्याव सजा ओसयोःज्ञ्याव बेला ज्ञ। 23 नो बेलाक याफूल याज्ञा ल्योर सोनो नुईं सवैज्ञ्याव आमार युं नावजार। आव देसलाव मिंरालाई बनै छे छे डम्सिउ धो सहिउ परमेस्वरए ओसजा हरिज्ञ्या। 24 कुधुलाई तरवालीराए याराफूईरिज्ञ्यार। कुधुलाई कैत जैद देस देसदा यारालारिज्ञ्यार। छुत जातलाव मिंराए याबेला ओमायोःवा पै यरूसलेमलाई छिल्द नैन्या लेर।”

ख्रीस फरी उहुन्या छचाम

(मत्ती २४:२९-३५; मर्कूस १३:२४-३१)

25“नकिन निमीत, स्यावैत, सोरोरात मनी सरेसर रें:न्या लेर। आव नामल फरी समुन्द्रलाव रीर बनै छल्किद नम मिताव यागर्जिक मानुवाताव मिंर यायुं आंचा पांचा ताद बनै छे:न्या लेर। 26 नमतावर यासतर म्नाद याथोनो:सिज्ञ्याव रें:द ‘आव मानुवा कै तान्या ओताव’ लिद मिंर याछ्याचेए मुर्छा परिन्या लेर। 27 हा:त ज्ञ मिं मिन्सिउलाई बनै ज्ञगै मगैव ओसक्तीरास बादल जील उहुज्ञ्याव रें:न्या लेर। 28 है जैद जे ते इतावर ओतानाज्ञ्याव जेरें:क, ‘परमेस्वरए गेलाई उस्कैन्या बेला हुके’ लिद जेयुंर सज्ञें:द रेंचिके,” है यादोक्यो। 29नकिन तोबो घर्ती झा:द याएक्यो, “नेभारा सीं तादी ब, जो सीं

तादी ब, ³⁰ नोर यामोम्नाक 'उभ्याली उहुव ची ओल्यो' लिन्या जेसैज्या। ³¹ हिताव ज़ आव है डादाचिउ पाँ भरी ओतानाज्याव जेरँक 'परमेस्वरए ओराज्या उहुनाव ची ओल्यो' लिन्या सैच्यो। ³² डा जेलाई साचो है डादाचिज्या, आव भरी ओमातावा पै आव जुक खेम्न्या माले। ³³ आव नाम नम ते खेम्न्या ले, खाली डा डापाँ ते खर्क ज़ मान्या माले।”

सैसिद लिच्यो

³⁴“है जैद जे ते जेमन लागिउ येनर दाद मँःए मँःए बारिन्या, सोनो 'आव डाजिउत कै तान्या ओताव?’ लिद वीनी फुइ लिन्या, निताव येनरानी जोगोइसिद लिच्यो, मानी हो छचाम झिबलाल परिउ मिताव जेताया। ³⁵ हो छचाम परमेस्वरए ओसजा आव मानुवाताव मिँ भरिराए याक्याँत तछ्योनी ज़ हरिज्या। ³⁶ है जैद जे निताव छे छे डम्सिउ सजारानी पुलुस्द मिँ मिन्सिउए ओड़ाक माछेद ज़ थंरिन्याए जूनी अल्सै मादाद पोखारिउ ज़ नैच्यो।”

³⁷येसुए दिनकाव ज़ लाक लाक यरूसलेमलाव ध्यान झिमल परमेस्वरए ओपाँ ओरासथैज्याव। रिमक रिमक ननी पुलुस्द जैतून दाँदा जीदा ओबासिनाज्याव। ³⁸ है जैद मिँ ओपाँ थैन्याए जूनी छकाल्न्या घग ध्यान झिमल याहुज्याव।

22

येसुलाई सैःन्या गुमुस्ता

(मत्ती २६:१-५; मर्कूस १४:१-२; यूहन्ना ११:४७-५३)

¹निस्तार यादोज्याव माँदा भरेस ज्यान्या पर्व हुनाद उलिज्याव। ² नो बेलाक ज़ मुख्या पुजारीर सोनो सास्त्रीराए 'येसुलाई कै जैद सैःन्या ओताव?’ लिद बुद्धी याकलैज्याव। 'मिँराए डाक सैःकिन मिँर मचिर्या' लिद याछेज्याव।

येसुलाई धोका याज्ञयाव इस्करियोत

(मत्ती २६:१४-१६; मर्कूस १४:१०-११)

३हा:त ज़ सैतान नो बाह्व जना उसिसरासकाव यहूदा इस्करियोतए ओक्याँत पसिके। ४ है जैद नो ननी पुलुसद् मुख्या पुजारीर सोनो ध्यान झिमलाव पुलिसराए ल्योक बाद 'येसुलाई इतावनी जेकुइत जैद डायचिरिज्ञया' लिद पाँसिकेर। ५ नोर बनै रेंद नोलाई पैसा यान्या जैकेर। ६ इस्करियोत ब उचित बुझिद हा:किन मिँर यामाल्यो बेलाक क्यो:न्या मौका उखिमज्ञयाव।

माँदा भरेस ज्ञयान्या पर्व

(मत्ती २६:१७-१९; मर्कूस १४:१२-१६)

७हा:त ज़ नो माँदा भरेस ज्ञयान्या पर्व सुरू ओतावत पाथा पलन्या छचाम ताके। ८ है जैद येसुए पत्रुस सोनो यूहननानिलाई अइ लिद निपरीक्यो, "गे आव पर्व मानिन्याए जूनी जिन ज्ञयावर जैनाचिन्के," है उनिदोक ते, ९ "नँ कै नलिङ्या, गिन काङ्कु बाद जैनान्या?" है दोकिनी। १० येसुए फरी, "जिन सहरल जिन्पसिउ प्राइँना तोबो री गपद् ओघागरी छींद बाज्ञयाव मिँ दैन्या जिन्ले। नोए उछीं उछीं बाद उपसिज्ञयाव झिमक ज़ बाचिन। ११ नक बाद नो झिमए ओर्गेलाई है दोचिन, 'नँलाई गेगुर्बाए है दींज्ञयाव, पाहुना लिन्या कुन्ती काङ्कु उलिज्ञयाव? आव पर्व उसिसरास नल ज़ मानिरिज्ञयाव दी,' है दोचिन। १२ है जिन्दोव प्राइँना नोए ओतर्ताव तालल तोबो घेप्पा कुन्ती चावस सजैसिउ जिनलाई सतैँद्यान्या ले। गेज्ञयाव भरी नल ज़ जैचिन," है दाद निपरीक्यो। १३ है जैद नोनी बाद है उनिदोव मिताव ज़ दैद, पर्वताव ज्ञयाव भरी जैकिनी।

परमेस्वरए उमिनताव भत्तयार

(मत्ती २६:२०-२९; मर्कूस १४:१७-२५; १ कोरिन्थी ११:२३-२५)

१४मानिन्या बेला ओतावत येसु ओसाचीरास नो कुन्तील दुप्सिद

ज्यावर ज्यान्याए जूनी याचुसिउत, ¹⁵ येसुए, “आव पर्ब डाक्याँत हरिज्याव दुखर ओमाताद ज़ जेस मानिउ डापैज्याव। ¹⁶ डा जेलाई है डादाचिज्या, परमेस्वरए ओभ्त्यारल उमिनतावर यामादुप्सिवा पै डा जेस फरी सिप ज्यान्या डामाले,” है यादोक्यो।

¹⁷ नकिन येसुए खुरी उकुइत रैद धन्याबाद चरै:द उसिसरालाई याद, “हाँ, आव भा:चिके। ¹⁸ डा जेलाई है डादाचिज्या, परमेस्वरए ओराज्या ओमाहुवा पै दाखमद्य फरी ओन्या डामाले,” है यादोक्यो। ¹⁹ नकिन येसुए उकुइत भरेस तोबो रैद, धन्याबाद चरै:द, नो भरेस के:द उसिसरालाई अइ लिद भा:द याएक्यो, “आव भरेस जेजूनी झा:द डायचिरिज्याव डाक्याँ ज़। आकिनी डालाई मामे:न्याए जूनी आव भ्त्यार दाव येन ज़ दोच्यो,” है यादोक्यो। ²⁰ हिताव ज़ फरी नो भरेस याज्युवत येसुए खुरी उकुइत रैद, “आव जेजूनी डसोभोरिज्याव डाझी ज़। आनी ज़ परमेस्वरए जेस सा:रो बाचा नैद्याचिरिज्याव।

²¹ “डालाई धोका याज्याव मिँ जेखार्ल ज़ लिज्या, डस सिप ज़ ज्युज्याव। ²² मिँ मिन्सिउए ते गोइँसिउ मिताव सयो:व ज़ परिए, खाली नोलाई धोका याज्याव मिँलाई ते थैए माँतकन ज़ लिज्या,” है यादोक्यो। ²³ नकिन उसिसर या याल, “गेनी निताव येन दान्या सु ओताव?” है लिकेर।

सेर जैसिन्या

²⁴ नकिन जाँवाक उसिसर, ‘गे भरिनी सु घेपपा गेलिज्याव?’ लिद याखर्लेसिनाक, ²⁵ येसुए, “आव मानुवाताव चलननी जोर राजा ताज्यार, होर याधूँलावराए याडैत बनै अखत्यासो ताज्यार। याधूँलावराए फरी नोरालाई ‘गेधर्मीदातार’ है दाव ज़ परिज्या। ²⁶ खाली जे ते निताव जैसिन्या मा:क, बुरू जेनी जो सेर ताज्या,

हो प्राइँए याधूँलाव ओजैसिक। फरी जोए हक दैजूयाव, नो प्राइँए यासेवा दान्या ओजैसिक। ²⁷ भतयारल चुसिजूयाव घेपूपा ओताजूयाव, सैँ जूयाव लाँजूयाव घेपूपा ओताजूयाव? नो चुसिजूयाव ज़ घेपूपा ताजूया सानी सैँ माःक? हैदी ब डा इन जेसेवा दान्या डाजैसिके।

²⁸“जे फरी आव मानुवाताव डादुख भरिल डास डासतत लिन्यार जेतावए, ²⁹किताव डालाई डाबाबुए ओराजूया याद नैनाव, हिताव ज़ डा ब जेलाई तोबो हक डयाचिरिजूया। ³⁰ नो डाराजूयाल जे डास ज़ तोबोल सिप ज़ जूयान्या जेले, सोनो बाह थर इस्त्राएलीराए याडैतावर ताद यायेन फाल्दान्या ब जेले,” है यादोक्त्यो।

पत्रुसए ओयेन येसुए डादा ज़ है ओदोव

(मत्ती २६:३१-३५; मर्कूस १४:२७-३१; यूहन्ना १३:३६-३८)

³¹नकिन येसुए पत्रुसलाई, “अ सिमोन, सिमोन, किताव मनमलाई छिन्कैजूयार, हिताव ज़ सैतानए नँलाई ब जाँचिन्या झाःसिद ले। ³² है जैद डा नजूनी डाल्योदा नदोव सत तारासोक लिद पोंखारिद डाईजूया। फरी तखेप नबादी ब ओल्द नहुवत नँ ननैरालाई पाथ पारैव ताके,” है ओदोक ते, ³³ पत्रुसए, “प्रभु, नँस इयालखानाल बान्या ब तयार ज़ डालिजूया, नँस सिन्या ब तयार ज़ डालिजूया,” है दोक्त्यो। ³⁴ येसुए फरी, “पत्रुस, नँलाई है डादीजूया, आछिम रील भाल्या ओमाकोद डालाई सोखेप ‘डामासरेसे’ है दान्या नले,” है दोक्त्यो।

दुख दैन्या बेला

³⁵नकिन येसुए प्राइँलाई, “डा नो डादा जेलाई पैसा, पोला, ड़ैर मालाँद ज़ डापरीचिक, काताराए खाँचो माताया?” है ओरादोक ते, “काताए खाँचो ज़ माताके,” है दोकेर।

³⁶नकिन फरी, “आकिन ते जेबाक हो मिताव तान्या माले। फरी जेबाक पैसाए ओचाहित ब तारिजूया, जेड़ैँ लाँन्या ओचाहित ब

तारिजूया, सोनो जेस तरवाली ओमालिकिन जेक्वार योःद तादी ब लँःद लॉन्या बेला हुके। 37 नो डाजूंनी धर्मसास्त्रलाव सर्सिउ पाँ ब योःनारिके। नलाव सर्सिउ आव ज़, 'नोलाई सिन्या सजा दैवरास तोबोल गनिरिजूयार।' नो पाँ डाक्याँत जुनी ब योःव ज़ परिके," है यादोक्यो। 38 हाःत ज़ उसिसराए झन, "प्रभु, गेस नेब्लो तरवाली लिजूया," है यादोक ते, "डापाँ जेमातीधुव प्राइँना घलिजूयाक," है यादोक्यो।

येसुए गेतसमनील ओपोंखारिउ

(मत्ती २६:३६-४६; मर्कूस १४:३२-४२)

39 येसु ननी पुलुसुद एकतारकाव ओबाजूयाव जैतून दाँदादा बाके। उसिसर ब ओलस ज़ बाकेर। 40 नो पोत याकेसोत उसिसरालाई, "पोंखारिचिके, मानी दुखराल जेमाथंरिधुया," है दाद, 41 ओल याकिन जाँ अछतड लुँ झोमक केसन्यावाक बाद नामक उघुँदानी तिकिसिद, 42 "अ बाबु, नयुँ ओताकिन आव डाक्याँत हरिजूयाव दुखर वैघाँके। खाली डा डायुँ माःक, नँ नयुँ ओताकिन वाज़," है लिद पोंखारिक्यो। 43 हाःत ज़ स्वर्गनी परमेस्वरए तोबो ओचाकर्या हुद येसुलाई सघैक्यो। 44 उयुँर बनै धो थाइव ताद बनै धामास पोंखारिद ओक्याँतिन ओपस्योर ब झी स्यासो हुद बाप बाप यातेजूयाव। 45 पोंखारिद ओखेमोत उसिसराए ल्योक ओबाक नोर प्राइँ यासोगोए स्याँद यालिजूयाव रँःद, 46 "काराव जेस्यौंजूयाव? सैसिद पोंखारिचिके, मानी दुखराल जेमाथंरिधुया," है यादोक्यो।

येसुलाई याक्योःहुव

(मत्ती २६:४७-५६; मर्कूस १४:४३-५०; यूहनना १८:३-११)

47 येसु ओपाँजूयाक ज़ मिँर तबगाल हुकेर। नोराए याड़ा याड़ा बाह जना उसिसरानिकाव यहूदा इस्करियोत उहुजूयाव। नो येसुए

ल्यूक हुद माई ओदोक, ⁴⁸ येसुए, “अ यहूदा, मिं मिन्सिउलाई माई दाव जैसिद धोका याव नपैजूयाव रो?” है ओदोव प्राईना, ⁴⁹ येसुस लिजूयावराए, ‘याक्यो:रिजूयाव ची ओल्यो’ लिन्या सैद, “प्रभु, आवरालाई तरवालीए गेरापल रो?” है दाद, ⁵⁰ तोबोए ते ओतरवाली हाइद प्रधान पुजारीए ओनोकोरलाई वोर्निकाव ओर्ना पल्द सतेदिक्यो। ⁵¹ नो रँ:द येसुए, “चिम दोके, अइ जैन्या मा:क,” है दाद नो मिँए ओर्ना छाप्घाद सोजोकाव ज़ जैदिक्यो।

⁵²नकिन येसुए ओललाई क्यो:ना हुव मुख्या पुजारीर, यहूदीराए यासेरर सोनो ध्यान झिमलाव पुलिसरालाई, “काता डालाई दाँकालाई मिताव तरवालीर खोंतार दाद जेक्यो:हुनाव? ⁵³ डा दिनकाव ज़ जेस ध्यान झिमल डालिजूयाव बेलाक जेमाक्यो:नाके। हैदी ब गोईंसिउ मिताव चुम चुमोए ओहक चलैन्या जेबेला आव ज़,” है यादोक्यो।

पत्रुसए ‘येसुलाई डामासरेसे’ है ओरादोव

(मती २६:५७-५८, ६९-७५; मर्कूस १४:५३-५४, ६६-७२; यूहनना १८:१२-१८, २५-२७)

⁵⁴नकिन येसुलाई क्यो:द प्रधान पुजारीए उझिमक लाँकेर। पत्रुस ब याछीं याछीं जाँ तादाड ओबाजूयाव। ⁵⁵ मिँर प्रधान पुजारीए ओचतराक में: दाद यामुईंसिजूयाक पत्रुस ब नोराए ल्यूक ज़ चुसिनाके। ⁵⁶ नलाव तोबो नोकोर्नी मेंमाए पत्रुस में:ए ओपलाँक चुसिद उलिजूयाव रँ:द नोलाई लँ लँ चिऊद, “आव ब येसुस उलिजूयाव,” है ओदोक ते, ⁵⁷ पत्रुसए, “अ बुची, डा ते नो है नलिजूयाव मिँलाई डामासरेसे,” है दोक्यो।

⁵⁸नकिन जाँवाक फरी तोबोए पत्रुसलाई सरेस्द, “नँ ते होसकाव ज़ सानी,” है ओदोक ते, पत्रुसए फरी, “डा ते होसकाव मा:क ब्याँ,” है दोक्यो।

⁵⁹नकिन तघन्तावाक फरी तोबो हुद, “आव ब पक्का नोसकाव

ज़, आव ते गालीललाव ज़ ची,” है दाव ज़ ओनैज़्याव। ⁶⁰ पत्रुसए झन, “नँ काता नपाँज़्याव इताव, डा काता ज़ डामासैए,” है ओदोव प्राइँना भाल्या ब कोके। ⁶¹ हा:त ज़ येसु पत्रुसए ल्योदा भाल्सिके। पत्रुसए नो रँ:द डादा प्रभुए, “भाल्या ओमाकोद ज़ डालाई स्रोखेप ‘डामासरेसे’ है लिन्या नले,” है ओदोव चेतैद, ⁶² लाँ:क पुलुसुद धस धस घर्के।

येसुलाई घ्यो:व कचरील यालाँव

(मती २६:५९-६८; मर्कूस १४:५५-६५; यूहनना १८:१९-२४)

⁶³नकिन येसुलाई गुद नैज़्यावराए प्रोद बरेद, ⁶⁴ उमी कप्याद, “नँलाई प्रोज़्याव सु? है लिनके,” है दोकेर। ⁶⁵ फरी बनै उल्लिनी गिल्ली दाद ब थल्केर।

⁶⁶नम उसँव प्राइँना यहूदीराए यासेरर, मुख्या पुजारीर सोनो सासत्रीराए घ्यो:व कचरी जैद प्राइँ दुप्सिद, येसुलाई याडाक सच्यौद, ⁶⁷ “नँ नो धर्मसास्त्रलाव हरिज़्याव ख्रीस ज़ रो? नँ साचो हो ज़ ताकिन गेलाई है दासिके,” है यादोक ते, येसुए, “है डादाचिदी ब जे डालाई पतिन्या जेमाले, ⁶⁸ डा जेलाई डासुधिचिदी ब जे जवाप यान्या जेमाले। ⁶⁹ खाली अबकिन मिँ मिन्सिउ माहान परमेस्वरए ओवोर्दा चुसिन्या डाले,” है यादोक्यो। ⁷⁰ हा:त ज़ नलाव भरिए, “हुकी नँ परमेस्वरए ओज़ा ज़ रो?” है यादोक ते, येसुए, “हैज़, जे है जेलिज़्याव मिताव ज़,” है ओरादोव प्राइँना, ⁷¹ नोर झन, “अब ते गेलाई छुत साची माचाहिए, साची भरी ओया:नी ज़ गेथैके,” है लिकेर।

23

रोमी सरकारलाव पिलातस

(मती २७:११-२६; मर्कूस १५:१-१५; यूहनना १८:२८-१९:१६)

¹नलाव दुप्सिउ भरिए येसुलाई पिलातसए ल्योक लाँकेर। ² नक लाँद येसुलाई खत लैद नोराए, “आव मिँ ख्रीस जैसिद, गेराजा ब

जैसिउ पैद, रोमी सरकारलाई सिर्मा यान्या माःक लिद गेदेसलाव मिंरालाई यामचैजूयाव,” है दोकेर।

3पिलातसए नोराए यापाँ थैद येसुलाई, “नँ साचो यहूदीराए याराजा ज़ रो?” है ओदोक ते, “नँ ज़ नथरैनाके,” है दोक्यो। 4 नकिन पिलातसए मुख्या पुजारीर सोनो नो माहोल्यारालाई, “आवए ओखत ते काता ज़ डामारैःए,” है ओरादोक ते, 5 नोराए झन, “यहूदिया खन्द भरिल गालीलकिन आड पै ज़ ओपाँ सथैद मिंरालाई यामचैजूयाव,” है दोकेर। 6 पिलातसए नोराए यापाँ थैद आव गालीललाव सै माःक लिद सुधिद, 7 ‘आव ते हेरोदए उकुइताव ज़ ची ओल्यो’ लिन्या थरैद हेरोदए ल्योदा परींक्यो। हेरोद ब हाः बेलाक यरूसलेमल हुद उलिजूयाव।

8हेरोदए येसुलाई रँःद बनै खुसी ताके। नोए डादाकिन ज़ येसुए उजूनी थैद ‘ओदोज़याव सरसर ब रँःव डादैकिन ताखेहो’ लिद दैसिउ ओपैजूयाव। 9 है जैद हेरोदए येसुलाई बनै ज़ खोलेक्यो। खाली येसुए घाइ ज़ मादोक्यो। 10 हो बेलाक मुख्या पुजारीर सोनो सासूत्रीराए नक च्याँःसिद येसुलाई खत लैव ज़ यालिजूयाव। 11 हाःत ज़ हेरोदए उसिपाईरास येसुलाई बनै हेलारी मिताव जैद बरेन्याए जूनी राजाए जासिन्या मिताव क्वा जासूद फरी पिलातसए ल्योदा ज़ लाँव यापरींक्यो। 12 हो छचामकिन ज़ हेरोद सोनो पिलातसनी नी नील खैद नै नै ब ताकिनी। नोनी डादाकिन निमाखैजूयाव।

13पिलातसए मुख्या पुजारीर, मिंराए याघेपूपा र सोनो माहोल्यारालाई फरी ब दुपूद, 14 “जे ते आव मिंलाई ‘मिंरालाई यामचैजूयाव’ लिद डाल्योक जेरैके। नोलाई जेड़ाक डाफाल्क जे है जेलिजूयाव मिताव ओखतर ते काता ज़ डामादैके। 15 हेरोदए मनी ओखत काता ज़ मादैद डाल्योदा सोवोल्घाँक्यो। है जैद आव मिंए सिन्या मिताव येन ओदोव कान्नी ज़ मारैःए। 16 है जैद डा आवलाई

तखेप सजा याद डारास्रिज्ञ्या,” है यादोक्त्यो। 17 [नोराए याचलनल पर्वत सालकाव तखेप तोबो कैदीलाई यारास्रिज्ञ्याव।] 18 हाःत ज्ञ नलावराए, “आवलाई सैःद बारब्बालाई रास्रिज्ञ्यासिके,” है लिद बनै क्रिकेर। 19 नो बारब्बा सरकारकिन तँदा जैसिद मिँरालाई मचैद तोबो नेब्लोलाई ओरासैःवनी इयालखानाल उलिज्ञ्याव।

20पिलातसए फरी येसुलाई रासो ओपैज्ञ्यावए माहोल्यारालाई फरी तखेप यासमजैक्त्यो। 21 हितावत ब, “आवलाई क्रुसत तज्ञैद सैःन्या ज्ञ,” लिद बनै क्रिकेर। 22 हाःत ज्ञ पिलातसए फरी, “काराव? आवए मादान्या काता दाद ओनैज्ञ्याव? डा ते आवलाई सैःन्या मिताव ओयेन कान्त ज्ञ डामादैए। है जैद डा आवलाई तखेप सजा याद डारास्रिज्ञ्या,” है ओरादोक्त ते, 23 नोर ज्ञन बनै ज्ञ मचिद, ‘क्रुसत तज्ञैन्या ज्ञ’ है लिद याक्रिक पिलातसए ओपाँ ज्ञ सोडोइदिकेर। 24 है जैद पिलातसए यापाँ ज्ञ थरैद्याद, 25 नो यान्निउ इयालखानाल लिज्ञ्याव मिँ सैःद मिँरालाई मचैव बारब्बालाई रास्रिद्याद येसुलाई ‘जेजैन्या जैचिके’ लिद यालाई ज्ञ यासूँपिक्त्यो।

गलगथा बान्या येमक

(मत्ती २७:३२; मर्कूस १५:२१)

26येसुलाई सैःना यालाँज्ञ्याक नाखारनी हुज्ञ्याव कुरेनीलाव तोबो सिमोनलाई येसुए ओलाँज्ञ्याव क्रुस सुघुर्द येसुए उछीं उछीं बाव परीकेर।

27येसुए उछीं उछीं बाज्ञ्यावर कुधु माहोल्या ज्ञ यालिज्ञ्याव। नोरास मेंमार ब घरे घरे याबाज्ञ्याव। 28 नोराए ल्योदा येसु उछींदा भाल्सिद, “अ यरूसलेमलाव मेंमार, डाजुँनी ताघर्च्यो। बुरू जेजुँनी स्नो जेजाराए जुँनी घर्चिके। 29 तछा परमेस्वरए ओसजा उहुक आलाव मिँराए, ‘ज्ञा मादैज्ञ्याव थारी मेंमार, नुइँ सोवैन्या याज्ञा माल्योर याभागी ल्योर ज्ञ लिज्ञ्यार,’ है लिन्त्या लेर। 30 स्नो, ‘हाँरालाई ब ‘गेतर्त तेचिके’,

गोरालाई ब 'गेलाई राल्सिके' है दान्या लेर।'

31 डा काचो सीं स्यासोलाई अइ याजैनाकिन, या थँव सीं स्यासोरालाई परमेस्वरए कै याजैवके?" है यादोक्त्यो।

येसुलाई क्रुसत यातङ्गैव

(मत्ती २७:३३-४४; मर्कुस १५:२२-३२; यूहन्ना १९:१७-२७)

32 येसुस तखेपत सैःन्याए जूनी नेब्लो अपराधीनिलाई ब यारालाँज्याव। 33 नोर खपूप्या पो यादोज्यावक याकेसोत क्रुसत यारातङ्गैकेर। नो अपराधीनिलाई तोबोलाई ओवोर्दा, तोबोलाई ओदाबर्यादा याराजैकेर। 34 येसुए अइ लिद पोखारिक्यो, "परमेस्वर बाबु, आवरालाई कैज ताराजैयो, यादोज्याव येन मासैर।" नोराए फरी येसुए ओक्वारात गोला झाःद भाःकेर। 35 मिँर नक च्याँःसिद याभाल्सिज्याव। याघेपपाराए फरी, "आवए छुतरालाई ते याबाँचैक्यो, परमेस्वरए साचो ओछाँतित ख्रीस ज़ ताकिन ओक्याँलाई ब ओबाँचैवक," है लिद बरेःकेर। 36 सिपाईराए ब गिल्लैद ओल्योक बाद सिरो दाखमद्य याद, 37 "नँ यहूदीराए याराजा ताकिन नक्याँलाई बाँचैके," है दोकेर। 38 ओललाई तङ्गैद यानैज्याव क्रुसए ओडैत फरी,

'आव यहूदीराए याराजा ज़'

है लिद तोबो फल्यात सर्द चकेर।

39 येसुस तङ्गैसित अपराधीनी ब तोबोए येसुलाई गिल्लैद, "नँ ख्रीस माःक रो? ख्रीस नताकिन नक्याँलाई मनी गिनलाई मनी बाँचैसिन्के," है ओदोक ते, 40 ओनैए नोलाई सिडार्द, "नँ सिन्या सजा दैद नैज्यावत ब परमेस्वरलाई रँःद नमाछेःए रो? 41 गिन ते गिनयेननी ज़ इताव सजा दैन्या गिन्ताके। आव मिँए ते मादान्या काता ज़ मादोव," है दाद, 42 येसुलाई, "अ येसु, नँ नराज्याल

नपसिक डालाई ब तामें:नायो,” है ओदोक ते, ⁴³ येसुए, “नँलाई साचो है डादींज्या, आछिमकिन ज़ नँ डास स्वर्गत नतारिज्या,” है दोक्यो।

येसु उसिउ

(मत्ती २७:४५-५६; मर्कूस १५:३३-४१; यूहनना १९:२८-३०)

⁴⁴हो बेलाक बाह बजेवाकिन तीन बजे पै देस भरी काल्या कले झ्याद, ⁴⁵ निमीए ओज़गै ज़ मारें:के। थिक हो बेलाक ज़ ध्यान झिमलाव बारिसिउ क्वा ब ओलनी ज़ नेपरा ताद चिस्के। ⁴⁶ हा:त ज़ येसु ब बनै चोइस अइ लिद किके, “अ परमेस्वर बाबु, आव डापुरूस नपिछाल ज़ डाईंज्या,” है लिद उस० सफ्या:क्यो।

⁴⁷नक च्याँ:सिद लिज्याव कप्तानए नो भरी रँ:द, “आव ते साचो धर्मी मिँ ज़ ची ओल्यो,” लिद परमेस्वरए उमिन सघ्यो:क्यो। ⁴⁸ नो भाल्सिना हुव माहोल्याराए नो भरी रँ:द घरे घरे याझिमदा बाकेर। ⁴⁹ ओल येसुस बारिज्याव मिँर सोनो गालीलनी ओलस हुव मेंमार जाँ तादाड च्याँ:सिद याभाल्सिज्याव।

येसुए ओमोरो खादर पुपल याझा:व

(मत्ती २७:५७-६१; मर्कूस १५:४२-४७; यूहनना १९:३८-४२)

⁵⁰⁻⁵¹यहूदिया खन्दलाव अरिमाथिया नाखारलाव तोबो योसेफ यादोज्याव घ्यो:व कचरीलाव मिँ ओल्यो। नो धर्मी, परमेस्वरए ओराज्या खिमज्याव मिँ ओतावए येसुलाई सै:न्या यासल्लाल माखैद भै:द ओमाराएज्याव। ⁵² नोए पिलातसए ल्योक येसुए ओमोरो निक्क्यो। ⁵³ नो मोरोलाई क्रुसतिन हाइद, पालो क्वाए लुम्बैद सुलाई ज़ यामाराझा:ताव दावन खुपिद पुप जैद ओनैज्याव खादरल झा:क्यो। ⁵⁴ हो छचाम तयारीलाव दिन ओल्यो। नासिन्या छचाम सुरू तानाद उलिज्याव। ⁵⁵ येसुए उछींताव हुव गालीललाव

मेंमार योसेफए उछीं उछीं बाद नो मोरो ओझाःव खादर चिऊकेर। 56 नो मेंमार ओल्द बाद येसुए ओमोरोलाई थीन्याए जूनी चाव सी डरो मासर, अतरर सरजाम जैद हो पराःती नासिन्या छचाम ओतावए कानुनलाई भैःद नासिकेर।

24

येसु सिउनी सैसिद ओसोव

(मती २८:१-१०; मर्कूस १६:१-११; यूहनना २०:१-१०)

1 सातालाव उसंक्ताव छचाम, नो मेंमार छकालन्या घग ज्ञ सोद नो सरजाम याजैव अतररास येसुए ओखादरदा बाकेर। 2 नक याकेसोत नो खादरलाई कसिउ घ्योःव लुं पलतैसिउ रँःकेर। 3 नल यापसिक प्रभु येसुए ओमोरो मादैकेर। 4 'आव कै ओताव' लिद यायुं आँचा पाँचा ओताज्याक नेब्लो बनै तक तकौ क्वा क्वाइसिउनी उमँःजानी याड़ाक निच्याँःसिहुव यारारँःकेर। 5 यारारँःव प्राइंना बनै छेःद नामक याफुलुपसिक, नो चाकर्यानी है यारादोकिनी, "जे जीदोलाई सिउराए पोल काराव जेखिमहुज्याव? 6 नो आल माले, सैसिद सोधुके। जेस गालीलल उलिज्याकाव है ओदाचिउ पाँर याका दोच्यो। 7 'डा मिँ मिन्सिउ पापीराए कुइत सँपिनारिज्यार। नोराए क्रुसत तज्ञैद यासैःनाव स्रोलात डसैसिरिज्या,' है ओदाचिउ सैँ माःक?" है निरादोक ते, 8 नो मेंमाराए नो पाँ चेतैद, 9 खादरनी ओल्द बाद एघार जना उसिसर स्रोनी ओलस बारिज्याव छुतरालाई ब नो पाँ भरी है यारादोनाकेर। 10 नो पाँ सथैज्याव मेंमार तोबो मरियम मगदलिनी, तोबो योअनना स्रोनी तोबो याकूबए ओआमा मरियम याल्यो। यास बाव छुत मेंमाराए ब येसुए ओसाचीरालाई है यारादोज्याव। 11 नोराए नो पाँ याथैक ओअर्थ माल्यो मिताव थरैद मारापतिकेर। 12 पत्रुस ते थर च्याँःसिद खादरदा धोँःनाद, खादरल घोम लिद उचिऊक येसुलाई लुम्बैसिउ क्वार वाज्ज रँःक्यो। नलाव

ताव भरी उयुँल खामिद ओल्द बाके।

इम्माउसदा बान्या येमक येसु ओसरैःसिउ

(मर्कूस १६:१२-१३)

13 हो छचाम ज़ फरी नेब्लो ओलस बारिज़्यावनी यरूसलेमनी एघार किलोमितरवा तादाड लिज़्याव इम्माउस यादोज़्याव नाखारदा निबाज़्याव। 14 निबाज़्याक तव पाँ भरी नी नील निपाँनाज़्याव। 15 नोनी पाँए पाँए निबाज़्याक येसु कातानी हुद नीस नीस ज़ बाके। 16 येसुए नोनिलाई ओललाई मासरेसून्या जैद उनिनैज़्याव। 17 हाःत ज़ येसुए, “जिन काता जिन्पाँहुज़्याव?” है उनिदोक ते, नोनी च्याँःसिद निडाः चुम चुमो जैद, 18 क्लेओपास यादोज़्यावए, “यरूसलेमल बाव भरिरानी नलाव आछिम पराःती तव पाँ मासैज़्याव नँ वाज़ नलिज़्याव सा,” है ओदोक ते, 19 येसुए, “यरूसलेमल किताव पाँ ओताव?” है उनिदोक ते, नोनी, “नासरतलाव येसु यादोज़्याव तोबो मिँ ओल्यो। नो अगमबक्ता ओतावए परमेस्वर सोनो मिँराए ड़ाक सक्तीलाव येन दाद चावस ओरापैज़्याव। 20 नोलाई मुख्या पुजारीर सोनो गेघेपपाराए सिन्या सजाल सूपिद क्रुसत तङ्गैद सैःकेर। 21 गे ते इस्राएलीरालाई बाँचैना हुव ज़ ताखेहो है ची गेल्यो। नो पाँर ओताव आख ते सोला ताधुके। 22 हैदी ब गेसकाव ख्वा ख्वा मेंमाराए अचम्बलाव पाँ ज़ है दासिकेर। नोर आछ्या छकालून्या घग ज़ येसुए ओखादरक याबाक, 23 येसुए ओमोरो खादरल ओमालिज़्याव दी। नक परमेस्वरए ओचाकर्यानिलाई ब यारारँःकेर दी। नोनी फरी ‘येसु जीदो ज़ लिज़्या’ है ब यारादोकिनी दी। 24 है जैद गेसकाव तोबो नेब्लोए नो खादरक याबाक नो मेंमाराए है यालिज़्याव मिताव ज़ ताके। खाली येसुलाई ते मारँःकेर,” है दोकिनी।

25 हाःत ज़ येसुए, “जे अधमर, अगमबक्ताराए यासरो पाँ खर्क जेतीधुरिज़्याव? 26 नल, ‘ख्रीसए दुखर सहिद वाज़ बल्ल ज़गै

मगैव ओराज़्या दैरिज़्याव' लिन्या सर्सिउ लिज़्या," है दाद, 27 मोसाए ओसरोकिन अगमबक्ताराए यासरो पैकाव ओल उजूनी धर्मसास्त्रलाव सर्सिउ पाँर पलास्द निएक्यो।

28 हाःत ज़ नो नाखार याकेसुहवत येसु नोनिकिन जाँ ड़ादा बाव ओपैज़्याव मिताव ओजैसिक, 29 नोनी घलैद है दोकिनी, "नम इयानाके। आछिम गिनस ज़ लिनके," है निदोक ते, भैःद नीस ज़ बाके। 30 नोनिस ज़यान्याए जूनी चुसिद, भरेस उकुइत रैद, असिक निद, केःद निएक्यो। 31 उनियो प्राइना ज़ 'आव ते येसु ची ओल्यो' लिद सरेस्क़िनी। हाःत ज़ येसु ब नक ज़ समैसिके। 32 नोनी फरी नी नील है लिकिनी, "येसु गिनस ज़ ओल्योए ची ओल्यो, नो येमत गिनुहुज़्याकाव धर्मसास्त्रलाव पाँर पलास्द ओयासिन्क गिनयुँर हाः होलाँ ओताव," है लिद, 33 हतपत ज़ च्याँःसिद यरूसलेमदा ओलद बाद एघार जना उसिसर छुत यानैरास दुपसिद यालिज़्याव निरादैनाक, 34 नोनी निपाँ निमापाँद ज़ नोराए, "साचो ज़ ओल्यो, गोप्रभु जींदो ज़ उलिज़्याव ओल्यो। सिमोनए ओड़ाक ब सरैःसिके," है यारादोकेर। 35 फरी नोनी ब नो येमताव पाँ भरी है दाद, "भरेस केःद ओभाःव प्राइना ज़ गिन्सरेस्के," है यारादोकिनी।

येसु उसिसराए ड़ाक ओसरैःसिउ

(मत्ती २८:१६-२०; मर्कूस १६:१४-१८; यूहनना २०:१९-२३;

ओसाचीर १:४-८)

36 निताव यापाँज़्यावत ज़ येसु उमँःजानी ज़ याखार्ल च्याँःसिहुद नोरालाई, "जेयुँर होलाँ ओताक," है यादोक्यो। 37 नो यारैःव प्राइना तखँडरी छेद, 'आव ते इया ची सा' है लिद बनै याछेःज़्याक, 38 येसुए, "जे कै जैद 'हो ज़' लिद जेयुँ माहुपद जेछ्याचेए जेयुँर भुतु भुतु जेजैज़्याव? 39 आव ते डा ज़ ची, डाखँ डाकुइताव घाइर चिऊद सरेस्नाचिके। जे है जेलिज़्याव मिताव इया डाताकिन ते डास्या डारूसर मालिखेहो। जेयुँ ओमाहुपकिन छाप्नाचिके," 40 है

दाद उखँ उकुइर सतैद याएक्यो। ⁴¹ निताव रँद बनै अचम्ब ताद यारँतए, ‘आव गेमँच्यानी गेरँःजूयाव सैं साचो गेरँःजूयाव ओताव’ है यालिजूयाक, येसुए, “जेस ज्ञान्यार मालिजूया?” है ओरादोक ते, ⁴² हिप्सिउ डाँः तगेंदा याएक ते, ⁴³ प्राइँए याइ़ाक ज़ कैंक्यो। ⁴⁴नकिन येसुए, “डा जेस डालिजूयाकाव मोसाए ओकानुनल, अगमबक्तराए यासरोल सोनो भजन पोस्तोकोल ब डा डाजूनी सर्सिउ भरी जुनी ब डाक्याँत योव ज़ परिके लिद है दाव ज़ डानैचिजूयाव,” है दाद, ⁴⁵ धर्मसास्त्रलाव सर्सिउ पाँए ओअर्थ भरी पलासद्याद, ⁴⁶ “धर्मसास्त्रल ब ‘ख्रीस दुखर सहिद उसिउ सोंलात सैंसिरिजूया’ लिद सर्सिउ लिजूया। ⁴⁷ सोनो यरूसलेमनी सुरू जैद प्राइँ जातलाव मिँराए ल्योड बाद, ‘जेयुँ परमेस्वरए ल्योदा फकैचिकेदा, जेपाप भरी ख्रीसए उमिननी क्याल्सिरिजूया,’ है लिद प्राइँदा ज़ यारासथैनाचिके। ⁴⁸ जे आव पाँत डासाचीर ताद जेले। ⁴⁹ है जैद डा डाबाबुए ओयाकालाव छैव पुरुस परीद डयाचिरिजूया। खाली जे नोए ल्योनिकाव सक्तीर जेमादैवा पै यरूसलेमल ज़ लिच्यो,” है यादोक्यो।

येसु स्वर्गत ओबाव

(मर्कूस १६:१९-२०; ओसाचीर १:९-११)

⁵⁰नकिन येसुए नोरालाई बेथानिया नाखारक पै ओलस ओलस ज़ लाँद उकुइर राद नोरालाई असिक याएक्यो। ⁵¹ नो असिक ओराएजूयाक ज़ नोराए ल्योनी छीसिद स्वर्गदा बाके। ⁵² नोराए उमिनर बनै सघ्योःद्याद रेंए रेंए यरूसलेमदा ओल्द बाद, ⁵³ दिनकाव ज़ ध्यान झिमल परमेस्वरए उमिन सघ्योःद्याव ज़ नैकेर।

सा:रो बाचा

Kham, Western Parbate: सा:रो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd